

नमो नमो निग्मलदंसणस्स

पू. आनंद-क्षमा-ललित-सुशील-सुधर्मसागर गुरुभ्यो नमः

१३

रायपसेणियं बीइअं उवंगसुत्तं

मुनि दीपरत्नसागर

Date : / / 2012

Jain Aagam Online Series-13

१३ गंथाणुक्कमो

कमंको	विसय	सुत्तं	गाहा	अणुक्कमो	पिड्डंको
१	सूरियाभ-देव पयरण	१-४७	-	१-४७	०२
२	पएसि-राय पयरण	४८-८५	-	४८-८५	३६

१३ रायपसेणियं बीइअं उवंगसुत्तं

[१] तेणं कालेणं तेणं समएणं आमलकप्पा नामं नयरी होत्था-‘रिद्ध-त्थिमिय’-समिद्धा जाव पासादीया दरिसणीया अभिरूवा पडिरूवा ।

[२] तीसे णं आमलकप्पाए नयरीए बहिया उत्तरपुरत्थिमे दिसीभाए अंबसालवणे नामं चेइए होत्थ, चिराईए जाव पडिरूवे ।

[३] असोयवरपायवपुढवीसिलावट्टय वत्तव्वया उववातियगमेणं नेया [तस्स णं वणसंडस्स बहुमज्झदेसभाए, एत्थ णं महं एगे असोगवरपायवे पन्नत्ते तस्स णं असोगवरपायवस्स हेट्ठा ईसिं खंध-समल्लीणे एत्थ ण महं एक्के पुढविसिलापट्टए पन्नत्ते]

[४] सेयो राया धारिणी देवी, सामी समोसटे, परिसा निग्गया, जाव राया पज्जुवासइ ।

[५] तेणं कालेणं तेणं समएणं सूरियाभे देवे सोहम्मे कप्पे सूरियाभे विमाणे सभाए सुहम्माए सूरियाभंसि सीहासणंसि चउहिं सामाणियसाहस्सीहिं चउहिं अग्गमहिसीहिं सपरिवाराहिं तिहिं परिसाहिं सत्तहिं अणिएहिं सत्तहिं अणियाहिर्वईहिं सोलसहिं आयरक्खदेवसाहस्सीहिं, अन्नेहिं बहूहिं सूरियाभविमाणवासीहिं वेमाणिएहिं देवेहिं देवीहि य सद्धिं संपरिवुडे महयास्सहयनट्ट-गीय-वाइय-तंती-तल-ताल-तुडिय-घण-मुङ्ग-पडुप्पवादियरवेणं दिव्वाइं भोगभोगाइं भुंजमाणे विहरति, इमं च णं केवलकप्पं जंबुद्धीवं दीवं विउलेणं ओहिणा आभोएमाणे-आभोएमाणे पासति ।

तत्थ समणं भगवं महावीरं जंबुद्धीवे दीवे भारहे वासे आमलकप्पाए नयरीए बहिया अंबसालवणे चेइए अहापडिरूवं ओग्गहं ओगिण्हित्ता संजमेणं तवसा अप्पाणं भावेमाणं पासति, पासित्ता हट्ठुट्ठ-चित्तमाणंदिए नंदिए पीइमणे परमसोमणस्सिए हरिसवस-विसप्पमाणहियए विगसियवर-कमलनयने पयलिय-वरकडग-तुडिय-केऊर-मउड-कुंडल-हारविरायंतरइयवच्छे पालंब-पलंबमाण-घोलंत-भूसणधरे ससंभमं तुरियं चवलं सुरवरे सीहासणाओ अब्भुट्ठेइ अब्भुट्ठेत्ता पायपीढाओ पच्चोरूहति पच्चोरूहित्ता एगसाडियं उत्तरासंगं करेति करेत्ता तित्थयरभिमुहे सत्तट्ठपयाइं अनुगच्छइ अनुगच्छित्ता वामं जाणुं अंचेइ अंचेत्ता दाहिणं जाणुं धरणितलंसि निहट्ठु तिक्खुत्तो मुद्धाणं धरणितलंसि निवेसेइ निवेसेत्ता ईसिं पच्चुन्नमइ, पच्चुन्नमित्ता कडयतुडियथंभियाओ भुयाओ पडिसाहरइ पडिसाहरेत्ता करयलपरिग्गहियं दसनहं सिरसावत्तं मत्थए अंजलिं कट्ठु एवं वयासी-

नमोत्थु णं अरहंताणं भगवंताणं आदिगराणं तित्थगराणं सयंसबुद्धाणं पुरिसुत्तमाणं पुरिससीहाणं पुसिरवरपुंडरीयाणं पुरिसरवरगंधहत्थीणं लोगुत्तमाणं लोगनाहाणं लोगहियाणं लोगपईवाणं लोगपज्जोयगराणं अभयदयाणं चक्खुदयाणं मग्गदयाणं जीवदयाणं सरणदयाणं बोहिदयाणं धम्मदयाणं धम्मदेसयाणं धम्मनायगाणं धम्मसारहीणं धम्मवरचाउरंतचक्कवट्ठीणं अप्पडिहयवर-नाणदंसणधराणं वियट्ठउमाणं जिणाणं जावयाणं तिन्नाणं तारयाणं बुद्धाणं बोहयाणं मुत्ताणं मोयगाणं सव्वन्नूणं सव्वदरिसीणं सिवमयलमरुयमणंतमक्खय-मव्वाबाहम-पुनरावत्तयं सिद्धि-गइनामधेयं ठाणं संपत्ताणं,

नमोत्थु णं समणस्स भगवओ महावीरस्स आइगरस्स तित्थयरस्स जाव सिद्धिगइनामधेयं

ठाणं संपाविउकामस्स वंदामि णं भगवंतं तत्थगयं इहगते पासइ मे भगवं तत्थगते इहगतं ति कट्ठु वंदति नमंसति वंदित्ता नमंसित्ता सीहासणवरगए पुव्वाभिमुहं सणिसण्णे ।

[६] तए णं तस्स सूरियाभस्स इमे एयारूवे अज्झत्थिए चिंतिए पत्थिए मणोगए संकप्पे समुपज्जित्था-

सेयं खलु समणे भगवं महावीरे जंबुद्वीवे दीवे भारहे वासे आमल-कप्पए नयरीए बहिया अंबसालवणे चेइए

अहापडिरूवं ओग्गहं ओगिण्हित्ता संजमेणं तवसा अप्पाणं भावेमाणे विहरइ, तं महाफलं खलु तहारूवाणं भगवंताणं नामगोयस्स वि सवणयाए किमंग पुण अभिगमण-वंदण-नमंसण-पडिपुच्छण-पज्जुवासणयाए? एगस्स वि आयरियस्स धम्मियस्स सुवयणस्स सवणयाए? किमंग पुण विउलस्स अट्ठस्स गहणयाए? तं गच्छामि णं समणं भगवं महावीरं वंदामि नमंसामि जाव पज्जुवासामि,

एयं मे पेच्चा हियाए सुहाए खमाए दयाए निस्सेयसाए आनुगामियत्ताए भविस्सतित्ति कट्ठु एवं संपेहेइ संपेहित्ता अभिओगिए देवे सद्दावेइ सद्दावेत्ता एवं वयासी- ।

[७] एवं खलु देवाणुप्पिया समणे भगवं महावीरे जंबुद्वीवे दीवे भारहे वासे आमलकप्पाए नयरीए बहिया अंबसालवणे चेइए अहापडिरूवं ओग्गहं ओगिण्हित्ता संजमेणं तवसा अप्पाणं भावेमाणे विहरइ,

तं गच्छह णं तुमे देवाणुप्पिया जंबुद्वीवं दीवं भारहं वासं आमलकप्पं नयरिं अंबसालवणं चेइयं समणं भगवं महावीरं तिकखुत्तो आयाहिणं पयाहिणं करेह करेत्ता वंदह नमंसह वंदित्ता नमंसित्ता साइं-साइं नामगोयाइं साहेह साहित्ता समणस्स भगवओ महावीरस्स सव्वओ समंता जोयणपरिमंडलं जं किंचि तणं वा पत्तं वा कट्ठं वा सक्करं वा असुइं अचोक्खं पूइयं दुब्भिगंधं तं सव्वं आहुणिय-आहुणिय एगंते एडेह एडेत्ता नच्चोदगं नाइमट्ठियं पविरलफुसियं-रयरेणुविणासणं दिव्वं सुरभिगंधोदयवासं वासह ।

वासित्ता निहयरयं नट्ठरयं भट्ठरयं उवसंतरयं पसंतरयं करेह करेत्ता जलयथलयभासुरप्प-भूयस्स बैटट्ठाइस्स दसद्धवण्णस्स कुसुमस्स जन्नुस्सेहपमाणमेत्तिं ओहिं वासं वासह वासित्ता कालागरु-पवरकुंदुरुक्क-तुरुक्कधूव-मघमघेत-गंधुदधुयाभिरामं सुगंधवर-गंध-गंधियं गंधवट्ठिभूतं दिव्वं सुरवराभिग-मणजोग्गं करेह य कारवेह य करेत्ता य कारवेत्ता य खिप्पामेव एयमाणत्तियं पचच्चिप्पणह ।

[८] तए णं ते आभिओगिया देवा सूरियाभेणं देवेणं एवं वुत्ता समाणा हट्ठुत्तु जाव हियया करयलपरिग्गहियं दसनहं सिरसावत्तं मत्थए अंजलिं कट्ठु एवं देवो तहत्ति आणाए विणएणं वयणं पडिसुणंति, पडिसुणेत्ता उत्तरपुरत्थिमं दिसीभागं अवक्कमंति अवक्कमित्ता वेउव्वियसमुग्धाएणं समोहणंति समोहणित्ता संखेज्जाइं जोयणाइं दंडं निसिरंति तं जहा- रयणाणं वइराणं वेरुलियाणं लोहियक्खाणं मसारगल्लाणं हंसगब्भाणं पुलगाणं सोगंधियाणं जोईरसाणं अंजणाणं अंजणपुलगाणं रयणाणं जायरूवाणं अंकाणं फलिहाणं रिट्ठाणं अहाबायरे पोग्गले परिसाईंति परिसाडेत्ता अहासुहुमे पोग्गलेपरियायंति परियाइत्ता दोच्चं पि वेउव्वियसमुग्धाएणं समोहणंति समोहणित्ता उत्तरेवेउव्वियाइं रूवाइं विउव्वंति,

विउव्वित्ता ताए उक्किट्ठाए तुरियाए चवलाए चंडाए जवणाए सिग्घाए उद्धूयाए दिव्वाए देवगईए तिरियमसंखेज्जाणं दीवसमुद्दाणं मज्झिमज्झेणं वीइयवमाणा-वीईवयमाणा जेणेव जंबुद्वीवे दीवे जेणेव भारहे वासे जेणेव आमलकप्पा नयरी जेणेव अंबसालवने चेइए जेणेव समणे भगवं महावीरे तेणेव

उवागच्छन्ति, उवागच्छित्ता समणं भगवं महावीरं तिक्खुत्तो आयाहिणं पयाहिणं करेति करेत्ता वंदन्ति नमंसन्ति वंदित्ता नमंसित्ता एवं वयासी-अम्हे णं भन्ते! सूरियाभस्स देवस्स आभियोग्गा देवा देवाणुप्पियं वंदामो नमंसामो सक्कारेमो सम्माणेमो कल्लाणं मंगलं देवयं चेइयं पज्जुवासामो ।

[९] देवाइ समणे भगवं महावीरे ते देवे एवं वयासी-‘पोराणमेयं देवा! जायमेयं देवा! किच्चमेयं देवा! करणिज्जमेयं देवा! आइण्णमेयं देवा! अब्भणुण्णायमेयं देवा! जण्णं भवणवइ-वाणमंतर-जोइ-सिय-वेमाणियदेवा अरहन्ते भगवन्ते वंदन्ति नमंसन्ति वंदित्ता नमंसित्ता तओ साइं-साइं नामगोयाइं साहंति तं पोराणमेयं देवा जीयमेयं देवा किच्चमेयं देवा करणिज्जमेयं देवा आइण्णमेयं देवा अब्भणुण्णायमेयं देवा ।

[१०] तए णं ते अभिओगिया देवा समणेणं भगवया महावीरेणं एवं वुत्ता समाणा हइ जाव हियया समणं भगवं महावीरं वंदन्ति नमंसन्ति वंदित्ता नमंसित्ता उत्तरपुरत्थिमं दिसीभागं अवक्कमन्ति अवक्कमित्ता वेउव्विय-समुग्घाएणं समोहणन्ति समोहणित्ता संखेज्जाइं जोयणाइं दंडं निसिरन्ति तं जहा-रयणाणं जाव रिद्धाणं अहाबायरे पोग्गले परिसाडैति परिसाडेत्ता अहासुहुमे पोग्गले परियायन्ति परियाइत्ता दोच्चं पि वेउव्वियसमुग्घाएणं समोहणन्ति समोहणित्ता संवट्टयवाए विउव्वन्ति,

से जहानामए-भइयदारए सिया तरुणे बलवं जुगवं जुवाणे अप्पायंके थिरग्गहत्थे दढपाणि-पाय-पिड्ढंतरोरुपरिणए घण-निचिय-वट्टवलियखंधे चम्मेद्वग-दुघण-मुट्ठिय-समाहय-निचियगत्ते उरस्सब-लसमण्णागए तलजमलजुयलबाहू लंघण-पवण-जइण-पमद्वणसमत्थे छेए दक्खे पट्टे कुसले मेधावी निउ-णसिप्पोवगए एगं महं दंड-संपुच्छणिं वा सलागाहत्थगं वा वेणुलाइयं वा गहाय रायंगणं वा रायन्तेउरं वा आरामं वा उज्जाणं वा देवउलं वा सभं वा पवं वा आरामं वा उज्जाणं वा अतुरियमचवलमसंभंतं निरंतरं सुनिउणं सव्वतो समन्ता संपमज्जेज्जा ।

एवामेव तेऽवि सूरियाभस्स देवस्स आभिओगिया देवा संवट्टयवाए विउव्वन्ति विउव्वित्ता समणस्स भगवओ महावीरस्स सव्वतो समन्ता जोयणपरिमंडलं जं किंचि तणं वा पत्तं वा तहेव सव्वं आहुणिय-आहुणिय एगन्ते एडैति एडित्ता खिप्पामेव उवसमन्ति उवसमित्ता दोच्चं पि वेउव्विय-समुग्घाएणं समोहणन्ति, समोहणित्ता अब्भवद्दलए विउव्वन्ति ।

से जहानामए-भइयदारगे सिया तरुणे जाव निउणसिप्पोवगए एगं महं दगवारगं वा दगथालगं वा दगकलसगं वा दगकुंभगं वा गहाय आरामं वा जाव पवं वा अतुरिय जाव सव्वतो समन्ता आवरिसेज्जा एवामेव तेऽवि सूरियाभस्स देवस्स आभिओगिया देवा अब्भवद्दलए विउव्वन्ति विउव्वित्ता खिप्पामेव पतणतणायन्ति पतणतणाइत्ता खिप्पामेव विज्जुयायन्ति विज्जुयाइत्ता समणस्स भगवओ महावीरस्स सव्वओ समन्ता जोयणपरिमंडलं नच्चोदगं नातिमट्ठियं तं पविरल-पप्फुसियं रयरेणुविणासणं दिव्वं सुरभिगंधोदगं वासं वासन्ति वासेत्ता निहयरयं नड्ढरयं भड्ढरयं उवसंतरयं पसंतरयं करेति करेत्ता खिप्पामेव उवसामन्ति उवसामित्ता-

तच्चं पि वेउव्वियसमुग्घाएणं समोहणन्ति समोहणित्ता पुप्फवद्दलए विउव्वन्ति, से जहा-नामए मालागारदारए सिया तरुणे जाव निउणसिप्पोवगए एगं महं पुप्फछज्जियं वा पुप्फपडलगं वा पुप्फ-चंगेरियं वा गहाय रायंगणं वा जाव सव्वतो समन्ता कयग्गहगहियकरयलपब्भद्विप्पमुक्केणं दसद्ध-वण्णेणं कुसुमेणं पुप्फपुंजोवयारकलियं करेज्जा, एवामेव ते सूरियाभस्स देवस्स आभिओगिया देवा पुप्फव-द्दलए

विउव्वंति विउव्वित्ता खिप्पामेव पतणुतणायंति पतणतणाइत्ता खिप्पामेव जाव जोयणपरिमंडलं जल-य-थलय-भासुरप्पभूयस्स वैट्ठाइस्स दसद्धवण्णकुसुमस्स जाण्णुस्सेहपमाणमेत्तिं ओहिं वासं वासंति वा-सित्ता कालागरु पवर-कुंदुरुक्क-तुरुक्क-धूव-मघमघेंत-गंधुदुयाभिरामं सुगधवरगंध-गंधियं गंधवट्ठिभूतं दिव्वं सुरवराभिगमणजोग्गं करेंति य कारवेंति य करेत्ता य कारवेत्ता य खिप्पामेव उवसामंति उवासामित्ता ।

जेणेव समणे भगवं महावीरे तेणेव उवागच्छंति उवागच्छित्ता समणं भगवं महावीरं तिक्खुत्तो जाव वंदित्ता नमंसित्ता समणस्स भगवओ महावीरस्स अंतियाओ अंबसाल-वणाओ चेइयाओ पडिनिक्खमंति पडिनिक्खमित्ता ताए उक्किट्ठाए जाव वीइवयमाणा-वीईवयमाणा जेणेव सोहम्मं कप्पे जेणेव सूरियाभे विमाणे जेणेव सभा सुहम्मा जेणेव सूरियाभे देवे तेणेव उवागच्छंति उवागच्छित्ता सूरियाभं देवं करयलपरिग्गहियं दसनहं सिरसावत्तं मत्थए अंजलिं कट्ठुं जएणं विजएणं वद्धावेंति वद्धावेत्ता तमाणत्तियं पच्चप्पिणंति ।

[११] तए णं से सूरियाभे देवे तेसिं आभिओगियाणं देवाणं अंतिए एयमट्ठं सोच्या निसम्म हट्ठुट्ठ-जाव हियए पायत्ताणियाहिवइं देवं सद्धावेति सद्धावेत्ता एवं वयासी-खिप्पामेव भो देवाणुप्पिया! सूरियाभे विमाणे सभाए सुहम्माए मेघोघरमसिय गंभीर महर सद्धं जोयण परिमंडल सूसरं घटं तिक्खुत्तो उल्लालेमाणे-उल्लालेमाणे महया-महया सद्धेणं उग्घोसेमाणे-उग्घोसेमाणे एवं वयाहिं-आणवेइ णं भो सूरियाभे देवे गच्छति णं भो सूरियाभे देवे जंबुद्धीवे दीवे भारहे वासे आमलकप्पाए नयरीए अंबसावलवणे चेइए समणं भगवं महावीरं अभिवंदए, तुब्भेवि णं भो देवाणुप्पिया! सव्विइट्ठीए जाव नाइयरवेणं नियगपरिवाल सद्धिं संपरिवुडा साइं-साइं जाणविमाणाइं दुरूढा समाणा अकालपरिहीणं चेव सूरियाभस्स देवस्स अंतियं पाउब्भवह ।

[१२] तए णं से पायत्ताणियाहिवती देवे सूरियाभेणं देवेणं एवं वुत्ते समाणे हट्ठुट्ठ जाव हियए करयलपरिग्गहियं जाव अंजलिं कट्ठु एवं देवो तहत्ति आणाए विणएणं वयणं पडिसुणेतिं पडिसुणेत्ता जेणेव सूरियाभे विमाणे जेणेव सभा सुहम्मा जेणेव मेघोघरमसिय-गंभीरमहरसद्धा जोयणपरिमंडला सुस्सरा घंटा तेणेव उवागच्छंति उवागच्छित्ता तं मेघोघरसियगंभीरमहरसद्धं जोयणपरिमंडला सूसरं घटं तिक्खुत्तो उल्लालेति ।

तए णं तीसे मेघोघरसियगंभीरमहरसद्धाए जोयण-परिमंडलाए सुसराए घंटाए तिक्खुत्तो उल्लालियाए समाणीए से सूरियाभे विमाणे पासायविमाण-निक्खुडावडिय-सद्धघंटापडिसुया-सयसहस्ससंकुले जाए यावि होत्था ।

तए णं तेसिं सूरियाभविमाणवासिणं बहूणं वेमाणियाणं देवाणं य देवीण य एगंतरइपसत्त-निच्चप्पमत्त-विसय-सुहुमुच्छियाणं सूसरघंटारव-विउलबोल-तुरिय-चवल पडिबोहणे कए समाणे घोसणकोऊहलदिण्णकण्ण-एगग्गचित्त-उवउत्त-माणसाणं से पायत्ताणीयाहिवई देवे तंसि घंटारवंसि निसंत-पसंतंसि महया-महया सद्धेणं उग्घोसेमाणे उग्घोसेमाणे एवं वयासी- हंत सुणंतु भवंतो सूरियाभ-विमाणवासिणो बहवे वेमाणिया देवा य देवीओ य सूरियाभ-विमाणपड्ढो वयणं हियसुहत्थं आणवेइ णं भो! सूरियाभे देवे गच्छइ णं भो सूरियाभे देवे जंबुद्धीवं दीवं भारहं वास आमलकप्पं नयरीं अंबसालवणं चेइयं समणं भगवं महावीरं अभिवंदए, तं तुब्भेऽवि णं देवाणुप्पिया! सव्विइट्ठीए अकालपरिहीणं चेव सूरियाभस्स देवस्स अंतियं पाउब्भवह ।

[१३] तए णं से सूरियाभविमाणवासिणो बहवे वेमाणीया देवा य देवीओ य पायत्ताणियाहि-
वइस्स देवस्स अंतिए एयमद्वं सोच्चा निसम्मं हट्ठुद्व-जाव हियया अप्पेगइया वंदणवत्तिया अप्पेगइया
पूयणवत्तियाए अप्पेगइया सक्कारवत्तियाए अप्पेगइया सम्माणवत्तियाए अप्पेगइया कोऊहलवत्तियाए
अप्पे-

गइया असुयाइं सुणिस्सामो अप्पेगइया सुयाइं अट्ठाइं हेऊइं पसिणाइं कारणाइं वागरणाइं पुच्छिस्सामो,
अप्पेगइया सूरियाभस्स देवस्स वयणमणुयत्तमाणा अप्पेगइया अण्णमण्णमणुयत्तमाणा अप्पेगइया
जिणभतिरागेणं अप्पेगइया धम्मो त्ति अप्पेगइया जीयमेयं ति कट्ठु सव्विड्डीए जावं अकालपरिहीणं चेव
सूरियाभस्स देवस्स अंतियं पाउब्भवंति ।

[१४] तए णं से सूरियाभे देवे ते सूरियाभविमाणवासिणो बहवे वेमाणिआ देवा य देवीओ य
सव्विड्डीए जाव अकालपरिहीणं चेव अंतियं पाउब्भवमाणे पासति पासित्ता हट्ठुद्व-जाव हियए
आभिओगियं देवं सद्दावेति सद्दावेत्ता एवं वयासी- खिप्पामेव भो देवाणुप्पिया! अणेगखंभसय-सण्णिविद्वं
लीलद्वियसालभंजियागं ईहामिय-उसभ-तुरग-नर-मगर-विहग-वालग-किन्नर-रुरु-सरभ-चमर-कुंजर-वणलय-
पउमलयभत्तचित्तं खंभुग्गय-वइरवेइया-परिगयाभिरामं विज्जाहर-जमलजुयल-जंतजुत्तं पिव अच्चीसहस्स-
मालणीयं रुवगसहस्सकलियं भिसमाणं भिब्भिसमाणं चक्खुल्लोयणलेसं सुहफासं सस्सिरीयरूवं घंटावलि-
चलिय-महुर-मणहरसरं सुहं कंतं दरिसणिज्जं निउणओचिय-मिसिमिसेंत-मणिरयण-घंटियाजाल-परिक्खित्तं
जोयणसय-सहस्सवित्थिण्णं दिव्वं गमणसज्जं सिग्घगमणं नामं जाणविमाणं विउव्वाहि, विउव्वित्ता
खिप्पामेव एयमाणत्तियं पच्चप्पिणाहि ।

[१५] तए णं से आभिओगिए देवे सूरियाभेणं देवेणं एवं वुत्ते समाणे हट्ठुद्वे जाव हियए
करयलपरिग्गहियं जाव पडिसुणेइ पडिसुणित्ता उत्तरपुरत्थिमं दिसीभागं अवक्कमति अवक्कमित्ता
वेउव्वियसमुग्घाएणं समोहण्णइ समोहणित्ता संखेज्जाइं जोयणाइं जाव अहाबायरे पोग्गले परिसाडेइ
परिसाडित्ता अहासुहुमे पोग्गले परियाएइ परियाइत्ता दोच्चं पि वेउव्विय-समुग्घाएणं समोहण्णति
समोहणित्ता अणेगखंभसयसण्णिविद्वं जाव जाणविमाणं वेउव्विउं पवत्ते यावि होत्था ।

तए णं से आभिओगिए देवे तस्स दिव्वस्स जाणविमाणस्स त्तिदिसिं तिसोवाणपडिरूवए
विउव्वित्ति तं जहा- पुरत्थिमेणं दाहिणेणं उत्तरेणं, तेसिं तिसोवाण-पडिरूवगाणं इमे एयारूवे वण्णावासे
पन्नत्ते, तं जहा- वइरामया निम्मा रिद्धामया पतिट्ठाणा वेरुलियामया खंभा सुवण्णरुप्पामया फलगा
लोहियतक्खमइयाओ सूर्इओ वइरामया संधी नाणामणिमया अवलंबणा अवलंबणाबाहाओ य पासादीया जाव
पडिरूवा ।

तेसिं णं तिसोवाणपडिरूवगाणं पुरओ पत्तेयं-पत्तेयं तोरणा पन्नत्ता तेसिं णं तोरणाणं इमे
एयारूवे वण्णावासे पन्नत्ते तं जहा- तेणं तोरणा नानामणिमया नामामणिएसु थंभेसु उवनिविद्विसण्णि-
विट्ठा विविहमुत्तं-तरारूवोवचिया विविहतरारूवोवचिया जाव पडिरूवा ।

तेसिं णं तोरणाणं उप्पिं अट्ठुद्वमंगलगा पन्नत्ता तं जहा- सोत्थिय-सिरिवच्छ-नंदियावत्तं-
वद्धमाणग-भद्दासण-मच्छ-दप्पणा जाव पडिरूवा ।

तेसिं णं तोरणाणं उप्पिं बहवे किण्हचा-मरज्झए जाव सुक्किलचामरज्झए अच्छे सण्हे
रुप्पपट्टे वइरामयदंडे जलयामलगंधिए सुरम्मं पासादीए दरिसणिज्जे अभिरूवे पडिरूवे विउव्वइ ।

तेसिं णं तोरणणं उप्पिं बहवे छत्तातिछत्ते पडागाइपडागे घंटाजुगले चामर जुगले उप्पल-
सूत्तं-१५

हत्थए पउम-नलिण-सुभग-सोगंधिय-पोंडरीय-महापोंडरीय-सतपत्तसहस्सपत्तहत्थए सव्वरयणामए अच्छे
जाव पडिरूवे विउव्वइ ।

तए णं से आभिओगिए देवे तस्स दिवस्स जाणविमाणस्स अंतो बहुसमरमणिज्जं भूमिभागं
विउव्वित्ति, से जहानामए-आलिङ्गपुक्खरेइ वा मुङ्गपुक्खरेइ वा सरतले इ वा करतले इ वा चंदमंडले इ वा
सूरमंडले इ वा आयंसमंडले इ वा उरब्भचम्मे इ वा वसहचम्मे इ वा वराहचम्मे इ वा सीहचम्मे इ वा
वग्घचम्मे इ वा मिगचम्मे इ वा छगलचम्मे इ वा दीवियचम्मे इ वा अणेगसंकुकीलगहस्सवितते नानाविह
पंचवन्नेहि मणीहिं उवसोभिते आवड-पच्चावड-सेढि-पसेढि-सोत्थिय-सोवत्थिय-पूसमाणव-वद्धमाणग-
मच्छंडग-मगरंडग-जार-मार-फुल्ला-वलि-पउमपत्त-सागरतरंग-वसंतलय-पउमलयभत्तिचित्तेहिं सच्छाएहिं
सप्पभेहिं समरीइएहिं सउज्जोएहिं नानाविहपंचवण्णेहिं मणीहिं उवसोभिए तं जहा- किण्हेहिं नीलेहिं
लोहिएहिं हालिद्धेहिं सुक्किलेहिं,

तत्थ णं जे ते किण्हा मणी तेसिं णं मणीणं इमे एयारूवे वण्णावासे पन्नत्ते, से
जहानामए-जीमूतए इ वा अंजणे इ वा खंजणे इ वा कज्जले इ वा मसी इ वा मसीगुलियाइ वा गवले इ
वा गवलगुलिया इ वा भमरे इ वा भमरावलिया इ वा भरपतंगसारे इ वा जंबूफले इ वा अद्धारिठ्ठे इ वा
पुरपुठ्ठे इ वा गए इ वा गयकलभे इ वा किण्हसप्पे इ वा किण्हकेसरे इ वा आगासथिग्गले इ वा
किण्हासोए इ वा किण्हकणवीरे इ वा किण्हबंधुजीवे इ वा भवे एयारूवे सिया? नो इण्ठे सम्महे ते णं
किण्हा मणी इत्तो इड्डतराए चेव कंततराए चेव पियतराए चेव मणुण्णतराए चेव मणामतराए चेव वण्णेणं
पन्नत्ता ।

तत्थ णं जेते नीला मणी तेसिं णं मणीणं इमे एयारूवे वण्णवासे पन्नत्ते, से जहानामए-
भिंगे इ वा भिङ्गपत्ते इ वा सुए इ वा सुयपिच्छे इ वा चासे इ वा चासपिच्छे इ वा नीली इ वा नीलीभेदे
इ वा नीलीगुलिया इ वा सामाए इ वा उच्चंतगे इ वा वणराती इ वा हलधरवसणे इ वा मोरग्गीवा इ वा
पारेवयग्गीवा इ वा अयसिकुसुमे इ वा बाणकुसुमे इ वा अंजणकेसियाकुसुमे इ वा नीलुप्पले इ वा
नीलासोगे इ वा नीलकणवीरे इ वा नीलबंधुजीवे इ वा भवे एयारूवे सिया? नो इण्ठे सम्महे, ते णं नीला
मणी एत्तो इड्डतराए चेव जाव वण्णेणं पन्नत्ता ।

तत्थ णं जे ते लोहिया मणी तेसिं णं मणीणं इमेयारूवे वण्णावासे पन्नत्ते, से जहानामए-
ससरुहिरे इ वा उरब्भरुहिरे इ वा वराहरुहिरे इ वा मणुस्सरुहिरे इ वा महिसरुहिरे इ वा बालिंदगोवे इ वा
बालदिवाकरे इ वा संझब्भरागे इ वा गुंजद्धरागे इ वा जासुअणकुसुमे इ वा किंसुयकुसुमे इ वा
पालियाकुसुमे इ वा जाइहिङ्गुलए इ वा सिलप्पवाले इ वा पवालअंकुरे इ वा लोहियक्खमणी इ वा
लक्खरसगे इ वा किमिरागकंबले इ वा चीणपिड्डरासी इ वा रत्तुप्पले इ वा रत्तासोगे इ वा रत्तकणवीरे इ
वा रत्तबंधुजीवे इ वा भवे एयारूवे सिया? नो इण्ठे सम्महे । ते णं लोहिया मणी इत्तो इड्डतराए चेव जाव
वण्णेणं पन्नत्ता ।

तत्थ णं जे ते हालिद्धा मणी तेसिं णं मणीणं इमेयारूवे वण्णावासे पन्नत्ते से जहानामए-
चंपए इ वा चंपगछल्ली इ वा चंपगभेए इ वा हालिद्धा इ वा हालिद्धाभेदे इ वा हालिद्धागुलिया इ वा

हरियालिया इ वा हरियालभेदे इ वा हरियालगुलिया इ वा चिउरे इ वा चिउरंगराते इ वा वरकणगे इ वा वरकणगनिघसे इ वा वरपुरिसवसणे इ वा अल्लकीकुसुमे इ वा चंपाकुसुमे इ वा कुहंडि-याकुसुमे इ वा सूतं-१५

कोरंटकदामे इ वा तडवडकुसुमे इ वा घोसेडियाकुसुमे इ वा सुवण्णजूहियाकुसुमे इ वा सुहिरण्णकुसुमे इ वा बीययकुसुमे इ वा पीयासोगे इ वा पीयकणवीरे इ वा पीयबंधुजीवे इ वा भवे एयारूवे सिया? नो इण्हे समहे, ते णं हालिद्धा मणी एत्तो इद्धतराए चेव वण्णेणं पन्नत्ता ।

तत्थ णं जे ते सुक्किला मणी तेसिं णं मणीणं इमेयारूवे वण्णावासे पन्नत्ते । से जहानामए-अंके इ वा संखे इ वा चंदे इ वा कुंदे इ वा दंते इ वा कुमुद उदक-दयरय-दहिघण-खीर-खीरपूरेइ वा कौंचावली इ वा हारावली इ वा हंसावली इ वा बलागावली इ वा चंदावली इ वा सारतिय-बलाहए इ वा धंतधोयरूप्पट्टे इ वा सालिपिठ्ठरासी इ वा कुंदपुप्फरासी इ वा कुमुदरासी इ वा सुक्कच्छिवाडी इ वा पिहुणमिंजिया इ वा भिसे इ वा मुणालिया इ वा गयदंते इ वा लवंगदलए इ वा पौंडरियदलए इ वा सेयासोगे इ वा सेयकणवीरे इ वा सेयबंधुजी-वे इ वा भवे एया-रूवे सिया? नो इण्हे समहे, ते णं सुक्किला मणी एत्तो इद्धतराए चेव जाव वण्णेणं पन्नत्ता ।

तेसि णं मणीणं इमेयारूवे गंधे पन्नत्ते, से जहानामए- कोट्टपुडाण वा तगरपुडाण वा एलापुडाण वा चोयपुडाणं वा चंपापुडाण वा दमणापुडाण वा कुंकुमपुडाण वा चंदणपुडाण वा उसीरपुडाण वा मरुआपुडाण वा जातिपुडाण वा जूहियापुडाण वा मल्लियापुडाण वा ण्हाणमल्लियापुडाण वा केतगिपुडाण वा पाडलिपुडाण वा नोमालि-यापुडाण वा अगुरुपुडाण वा लवंगपुडाण वा वासुपुडाण वा कप्पूरपुडाण वा अनुवायंसि वा ओभिज्जमाणाण वा कोट्टिज्जमाणाण वा भंजिज्जमाणाण वा उक्किरिज्जमाणाण वा विक्किरिज्जमाणाण वा परिभुज्ज-माणाण वा भंडाओ भंडं साहरिज्जमाणाण वा ओराला मणुण्णा मणहरा घाणमणनिव्वुतिकरा सव्वओ समंता गंधा अभिनिस्सवंति, भवे एयारूवे सिया? नो इण्हे समहे, ते णं मणी एत्तो इद्धतराए चेव गंधेणं पन्नत्ता ।

तेसि णं मणीणं इमेयारूवे फासे पन्नत्ते से जहा- नामए- आइणेइ वा रूप इ वा बूरे इ वा नवणीए इ वा हंसगब्भतूलिया इ वा सिरीस-कुसुमनिचये इ वा बालकुमुदपत्तरासी इ वा भवे एयारूवे सिया नो इण्हे समहे, ते णं मणी एत्तो इद्धतराए चेव जाव फासेणं पन्नत्ता ।

तए णं से आभिओगिए देवे तस्स दिव्वस्स जाणविमाणस्स बहुमज्झदेसभागे एत्थ णं महं पिच्छाघरमंडवं विउव्वइ- अणेगखंभसयसन्निविट्ठं अब्भुगय-सुकय-वइरवेइया-तोरणवररइय-सालभंजियागं सुसिलिद्ध-विसिद्ध-लद्ध-संठिय-पसत्थ-वेरुलिय-विमलखंभं नाणामणि कणगरयण-खचियउज्जलबहुन्म-सम-सुविभत्तदेस भाइए ईहामिय-उसभ-तुरग-नर-मगर-हग-वालग-किन्नर-रुरु-सरभ-चमर-कुंजर-वणलय-पउम-लयभत्तिचित्तं कंचणमणिरयण-थूभियागं नाणाविहपंचवण्णघंटापडागपरिमंडियग्गसिहरं चवलं मरीतिकवयं विणिम्मयंतं लाउल्लोइयमहियं गोसीस-सरस-रत्तचंदण-दद्धर-दिन्नपंचंगुतलं उवचियचंदणकलसं वंदणघड-सुकय-तोरणपडिदुवारदेसभागं आसत्तोसत्तविउल-वट्टवग्घारियमल्लादामकलावं पंचवण्णसरससुरभि-मुक्क-पुप्फपुंजोवयारकलियं कालागरुं-पवर-कुंदुरुक्क-तुरुक्क-धूव-मघमघेंतगंधुदुयाभिरामं सुगंधवरगंधगंधियं गंधवट्ठिभूतं दिव्वं तुडियसद्धसंपणाइयं अच्छर-गण-संघ-विकिण्णं पासाइयं देरिसणिज्जं जाव पडिरुवं ।

तस्स णं पिच्छाघरमंडवस्स अंतो बहुसमरमणिज्जं भूमिभागं विउव्वति जाव मणीणं फासो । तस्स णं पेच्छाघरमंडवस्स उल्लोयं विउव्वति-पउमलयभत्तिचित्तं अच्छं जाव पडिरुवं ।

तस्स णं बहुसमरमणिज्जस्स भूमिभागस्स बहुमज्झदेसभाए एत्थ णं महं एगं वड्डरामयं
अक्खाडगं विउव्वति । तस्स णं अक्खाडयस्स बहुमज्झदेसभागे एत्थ णं महेगं मणिपेढियं विउव्वति-अट्ठ
सूत्तं-१५

जोयणाइं आयामविकखंभेणं चत्तारि जोयणाइं बाहल्लेणं सव्वमणिमयं अच्छं सण्हं जाव पिडरूवं ।

तीसे णं मणिपेढियाए उवरि एत्थ णं महेगं सीहासणं विउव्वइ, तस्स णं सीहासणस्स
इमेयारूसे वण्णावासे पन्नत्ते-तवणिज्जमया चक्कला रययामया सीहा सोवणिया पाया नानामणिमयाइं
पायसीसगाइं जंबूणयमयाइं गत्ताइं वड्डरामया संधी नानामणिमए वेच्चे, से णं सीहासणे ईहामिय-उसभ-
जाव पउमलयभत्तिचित्ते संसारसारोवचियमणिरयणपायपीढे अत्थरग-मिउमसूरग-नवत-यकुसंत-लिंब-केसर-
पच्च-त्थुयाभिरामे आईगण-रूय-बूर-नवनीय-तूलफासे सुविरइयरयत्ताणे ओयवियखोमुदुगुल्लपट्टपडिच्छायणे
रत्तंसुअसंवुए सुरम्मे आईगणरूयबूरनवनीयतूलफासे मउए पासाईए दरिसणिज्जे अभिरूवे पडिरूवे ।

तस्स णं सीहासणस्स उवरिं एत्थ णं महेगं विजयदूसं विउव्वइ-संखंक-कुंद-दगरय-अमय-
महियफेणपुंज-सन्निगासं सव्वरयणामयं अच्छं सण्हं पासादीयं दरिसणिज्जं अभिरूवं पडिरूवं ।

तस्स णं सीहासणस्स उवरिं विजयदूसस्स य बहुमज्झदेसभागे एत्थ णं महं एगं वयरामयं
अंकुसं विउव्वति, तस्सिं च णं वयरामयंसि अंकुसंसि कुंभिकं मुत्तादामं विउव्वति, से णं कुंभिके
मुत्तादामे अण्णेहिं चउहिं ।

कुंभिकेहिं मुत्तादामेहिं तदद्दुच्चत्तपमाणभेत्तेहिं सव्वओ समंता संपरिखित्ते ।

ते णं दामा तवणिज्जलंबूसगा सुवण्णपयरमंडियागां नानामणिरयणविविहहारद्धहारउव-
सोभियसमुदाया ईसिं अण्ण-मण्ण-संपत्ता वाएहिं पुव्वावरदाहिणुत्तरागएहिं मंदायं-मंदायं एज्जमाणा-एज्ज-
माणा पलंबमाणा-पलंबमाणा पझंझमाणा-पझंझमाणा उरालेणं मणुण्णेणं मणहरेणं कण्णमणनिव्वुतिकरेणं
सद्धेणं ते एसे सव्वओ समंता आपूरेमाणा आपूरेमाणा सिरीए अतीव-अतीव उवसोभेमाणा-उवसोभेमाणा
चिद्धंति ।

तए णं से आभिओगिए देवे तस्स सीहासणस्स अवरुत्तरेणं उत्तरेणं उत्तरपुरत्थिमेणं एत्थ
णं सूरियाभस्स देवस्स चउण्हं सामाणियसाहस्सीणं चत्तारि भद्दासणसाहस्सीओ विउव्वइ,

तस्सं णं सीहासणस्स पुरत्थिमेणं एत्थ णं सूरियाभस्स देवस्स चउण्हं अगगमहिसीणं
सपरिवाराणं चत्तारि भद्दासणसाहस्सीओ विउव्वइ तस्स णं सीहासणस्स दाहिणपुरत्थिमेणं एत्थ णं
सूरियाभस्स देवस्स अब्भित्तरपरिसाए अट्ठण्हं देवसाहस्सीणं अट्ठ भद्दासणसाहस्सीओ विउव्वइ, एवं-दाहिणेणं
मज्झिमपरिसाए दसण्हं देवसाहस्सीणं दस भद्दासणसाहस्सीओ विउव्वति दाहिणपच्चत्थिमेणं बाहिरपरिसाए
बारसण्हं देवसाहस्सीणं बारस भद्दासण-सहस्सीओ विउव्वति पच्चत्थिमेणं सत्तण्हं अणियाहिवतीणं सत्त
भद्दासणे विउव्वति ।

तस्स णं सीहासणस्स चउदिसिं एत्थ णं सूरियाभस्स देवस्स सोलसण्हं आयरक्खदेव-
साहस्सीणं सोलस भद्दासण-साहस्सीओ विउव्वत्ति, तं जहा- पुरत्थिमेणं चत्तारि साहस्सीओ दाहिणेणं
चत्तारि साहस्सीओ पच्चत्थिमेणं चत्तारि साहस्सीओ उत्तरेणं चत्तारि साहस्सीओ ।

तस्स दिव्वस्स जाणविमाणस्स इमेयारूवे वण्णावासे पन्नत्ते से जहानामए-अड्डरुग्गयस्स
वा हेमंतियबालियसूरियस्स खयरिंङ्गालाणं वा रत्तिं पज्जलियाणं जवाकुसुमवणस्स वा केसुयवणस्स वा
पारियवणस्स वा सव्वतो समंता संकुसुमियस्स भवे एयारूवे सिया? नो इण्ठे सम्भे, तस्स णं दिवस्स

जाणविमाणस्स एत्तो इद्वतराए चेव जाव वण्णेणं पन्नत्ते, गंधो य फासो य जहा- मणीणं । तए णं से आभियोगिए देवे दिव्वं जाणविमाणं विउव्वइ विउव्वित्ता जेणेव सूरियाभे देवे तेणेव उवागच्छइ उवागच्छित्ता

सूत्तं-१६

सूरियाभं देवं करयलपरिग्गहियं जाव पच्चप्पिणंति ।

[१६] तए णं से सूरियाभे देवे आभियोगस्स देवस्स अंतिए एयमद्वं सोच्चा निसम्मं हइ जाव हियए दिव्वं जिणिंदाभिगमणजोग्गं उत्तरवेउव्वियरूवं विउव्वति विउव्वित्ता चउहिं अग्गमहिसीहिं सपरिवाराहिं दोहिं अणिएहिं, तं जहा- गंधव्वाणिएणं य नट्टाणिएण य सद्धिं संपरिवुडे तं दिव्वं जाणविमाणं अनुपयाहिणीकरेमाणे पुरत्थिमिल्लेणं तिसोमाणपडिरूवाणं दुरुहति दुरुहित्ता जेणेव सीहासणे तेणेव उवागच्छइ उवागच्छित्ता सीहासणवरगए पुरत्थाभिमुहे सण्णिसण्णे ।

तए णं तस्स सूरियाभस्स देवस्स चत्तारि सामाणियसाहस्सीओ तं दिव्वं जाणविमाणं अनुपयाहिणीकरेमाणा उत्तरिल्लेणं तिसोवाणपडिरूवणं दुरुहति दुरहित्ता पत्तेयं-पत्तेयं पुव्वणत्थेहिं भद्दासणेहिं निसीयंति अवसेसा देवा य देवीओ य तं दिव्वं जाणविमाणं जाव दाहिणिल्लेणं तिसोवाण-पडिरूवणं दुरुहति दुरुहित्ता पत्तेयं-पत्तेयं पुव्वणत्थेहिं भद्दासणेहिं निसीयंति ।

तए णं तस्स सूरियाभस्स देवस्स तं दिव्वं जाणविमाणं दुरुढस्स समाणस्स अद्वमंगला पुरतो अहाणुपुव्वीए संपत्थिया, तं जहा- सोत्थिय-सिरिवच्छ-जाव दप्पणा ।

तयाणंतरं च णं पुन्नकलसभिंंगार-दिव्वा य छत्तपडागा सच्चामरा दंसणरइया आलोयदरि-सणिज्जा वाउद्धयविजयवेज-यंतीपडागा ऊसिया गगणतलमणुलिहंती पुरतो अहाणुपुव्वीए संपत्थिया ।

तयाणंतरं च णं वेरुलियभिसंतविमलदंडं पलंबकोरंटमल्लदामोवसोभितं चंदमंडलनिभं समु-स्सियं विमलमायवत्तं पवरसीहासणं च मणिरयणभत्तिचित्तं सपायपीढं सपाउया-जोयसमाउत्तं बहुकिंकरा-मरप-रिग्गहियं पुरतो अहाणुपुव्वीए संपत्थियं ।

तयाणंतरं च णं वइरामय-वटट्-लट्ठ-संठिय-सुसिलिट्ठ-परिघट्ठ-मट्ठ-सुपतिट्ठिए विसि-ट्ठे अणेगवरपंचवण्णकुडभी-सहस्सपरिमंडियाभिरामे वाउद्धय-विजय-वेज-यंतीपडागच्छित्ता-तिच्छत्तकलिए तुंगे गगणतलमणुलिहंतसिहरे जोयणसहस्समूसिए महतिमहालए महिं-दज्झए पुरतो अहाणुपुव्वीए संपत्थिए ।

तयाणंतरं च णं सुरूवं-नेवत्थ-परिकच्छिया सुसज्जा सव्वालंकार-भूसिया महया भड-चडगर-पहगरेणं पंच अणीयाहिवइणो पुरतो अहानुपुव्वीए संपत्थिया ।

तयाणंतरं च णं बहवे आभियोगिया देवा देवीओ य सएहिं-सएहिं रूवेहिं सएहिं-सएहिं विसेसेहिं सएहिं-सएहिं विहवेहिं सएहिं-सएहिं निज्जोएहिं सएहिं-सएहिं नेवत्थेहिं पुरतो अहाणुपुव्वीए संपत्थिया ।

तयाणंतरं च णं सूरियाभ-विमाणवासिणो बहवे वेमाणिया देवा य देवीओ य सव्विड्डीए जाव नाइयवरेणं सूरियाभं देवं पुरतो पासतो य मग्गतो य समणुगच्छंति ।

[१७] तए णं से सूरियाभे देवे तेणं पंचाणीयपरिखित्तेणं वइरामयवट्ठ-लट्ठ-संठिय-जाव जोयणसहस्समूसिएणं महतिमहालतेणं महिंदज्झएणं पुरतो कड्ढिज्जमाणेणं चउहिं सामाणियसाहस्सीहिं जाव सोलसहिं आयरक्खदेवसाहस्सीहिं अन्नेहि य बहूहिं सूरियाभविमाणवासीहिं वेमाणिएहिं देवेहिं देवीहि

य सद्धिं संपरिवुडे सव्विड्ढीए जाव नाइयरवेणं सोधम्मस्स कप्पस्स मज्झिमज्झेणं तं दिव्वं देविड्ढिं दिव्वं देवजुत्तिं दिव्वं देवाणुभावं उवदंसेमाणे-उवदंसेमाणे पडिजागरेमाणे-पडिजागरेमाणे ।

जेणेव सोहम्मस्स कप्पस्स उत्तरिल्ले निज्जाणमग्गे तेणेव उवागच्छति, उवागच्छित्ता जोयणसयसाहस्सिएहिं विग्गहेहिं ओवयमाणे वीतिवय-माणे ते उक्किट्ठाए जाव तिरियम-संखिज्जाणं दीव-
सूत्तं-१७

समुद्धानं मज्झिमज्झेणं वीतीवयमाणे-वीतीवयमाणे जेणेव नंदीसरवरे दीवे जेणेव दाहिण-पुरत्थिमिल्ले रतिकरपव्वए तेणेव उवागच्छइ उवागच्छित्ता तं दिव्वं देविड्ढिं [दिव्वं देवजुत्तिं] दिव्वं देवाणु-भावं पडिसाहरेमाणे-पडिसाहरेमाणे पडिसंखेवेमाणे-पडिसंखेवेमाणे ।

जेणेव जंबुद्वीवे दीवे जेणेव भारहे वासे जेणेव आमलकप्पा नयरी जेणेव अंबसालवणे चेइए जेणेव समणे भगवं महावीरे तेणेव उवागच्छइ उवागच्छित्ता समणं भगवं महावीरं तेणं दिव्वेणं जाणविमाणेणं तिक्खुत्तो आयाहिणं पयाहिणं करेइ करेत्ता समणस्स भगवओ महावीरस्स उत्तरपुरत्थिमे दिसीभागे तं दिव्वं जाणविमाणं ईसिं चउरंगुलमसंपत्तं धरणि-तलंसि ठवेई ठवेत्ता चउहिं अग्गमहिसीहिं सपरिवाराहिं दोहिं अणिएहिं य - गंधव्वाणिण य नट्टाणिण य सद्धिं संपरिवुडे-ताओ दिव्वाओ जाणविमाणाओ पुरत्थिमिल्लेणं तिसोवाणपडिरूवाणं पच्चोरूहति ।

तए णं तस्स सूरियाभस्स देवस्स चत्तारि सामाणियसाहस्सीओ ताओ दिव्वाओ जाण-विमाणाओ उत्तरिल्लेणं तिसो-वाणपडिरूवणं पच्चोरूहंति, अवसेसा देवा य देवीओ य ताओ दिव्वाओ जाणविमाणाओ दाहिणिल्लेणं तिसोवाणपडिरूवणं पच्चोरूहंति ।

तए णं से सूरियाभे देवे चउहिं अग्गमहिसीहिं जाव सोलसहिं आयर-कखदेव-साहस्सीहिं अण्णेहिं य बहूहिं सूरियाभविमाणवासीहिं वेमाणिएहिं देवेहिं देवीहि य सद्धिं संपरिवुडे सव्विड्ढीए जाव नाइयरवेणं जेणेव समणे भगवं महावीरे तेणेव उवागच्छति उवागच्छित्ता समणं भगवं महावीरं तिक्खुत्तो आयाहिणं पयाहिणं करेति करेत्ता वंदति नमंसति वंदित्ता नमंसित्ता एवं वयासी-अहण्णं भंते सूरियाभे देवे देवाणुप्पियं वंदामि नमंसामि जाव पज्जुवासामि ।

[१८] सूरियाभाइ समणे भगवं महावीरे सूरियाभं देवं एवं वयासी- पोरानमेयं सूरियाभा! जीयमेयं सूरियाभा! किच्चमेयं सूरियाभा! करणिज्जमेयं सूरियाभा! आहण्णमेयं सूरियाभा! अब्भणुण्णायमेयं सूरियाभा! जण्णं भवणवइ-वाणमंतर-जोइसवेमाणिया देवा अरहंते भगवंते वंदंति नमंसंति वंदित्ता नमंसित्ता तओ पच्छा साइं-साइं नाम-गोत्ताइं साहंति, तं पोरानमेयं सूरियाभा! जाव अब्भणुण्णायमेयं सूरियाभा ।

[१९] तए णं से सूरियाभे देवे समणेणं भगवया महावीरेणं एवं वुत्ते समाणे हट्ठ जाव समणं भगवं महावीरं वंदंति नमंसंति वंदित्ता नमंसित्ता नच्चासण्णे नातिदूरे सुस्सूसमाणे नमंसमाणे अभिमुहे विणएणं पंजलिउडे पज्जुवासति ।

[२०] तए णं समणे भगवं महावीरे सूरियाभस्स देवस्स तीसे य महतिमहालिया इसिपरि-साए जाव परिसा जामेव दिसिं पाउब्भूया तामेव दिसिं पडिगया ।

[२१] तए णं से सूरियाभे देवे समणस्स भगवओ महावीरस्स अंतिए धम्मं सोच्चा निसम्म हट्ठुट्ठ-जाव हियए उट्ठाए उट्ठेत्ति उट्ठेत्ता समणं भगवं महावीरं वंदइ नमंसइ वंदित्ता नमंसित्ता एवं वयासी अहण्णं भंते! सूरियाभे देवे किं भवसिद्धिए अभवसिद्धिए? सम्मदिट्ठी मिच्छदिट्ठी? परित्त-संसारिए

अनंतसंसारिए? सुलभबोहिए दुल्लभबोहिए? आराहए विराहए? चरिमे अचरिमे? सूरियाभाइ समणे भगवं महावीरे सूरियाभं देवं एवं वयासी- सूरियाभा! तुमण्णं भवसिद्धिए नो अभवसिद्धिए जाव चरिमे नो अचरिमे।

[२२] तए णं से सूरियाभे देवे समणेणं भगवया महावीरेणं एवं वुत्ते समाणे हट्ठुट्ठ-चित्तमाणंदिए पीडमणे परमसोमणस्सिए समणं भगवं महावीरं वंदति नमंसति वंदित्ता नमंसित्ता एवं सूत्तं-२२

वयासी- तुब्भे णं भंते सव्वं जाणह सव्वं पासह सव्वओ जाणह सव्वओ पासह सव्वं कालं जाणह सव्वं कालं पासह सव्वे भावे! जाणह सव्वे भावे पासह जाणंति णं देवाणुप्पिया मम पुव्विं वा पच्छा वा ममेयरूवं दिव्वं देवइडिं दिव्वं देवजुइं दिव्वं देवाणुभावं लद्धं पत्तं अभिसमण्णागयं ति, तं इच्छामि णं देवाणुप्पियाणं भत्तिपुव्वगं गोयमातियाणं समणाणं निग्गंथाणं दिव्वं देविइडिं दिव्वं देवजुइं दिव्वं देवाणुभावं दिव्वं बत्तीसतिबद्धं नट्टविहिं उवदंसित्तए ।

[२३] तए णं समणे भगवं महावीरे सूरियाभेणं देवेणं एवं वुत्ते समाणे सूरियाभस्स देवस्स एयमट्ठं नो आढाइ नो परियाणइ तुसिणीए संचिद्धति ।

तए णं से सूरियाभे देवे समणं भगवं महावीरं दोच्चं पि तच्चं पि एयं वयासी-तुब्भे णं भंते! सव्वं जाणह जाव उवदंसित्तए त्ति कट्ठु समणं भगवं महावीरं तिक्खुत्तो आयाहिणं पयाहिणं करेइ करेत्ता वंदति नमंसति वंदित्ता नमंसित्ता उत्तरपुरत्थिमं दिसीभागं अवक्कमति अवक्कमित्ता वेउव्विय-समुग्घाएणं समोहण्णइ समोहणित्ता संखेज्जाइं जोयणाइं दंडं निस्सरति निस्सरित्ता अहाबायरे पोग्गले० अहासुहुमे पोग्गले० दोच्चंपि वेउव्विय-समुग्घाएणं जाव बहुसमरमणिज्जं भूमिभागं विउव्वति, से जहानामए-आलिंणपुक्खरे इ वा जाव मणीणं फासो तस्स णं बहुसमरमणिज्जस्स भूमिभागस्स बहुमज्झ-देसभागे पिच्छाघरमंडवं विउव्वति, अनेगखंभसयसन्नि-विट्ठं वण्णओ अंतो बहुसमरमणिज्जं भूमिभागं विउव्वंति उल्लोयं अक्खाडगं च मणिपेढियं च विउव्वति ।

तीसे णं मणिपेढियाए उवरिं सीहासणं सपरिवारं जाव दामा चिट्ठंति । तए णं से सूरियाभे देवे समणस्स भगवतो महावीरस्स आलोए पणामं करेति करेत्ता अणुजाणउ मे भगवं ति कट्ठु सीहासण-वरगए तित्थयराभिमुहे सण्णिसण्णे तए णं से सूरियाभे देवे तप्पढमयाए नानामणिकणगरयणविमल-महरिह-निउण-ओविय-मिसिमिसैतवि-रचियमहाभरण-कडग-तुडियवरभूसणुज्जलं पीवरं पलंबं दाहिणं भुयं पसारेति ।

तओ णं सरिसयाणं सरित्तयाणं सरिच्चयाणं सरिसलावण्ण-रूव-जोव्वण-गुणोववेयाणं एगाभरण-वसणगहिय-णिज्जोयाणं दुहओ संवेल्लियग्गणियत्थाणं आविद्धं तिलयामेलाणं पिणद्धगेवेज्ज-कंचुयाणं उप्पीलिय-चित्तपट्ट-परियर-सफेणकावत्तरइय-संगय-पलंब-वत्थंत-चित्त-चिल्ललग-नियंसणाणं एगावलि-कंठरयइ-सोभंत-वच्छ-परिहत्थ-भूसणाणं अट्ठसंय नट्ट-सज्जाणं देवकुमाराणं निग्गच्छइ तयणंतरं च णं नानामणि जाव पीवरं पलंबं वामं भुयं पसारेति ।

तओ णं सरिसियाणं सरित्तयाणं सरिस लावण्ण-रूव-जोव्वण-गुणोववेयाणं एगाभरण-वसणगहिय-निज्जोयाणं दुहतोसंवेल्लियग्गनियत्थिणं आविद्धतिलया मेलाणं पिणद्धगेवेज्जकंचुईणं नानाम-णि-कणग-रयण-भूसण-विराइयंग-मंगीणं चंदाणणाणं चंदद्धसमनिलाडाणं चंदाहियसोमदंसणाणं उक्का इव

उज्जोवेमाणीणं सिंगारागारचारु-वेसाणं संगयागय-हसिय-भणिय-चिद्विय-विलासललिय-संलावनिउणजुत्तो-
वयारकुसलाणं गहियाउज्जाणं अट्टसयं नटट्सज्जाणं देवकुमारीणं निग्गच्छइ ।

तए णं से सूरियाभे देवे अट्टसयं संखाणं विउव्वइ अट्टसयं संखवायाणं विउव्वइ अट्टसयं
सिंगाणं विउव्वइ अट्टसयं सिंगवायाणं विउव्वइ अट्टसयं संखि-याणं विउव्वइ अट्टसयं संखियवायाणं विउव्वइ
अट्टसयं खरमुहीणं विउव्वइ अट्टसयं खरमुहिवायाणं विउव्वइ अट्टसयं पेयाणं विउव्वइ अट्टसयं पेयावायगाणं
विउव्वइ अट्टसयं पिरिपिरियाणं विउव्वइ अट्टसयं पिरिपिरियावायगाणं विउव्वइ
सूत्तं-२३

एवमाइयाइं एगूणपन्नं आउज्जविहाणाइं विउव्वइ विउव्वित्ता तए णं ते बहवे देवकुमारा य देवकुमारीओ य
सद्दावेति, तए णं ते बहवे देवकुमारा य देवकुमारीओ य सूरियाभेणं देवेणं सद्दाविया समाणा हट्ठ जाव
जेणेव सूरियाभे देवे तेणेव उवागच्छंति उवागच्छित्ता सूरियाभं देवं करयलपरिग्गहियं जाव वद्धावेत्ता एवं
वयासीसंदिसंतु णं देवाणुप्पिया! जं अम्हेहिं कायव्वं,

तए णं से सूरियाभे देवे ते बहवे देवकुमारा य देवकुमारीओ य एवं वयासी-गच्छह णं तुब्भे
देवाणुप्पिया! समणं भगवं महावीरं तिक्खुत्तो आयाहिणं पयाहिणं करेह करेत्ता वंदह नमंसह वंदित्ता
नमंसित्ता गोयमाइयाणं समणाणं निग्गंथाणं तं दिव्वं देविड्ढिं दिव्वं देवजुतिं दिव्वं देवाणुभावं दिव्वं
बत्तीसइबद्धं नट्टविहिं उवदंसेह उवदंसित्ता खिप्पामेव एयमाणत्तियं पच्चप्पिणह ।

तए णं ते बहवे देवकुमारा य देवकुमारीओ य सूरियाभेणं देवेणं एवं वुत्ता समाणा हट्ठ जाव
करयल जाव पडिसुणेंति पडिसुणित्ता जेणेव समणे भगवं महावीरे तेणेव उवागच्छंति उवागच्छित्ता समणं
भगवं महावीरं जाव नमंसित्ता जेणेव गोयमादिया समणा निग्गंथा तेणेव निग्गच्छंति ।

तए णं ते बहवे देवकुमारा य देवकुमारीओ य समामेव समोसरणं करेंति करेत्ता समामेव
पंतीओ बंधंति बंधित्ता समामेव ओणमंति ओणमित्ता समामेव उण्णमंति उण्णमित्ता एवं सहियामेव
ओणमंति ओणमित्ता सहियामेव उण्णमंति उण्णमित्ता संगयामेव ओणमंति ओणमित्ता संगयामेव
उण्णमंति उण्णमित्ता थिमियामेव ओणमंति ओणमित्ता थिमियामेव उण्णमंति उण्णमित्ता समामेव
पसरंति समामेव आउज्जविहाणाइं गेण्हंति गेण्हित्ता समामेव पवाएसु समामेव पगाइंसु समामेव पणच्चिंसु
किं ते?, उरेणं मंदं सिरेणं तारं कंठेणं वितारं तिविहं तिसमय-रेयग-रइयं गुंजावंककुहरोवगूढं रत्तं
तिट्ठाणकरणसुद्धं सकुहरगुंजंतवंस-तंती-तल-ताल-लय-गहसुसंपउत्तं महरं समं सललियं मनोहरं
मउरिभिपयसंचारं सुरइं सुणंति वरचारुरूवं दिव्वं नट्टसज्जं गेयं पगीया वि होत्था,

किं ते? अद्धमंताणं-संखाणं सिंगाणं संख्याणं खरमुहीणं पेयाणं परिपिरियाणं आहम्मंताणं
पणवाणं पडहाणं अप्फालिज्जमाणाणं-भंभाणं होरंभाणं तालिज्जंतीणं-भेरीणं झल्लरीणं दुंदुहीणं आलवंताणं-
मुरयाणं मुइंगाणं नंदीमुइंगाणं उत्तालिज्जंताणं-आलिंगाणं कुतुंबाणं गोमुहीणं मद्धलाणं मुच्छिज्जंताणं-
वीणाणं विपं-चीणं बल्लकीणं कुट्टिज्जंतीणं-महंतीणं कच्छभीणं चित्तवीणाणं सारिज्जंताणं-बद्धीसाणं
सुघोसाणं नंदिघोसाणं फुट्टिज्जंतीणं-भामरीणं छब्भामरीणं परिवायणीणं छिप्पंताणं-तूणाणं तुंबवीणाणं
आमोडिज्जंताणं-आमोताणं झंझाणं नउलाणं अच्छिज्जंतीणं मुंगुंदाणं हुडुक्कीणं विचिक्कीणं वाइज्जंताणं-
करडाणं डिंडिमाणं किणियाणं कडंबाणं ताडिज्जंताणं-दद्धरगाणं दद्धरिगाणं कुतुंबराणं कलसियाणं मड्डयाणं
आताडिज्जंताणं तलाणं तालाइणं कंसतालाणं घट्टिज्जंताणं रिंगिसियाणं लत्तियाणं मगरियाणं सुंसुमारिया-
णं फूमिज्जंताणं वंसाणं वेलूणं वालीणं परिलीणं बद्धगाणं ।

तए णं से दिव्वे गीए दिव्वे नट्टे दिव्वे वाइए एवं अब्भुए सिंगारे उराले मणुन्ने मनहरे गीए मनहरे नट्टे मनहरे वाइए उप्पिंजलभूते कहकहभूते दिव्वे देवरमणे पवत्ते यावि होत्था तए णं ते बहवे देवकुमारा य देवकुमारीओ य समणस्स भगवओ महावीरस्स सोत्थिय-जाव दप्पण-मंगल-भत्तिचित्तं नामं दिव्वं नट्टविधिं उवदंसेति ।

[२४] तए णं ते बहवे देवकुमारा य देवकुमारीओ य सममेव समोसरणं करेति करेत्ता तं चेव भाणियव्वं जाव दिव्वे देवरमणे पवत्ते यावि होत्था, तए णं ते बहवे देवकुमारा य देवकुमारीओ य समण-

सूत्तं-२४

स्स भगवओ महावीरस्स आवड-पच्चावड-सेढि-पसेढि-सोत्थिय-सोवत्थिय-पूसमाणव-वद्धमाणग-मच्छंडा-मगरंडा-जारा-मारा-फुल्लावलि-पउमपत्त-सागरतरंग-वसंतलता-पउमलय-भत्तिचित्तं नामं दिव्वं नट्टविधिं उवदंसेति एवं च एक्किक्कियाए नट्टिविहीए समोसरणादिया एसा वत्तव्वया जाव दिव्वे देवरमणे पवत्ते यावि होत्था ।

तए णं ते बहवे देवकुमार य देवकुमारियाओ य समणस्स भगवओ महावीरस्स ईहामिअ-उसभ-तुरग-नर-मगर-विहग-बालग-किन्नर-रुरु-सरभ-चमर-कुंजर-वणलय-पउमलयभत्तिचित्तं नामं दिव्वं नट्टविधिं उवदंसेति ।

एगओ वंकं एगओ खहं दुहओ खुहं एगओ चक्कवालं दुहओ चक्कवालं चक्कवद्ध चक्क-वालं नामं दिव्वं नट्टविधिं उवदंसेति ।

चंदावलिपविभत्तिं च सूरावलिपविभत्तिं च वलयावलिपविभत्तिं च हंसावलिपविभत्तिं च एगावलिपविभत्तिं च तारावलिपविभत्तिं च मुत्तावलिपविभत्तिं च कणगावलिपविभत्तिं च रयणावलिपविभत्तिं च आवलिपविभत्तिं च नामं दिव्वं नट्टविधिं उवदंसेति ।

चंदुग्गमणपविभत्तिं च सूरुग्गमणपविभत्तिं च उग्गमणुग्गमणपविभत्तिं च नामं दिव्वं नट्टविधिं उवदंसेति चंदागमणपविभत्तिं च सूरागमणपविभत्तिं च आगमणागमणपविभत्तिं च नामं दिव्वं नट्टविधिं उवदंसेति,

चंदावरणपविभत्तिं च सूरावरणपविभत्तिं च आवरणावरणपविभत्तिं च नामं दिव्वं नट्टविधिं उवदंसेति चंदत्थमणपविभत्तिं च सूरत्थमणपविभत्तिं च अत्थमणत्थमणपविभत्तिं च नामं दिव्वं नट्टविधिं उवदंसेति,

चंदमंडलपविभत्तिं च सूरमंडलपविभत्तिं च नागमंडलपविभत्तिं च जक्खमंडलपविभत्तिं च भूतमंडलपविभत्तिं च रक्खस-महोरग-गंधव्वमंडलपविभत्तिं च मंडलपविभत्तिं च नामं दिव्वं नट्टविधिं उवदंसेति,

उसभमंडलपविभत्तिं च सीहमंडलपविभत्तिं च हयविलंबियं गयविलंबियं हयविलसियं गयविलसियं मत्तहयविलसियं मत्तगयविलसियं मत्तहयविलंबियं मत्तगयविलंबियं दुयविलंबियं नामं दिव्वं नट्टविधिं उवदंसेति ।

सागरपविभत्तिं च नागरपविभत्तिं च सागरनागरपविभत्तिं च नामं दिव्वं नट्टविधिं उवदंसेति, नंदापविभत्तिं च चंपापविभत्तिं च नंदाचंपापविभत्तिं च नामं दिव्वं नट्टविधिं उवदंसेति,

मच्छंडापविभक्तिं च मयरंडापविभक्तिं च जारापविभक्तिं च मारापविभक्तिं च मच्छंडा-मयरंडा-जारा-मारापविभक्तिं च नामं दिक्वं नट्टविहिं उवदंसेति ।

कत्ति ककारपविभक्तिं चखत्ति खकारपविभक्तिं च ग त्ति गकारपविभक्तिं च घ त्ति घकार-पविभक्तिं च ङ त्ति ङकारपविभक्तिं च ककार-खकार-गकार-घकार-ङकार-पविभक्तिं च नामं दिक्वं नट्टविहिं उवदंसेति, एवं-चकारवग्गो वि टकारवग्गो वि तकारवग्गो वि पकारवग्गो वि ।

असोयपल्लवपविभक्तिं च अंब-पल्लवपविभक्तिं च जंबूपल्लवपविभक्तिं च कोसंबलपल्लवप-विभक्तिं च पल्लवपविभक्तिं च नामं दिक्वं नट्टवि-हिं उवदंसेति पउमलयापविभक्तिं जाव सामलयापविभक्तिं च लयापविभक्तिं च नामं दिक्वं नट्टविहिं उवदंसेति

सूत्तं-२४

दुयं नामं दिक्वं नट्टविहिं उवदंसेति, विलंबियं नामं दिक्वं नट्टविहिं उवदंसेति, दुयविलंबियं नामं दिक्वं नट्टविहिं उवदंसेति, अंचियं नामं दिक्वं नट्टविहिं उवदंसेति, रिभियं नामं दिक्वं नट्टविहिं उवदंसेति, अंचियरिभियं नामं दिक्वं नट्टविहिं उवदंसेति, आरभडं नामं दिक्वं नट्टविहिं उवदंसेति, भसोलं नामं दिक्वं नट्टविहिं उवदंसेति, आरभडभसोलं नामं दिक्वं नट्टविहिं उवदंसेति, उप्पायनिवायपसत्तं संकुचिय-पसारियं रियारियं भंतसंभतं नामं दिक्वं नट्टविहिं उवदंसेति ।

तए णं ते बहवे देवकुमारा य देवकुमारीओ य समामेव समोसरणं करेति जाव दिक्वे देवरमणे पवत्ते यावि होत्था, तए णं ते बहवे देवकुमारा य देवकुमारीओ य समणस्स भगवओ महावीरस्स चरमपुव्वभवनिबद्धं च चरमचवणनिबद्धं च चरमसाहरणनिबद्धं च चरम-जम्मणनिबद्धं च चरमअभिसे-अनिबद्धं च चरमबालभावनिबद्धं च चरमजोव्वणनिबद्धं च चरमकामभोगनिबद्धं च चरमनिक्खमणनिबद्धं च चरमतवचरणनिबद्धं च चरमनाणुप्पायनिबद्धं च चरमतित्थपवत्तणनिबद्धं च चरमपरिनिव्वाणनिबद्धं च चर-मनिबद्धं च नामं दिक्वं नट्टविहिं उवदंसेति ।

तए णं ते बहवे देवकुमारा य देवकुमारीओ य चउव्विहं वाइत्तं वाएति तं जहा- ततं विततं घणं सुसिरं, तए णं ते बहवे देवकुमारा य देवकुमारीयाओ च चउव्विहं गेयं गायंति तं जहा- उक्खित्तं पायंतं मंदायं रोइयावसाणं च ।

तए णं ते बहवे देवकुमारा य देवकुमारियाओ य चउव्विहं नट्टविहिं उवदंसेति तं जहा- अंचियं रिभियं आरभडं भसोलं च, तए णं ते बहवे देवकुमारा य देवकुमारियाओ य चउव्विहं अभिणयं अभिणेति तं जहा- दिट्ठंतियं पाडंतियं सामंतोविणिवाइयं लोगमज्झावसाणियं च, तए णं ते बहवे देवकुमारा य देवकुमारियाओ य गोयमा-दियाणं समणाणं निग्गंथाणं दिक्वं देविइडिं दिक्वं देवजुतिं दिक्वं देवाणुभावं दिक्वं बत्तीसइबद्धं नट्टविहिं उव-दंसित्ता समणं भगवं महावीरं तिक्खुत्तो आयाहिणं पयाहिणं करेइ करेत्ता वंदंति नमंसंति वंदित्ता नमंसित्ता जेणेव सूरियाभे देवे तेणेव उवागच्छंति उवा-गच्छित्ता सूरियाभं देवं करयलपरिग्गहियं जाव वद्धावेत्ता एयमाणत्तियं पच्चप्पिणंति ।

[२५] तए णं से सूरियाभे देवे तं दिक्वं देविइडिं दिक्वं देवजुइं दिक्वं देवाणुभावं पडिसाहरइ पडिसाहरेत्ता खणेणं जाते एगे एगभूए तए णं से सूरियाभे देवे समणं भगवं महावीरं तिक्खुत्तो आयाहिणं पयाहिणं करेइ वंदंति नंसंति वंदित्ता नमंसित्ता नियगपरिवालसद्धिं संपरिवुडे तमेव दिक्वं जाणविमाणं दुरुहति दुरुहित्ता जामेव दिसिं पाउब्भूए तामेव दिसिं पडिगए ।

[२६] भंतेति भयवं गोयमे समणं भगवं महावीरं वंदति नमंसति वंदित्ता नमंसित्ता एवं वयासी-सूरियाभस्स णं भंते! देवस्स एसा दिव्वा देविड्ढी दिव्वा देवज्जुती दिव्वे देवाणुभावे कहिं गते कहिं अनुप्पविट्ठे? गोयमा! सरीरं गए सरीरं अनुप्पविट्ठे,

से केणट्ठेणं भंते! एवं वुच्चइ-सरीरं गए सरीरं अनुप्पविट्ठे? गोयमा! से जहानामए कूडागारसाला सिया-दुहतो लित्ता गुत्ता गुत्तदुवारा निवाया निवायगंभीरा, तीसे णं कूडागारसालए अदूरसामंते एत्थ णं महेगे जणसमूहे चिट्ठति, तए णं से जणसमूहे एगं महं अब्भवद्दलगं वा वासवद्दलगं वा महावायं वा एज्जमाणं पासति पासित्ता तं कूडागारसालं अंतो अनुप्पविसित्ताणं चिट्ठइ, से तेणट्ठेणं गोयमा! एवं वुच्चति-सरीरं गए सरीरं अनुप्पविट्ठे ।

[२७] कहिं णं भंते! सूरियाभस्स देवस्स सूरियाभे नामं विमाणे पन्नत्ते? गोयमा! जंबुद्धीवे सूत्त-२७

दीवे मंदरस्स पव्वयस्स दाहिणेणं इमीसे रयणप्पभाए पुढवीए बहुसमरमणिज्जातो भूमिभागातो उड्ढं चंदिम-सूरिय-गहगण-नक्खत्त-तारारूवाणं पुरओ बहूइं जोयणाइं बहूइं जोयणसयाइं बहूइं जोयणसहस्साइं बहूइं जोयणसयसहस्साइं बहुईओ जोयणकोडीओ बहुईओ जोयणकोडाकोडीओ उड्ढं दूरं वीतीवइत्ता एत्थ णं सोहम्मं नामं कप्पे पन्नत्ते-पाईणपडीनायते उदीणदाहिणवित्थिण्णे अद्धचंदसंठाणसंठिते अच्चिमालि-भासरासिवण्णाभे असंखेज्जाओ जोयणकोडाकोडीओ आयामविक्खंभेणं असंखेज्जाओ जोयणकोडाकोडीओ परिकखेवेणं सव्वरयणामए अच्छे सण्हे जाव पडिरूवे एत्थ णं सोहम्माणं देवाणं बत्तीसं विमाणवाससय-सहस्साइं भवंति इति मक्खायं ते णं विमाणा सव्वरयणामया अच्छा जाव पडिरूवा ।

तेसिं णं विमाणाणं बहुमज्झदेसभाए पंच वडैंसया पन्नत्ता तं जहा- असोगवडैंसए सत्तवण्ण-वडैंसए चंपगवडैंसए चूयवडैंसए मज्झे सोहम्मवडैंसए, ते णं वडैंसगा सव्वरयणामया अच्छा जाव पडिरूवा, तस्स णं सोहम्मवडैंसगस्स महा-विमाणस्स पुरत्थिमेणं तिरियं असंखेज्जाइं जोयणसयसहस्साइं वीईवइत्ता एत्थ णं सूरियाभस्स देवस्स सूरियाभे नामं विमाणे पन्नत्ते, अद्धतेरस जोयणसयसहस्साइं आयाम-विक्खंभेणं गुणयालीसं च सयसहस्साइं बावन्नं च सहस्साइं अट्ठ य अडयाले जोयणसत्ते परिकखेणं, से णं एगेणं पागारेणं सव्वओ समंता संपरिक्खित्ते, से णं पागारे तिण्णि जोयणसयाइं उड्ढं उच्चत्तेणं मूले एगं जोयणसयं विक्खंभेणं मज्झे पन्नासं जोयणाइं विक्खंभेणं उप्पिं पणवीसं जोयणाइं विक्खंभेणं मूले वित्थिण्णे मज्झे संखित्ते उप्पिं तणुए गोपुच्छ-संठाणसंठिए सव्वरयणामए अच्छे जाव पडिरूवे ।

से णं पागारे नानाविहपंचवण्णेहिं कविसीसएहिं उवसोभिए, तं जहा- किण्हेहिं नीलेहिं लोहितेहिं हालिद्धेहिं सुक्किलेहिं कविसीसएहिं, ते णं कविसीसगा एगं जोयणं आयामेणं अद्धजोयणं विक्खं-भेणं देसूणं जोयण उड्ढं उच्चत्तेणं सव्वरयणामया अच्छा जाव पडिरूवा,

सूरियाभस्स णं विमाणस्स एगमे-गाए बाहाए दारसहस्सं-दारसहस्सं भवतीति मक्खायं, ते णं दारा पंच जोयणसयाइं उड्ढं उच्चत्तेणं अड्ढा-इज्जाइं जोयणसयाइं विक्खंभेणं तावइयं चेव पवेसेणं सेया वरकणगथूभियागा ईहामिय-उसभ-तुरग-नर-जाव पउमलय-भत्तिचित्ता खंभुग्गय-वइरवेइया-परिगयाभिरामा विज्जाहर-जमल-जुयल-जंतजुत्ता पिव अच्छी-सहस्समालणीया रूवगसहस्सकलिया भिसमाणा भिब्भिसमाणा चक्खुल्लोयणसलेसा सुहफासा सस्सिरीयरूवा वण्णो दाराणं तेसिं होइ तं जहा-

वडरामया निम्मा रिद्धमया पड्डाणा वेरुलियमया सूडखंभा जायरूवोव-चिय-पवरपंचवण्ण-मणिरयण-कोट्टिमतला हंसगब्भगया एलुया गोमेज्जमया इंदकीला लोहियक्खमईओ दारचेडाओ जोईर-समया उत्तरंगा लोहियक्खमईओ सूईओ वडरामया संधी नानामणिमया समुग्गया वडरामया अग्गला अग्गलपासाया रययमईओ आवत्तणपेढियाओ अंकुत्तरपासगा निरंतरियघणकवाडा भित्तीसु चेव भित्तिगुलिया छप्पन्न तिण्णि होंति गोमाणसिया तत्तिया नानामणिरयणवालरूवगं-लीलद्वियसाल-भंजियागा वडरामया कूडा रययामया उस्सेहा सव्वतवणिज्जमया उल्लोया नानामणिरयणजालपंजर-मणिवसंग-लोहियक्ख-पडिवसंग-रययभोमा अंकामया पक्खा पक्खाबाहाओ जोईरसमया वंसा वंसकवेल्लुयाओ रययामईओ पट्टियाओ जायरूवमईओ ओहाडणीओ वडरामईओ उवरिपुंछणीओ सव्वसेयरययामए छायेणे अंकमय-कणगकूडतवनिज्जथूभियागा सेया संखतल-विमल-निम्मल-दधिवण-गोखीरफेण-रययनिगरप्पगासा तिलग-रयणद्धचंदचित्ता नानामणिदामालंकिया अंतो बहिं च सण्हा तवणिज्ज-वालुया-पत्थडा सुहफासा सस्सिरीय-रूवा पासाईवा दरिसणिज्जा अभिरूवा पडिरूवा ।

सूत्तं-२८

[२८] तेसि णं दाराणं उभओ पासे दुहओ निसीहियाए सोलस-सोलस चंदणकलस-परिवाडीओ पन्नत्ताओ, ते णं चंदणकलसा वरकमलपड्डाणा सुरभिवरवारिपडिपुन्ना चंदणकयचच्चागा आविद्धकंठेगुणा पउमुप्पलपिधाणा सव्वरयणामया अच्छा जाव पडिरूवा महया-महया महिंद-कुंभसमाणा पन्नत्ता समणाउसो! तेसि णं दाराणं उभओ पासे दुहओ निसीहियाए सोलस-सोलस नागदंतपरिवाडीओ पन्नत्ताओ,

ते णं नागदंता मुत्ताजालंत-रुसियहेमजाल-गवक्खजाल-खिंखिणीघंटा-जाल-परिक्खित्ता अब्भुग्गया अभिनिसिद्धा तिरियं सुसंपग्गहिया अहेपन्नगद्धरूवगा पन्नगद्धसंठाणसंठिया सव्ववडरामया अच्छा जाव पडिरूवा महया-महया गयदंतसमाणा पन्नत्ता समणाउसो! तेसु णं नागदंतएसुं बहवे किण्हसुत्त-बद्धावट्ट वग्घारियमल्लदामकलावा नीलसुत्तबद्धा० लोहियतसुत्तबद्धा० हालिद्धसुत्तबद्धा० सुक्किलसुत्तबद्धा० ते णं दामा तवणिज्जलंबूसगा सुवण्णपयरमंडियगा जाव कण्णमणनिव्वुतिकरेणं सद्देणं ते पदेसे सव्वओ समंता आपूरेमाणा-आपूरेमाणा सिरीए अईव अईव उवसोभेमाणा चिट्ठंति ।

तेसिणं नागदंताणं उवरिं अन्नाओ सोलस सोलस नागदंत परिवाडीओ पन्नत्ता, ते णं नागदंता तं चेव जाव महता महता रायदंत समाणा पन्नत्ता समणाउसो, तेसु णं नागदंतएसु बहवे रययामया सिक्कगा पन्नत्ता, तेसु णं रययामएसु सिक्कएसु बहवे वेरुलियामईओ धूवघडीओ पन्नत्ताओ, ताओ णं धूवघडीओ कालागरु-पवर-कुंदुरुक्क-तुरुक्क-धूव-मघमघंत-गंधुदुयभिरामो सुगंधवरगंधियातो गंधवट्ठिभूयाओ ओरालेणं मणुण्णेणं मणहरेणं घाणमण निव्वुडिकरेणं गंधेणं ते पदेसे सव्वओ समंता जाव चिट्ठंति ।

[२९] तेसिं णं दाराणं उभओ पासे दुहओ निसीहियाए सोलस-सोलस सालभंजिया परिवा-डीओ पन्नत्ताओ, ताओ णं सालभंजियाओ लीलद्वियाओ सुपड्डियाओ सुअलंकियाओ नानाविहरागव-सणाओ नानामल्लपिणद्धाओ मुट्ठिगेज्झसुमज्झाओ आमेलग-जमल-जुयल-वट्ठिय-अब्भुण्णय-पीणरइय-संठियपओहराओ रत्तावंगाओ असियकेसीओ मिउविसय-पसत्थ-लक्खण-संवेल्लियग्गसिरयाओ ईसिं असोग-वरपायवसमुट्ठियाओ वामहत्थग्ग-हियग्गसालाओ ईसिं अद्धच्छिक्कडक्खचिट्ठितेहिं लूसमाणीओ विव चक्खुल्लोयणलेसेहिं अन्नमन्नं खिज्जमाणीओ विव पुढविपरिणामाओ सासयभावमुवगयाओ चंदाननाओ

चंदविलासिणीओ चंदद्वसमनिडालाओ चंदाहियसोमदंसणाओ उक्का विव उज्जोवेमाणाओ विज्जु-घण-मिरिय-सूर-दिप्पंत-तेय-अहिययर-सन्निकासाओ सिंगारागारचारुवेसाओ पासाईयाओ जाव चिट्ठंति ।

तेसि णं दाराणं उभओ पासे दुहओ निसीहियाए सोलस-सोलस जालकडग-परिवाडीओ पन्नत्ता, ते णं जालकडगा सव्वरयणामया अच्छा जाव पडिरूवा । तेसि णं दाराणं उभओ पासे दुहाओ निसीहियाए सोलस-सोलस घंटापरिवाडीओ पन्नत्ताओ, तासि णं घंटाणं इमेयारूवे वण्णावासे पन्नत्ते, तं जहा- जंबूणयामईओ घंटाओ वइरामईओ लालाओ नानामणिमया घंटापासा तवणिज्जामईओ संखलाओ रययामयाओ रज्जूओ, ताओ णं घंटाओ ओहस्सराओ मेहस्सराओ हंसस्सराओ कुंचस्सराओ सीहस्सराओ दुंदुहिस्सराओ नंदिस्सराओ नंदिघोसाओ मंजुस्सराओ मंजुघोसाओ सुस्सराओ सुस्सरघोसाओ ओरालेणं मणुण्णेणं मनहरेणं कण्णमणनिव्वुतिकरेणं सद्देणं ते पदेसे सव्वओ समंता आपूरेमाणाओ-आपूरेमाणाओ जाव चिट्ठंति ।

तेसि णं दाराणं उभओ पासे दुहओ निसीहियाए सोलस-सोलस वणमाला-परिवाडीओ
सूत्तं-२९

पन्नत्ताओ, ताओ णं वणमालाओ नाणामणिमय-दुमलय-किसलय-पल्लव-समाउलाओ छप्पयपरिभुज्जमाण-सोहंत-सस्सिरीयाओ पासाईयाओ ।

तेसिं णं दाराणं उभओ पासे दुहओ निसीहियाए सोलस-सोलस पगंठगा पन्नत्ता, ते णं पगंठगा अड्ढाड्ढाज्जाइं जोयणसयाइं आयाम-विक्खंभेणं पणवीसं जोयणसयं बाहल्लेणं सव्ववइरामया अच्छा जाव पडिरूवा ।

तेसिं णं पगंठगाणं उवरिं पत्तेयं-पत्तेयं पासायवडैंसगा पन्नत्ता, ते णं पासायवडैंसगा अड्ढाड्ढाज्जाइं जोयणसयाइं उड्ढं उच्चत्तेणं पणवीसं जोयणसयं विक्खंभेणं अब्भुग्गमूसिय-पहसिया इव विविहमणिरयणभत्तिचित्ता वाउद्धुयविजयवेजयंतीपडाग-च्छत्ताइच्छत्तकलिया तुंगा गगणतलमणुलिहंतसिहा जालंतररयणं पंजरुम्मिलियव्व मणिक-णगथूभियागा वियसियसयवत्त पोंडरीयं-तिलगरयणद्धचंदचिहरा नाना-मणिदामा लंकिया अंतो बहिं च सण्हा तवणिज्जवाल्यापत्थडा सुहफासा सस्सिरीयरूवा पासादीया दरिस-णिज्जा जाव दामा उवेरिं पगंठगाणं झया छत्ताइछत्ता ।

तेसि णं दाराणं उभओ पासे दुहओ निसीहियाए सोलस-सोलस तोरणा पन्नत्ता, नाणामणि-मया नानामणिमएसु खंभेसु उवणिविडंसन्निविद्धा जाव पउमहत्थगा, तेसि णं तोरणाणं पुरओ दो दो सालभंजियाओ पन्नत्ताओ जहा- हेड्डा तहेव तेसि णं तोरणाणं पुरओ नागदंतगा पन्नत्ता जहा- हेड्डा जाव दामा ।

तेसि णं तोरणाणं पुरओ दो दो हयसंघाडा गयसंघाडा नरसंघाडा किन्नरसंघाडा किंपुरिसंघाडा महोरगसंघाडा गंधव्वसंघाडा उसभसंघाडा सव्वरयणामया अच्छा जाव पडिरूवा, एवं वीहीपंतीओ मिहुणाइं ।

तेसि णं तोरणाणं पुरओ दो दो पउमलयाओ जाव दो दो सामलयाओ निच्चं कुसुमियाओ जाव सव्वरयणामईओ अच्छाओ जाव पडिरूवाओ ।

तेसि णं तोरणाणं पुरओ दो दो दिसासोवत्थिया पन्नत्ता, सव्वरयणामया अच्छा जाव पडि-रूवा, तेसिं णं तोरणाणं पुरओ दो दो चंदणकलसा पन्नत्ता, ते णं चंदणकलसा वरकमलपड्डाणा तहेव ।

तेसि णं तोरणाणं पुरओ दो दो भिंगारा पन्नत्ता, ते णं भिंगारा वरकमलपड्डाणा जाव महया मत्तगयमहामुहाकतिसमाणा पन्नत्ता समणाउसो! तेसि णं तोरणाणं पुरओ दो दो आयंसा पन्नत्ता,

तेसि णं आयंसाणं इमेयारूवे वण्णावासो पन्नत्ते तं जहा- तवणिज्जमया पगंठगा वेरुलियमया सुरया वइरामया दोवारंगा नानामणिमया मंडला अनुग्घिसितनिम्मलाए छायाए समणुबद्धा चंदमंडलपडिणिकासा महया-महया अद्धकायसमाणा पन्नत्ता समणाउसो!

तेसि णं तोरणाणं पुरओ दो दो वइरनाभाथाला पन्नत्ता-अच्छ-तिच्छडियसालि-तंदुल-नहसंदिद्ध-पडिपुन्ना इव चिट्ठंति सव्वजंबूणयमया अच्छा जाव पडिरूवा महया-महया रयचक्कसमाणा पन्नत्ता समणाउसो! तेसि णं तोरणाणं पुरओ दो दो पातीओ पन्नत्ताओ, ताओ णं पातीओ अच्छोदग-परिहत्थाओ नानामणिपंचवन्नस्स फलहरियगस्स बहुपडिपुन्नाओ विव चिट्ठंति सव्व रयणामईओ अच्छाओ जाव पडिरूवाओ महया-महया गोक-लिंजगचक्कसमाणीओ पन्नत्ताओ समणाउसो ।

तेसि णं तोरणाणं पुरओ दो दो सुपइड्डगा पन्नत्ता नानाविहभंडविरइया च इव चिट्ठंति सव्वरयणामया अच्छा जाव पडिरूवा, तेसि णं तोरणाणं पुरओ दो दो मणोगुलियाओ पन्नत्ताओ, तासु णं मणोगुलियासु बहवे सुवण्णरुप्पमया फलगा पन्नत्ता, तेसु णं सुवण्णरुप्पमएसु फलगेसु बहवे वइरामया सूत्तं-२९

नागदंतया पन्नत्ता, तेसु णं वइरामएसु नागदंतएसु बहवे वइरामया सिक्कगा पन्नत्ता, तेसु णं वइरामएसु सिक्कगेसु बहवे वायकरगा पन्नत्ता ते णं वायकारगा किण्हसत्तुसिक्कग-गवच्छिया नीलसुत्तसिक्कग-गवच्छिया लोहिय-सुत्तसिक्कग-गवच्छिया हालिदसुत्तसिक्कग-गवच्छिया सुक्किलसुत्तसिक्कग-गवच्छिया सव्वे वेरुलियमया अच्छा जाव पडिरूवा ।

तेसि णं तोरणाणं पुरओ दो दो चित्ता रयणकरंडगा पन्नत्ता, से जहानामए रण्णो चाउरंत-चक्कवट्ठिस्स चित्ते रयणकरंडए वेरुलियमणि-फालियपडल-पच्चोयडे साए पहाए ते पएसे सव्वतो समंता ओभासेति उज्जोवेति तावेति पभासेति एवमेव तेवि चित्ता रयणकरंडगा साए पभाए ते पएसे सव्वओ समंता ओभासेति उज्जोवेति तावेति पभासेति ।

तेसि णं तोरणाणं पुरओ दो दो हयकंठा गयकंठा नरकंठा किन्नरकंठा किंपुरिसकंठा मोहरगकंठा गंधव्वकंठा उसभकंठा सव्वरयणामया अच्छा जाव पडिरूवा ।

तेसि णं तोरणाणं पुरओ दो दो पुप्फचंगेरीओ मल्लचंगेरीओ चुण्णचंगेरीओ गंधचंगेरीओ वत्थचंगेरीओ आभरणचंगेरीओ सिद्धत्थचंगेरीओ लोमहत्थचंगेरीओ पन्नत्ताओ सव्वरयणामईओ अच्छाओ जाव पडिरूवाओ, तेसि णं तोरणाणं पुरओ दो दो पुप्फपडलगाइं जाव लोमहत्थपडलगाइं पन्नत्ताइं सव्वरयणामयाइं अच्छाइं जाव पडिरूवाइं ।

तेसि णं तोरणाणं पुरओ दो दो सीहासणा पन्नत्ता, तेसि णं सीहासणाणं वण्णओ जाव दामा, तेसि णं तोरणाणं पुरओ दो दो रुप्पमया छत्ता पन्नत्ता, ते णं छत्ता वेरुलियविमलदंडा जंबूणय-कण्मिया वइरसंधी मुत्ताजालपरिगया अट्टसहस्सवरकंचण-सलागा दद्धरमलय-सुगंधी-सव्वोउयसुरभि सीय-लच्छाया मंगलभत्तिचित्ता चंदागारोवमा ।

तेसि णं तोरणाणं पुरओ दो दो चामराओ पन्नत्ताओ, ताओ णं चामराओ चंदप्पभ-वेरुलिय-वइर-नाना-मणिरयणखचियचित्तदंडाओ नानामणि-कणग-रयण-विमल-हरिहत वणिज्जुज्जलविचित्त दंडाओ वल्लियाओ संखंक-कुंद-दगरय-अमय-महिये फणपुंज-सन्निगासातो सुहुमरययदी-हवालाओ सव्वरयणामईओ अच्छाओ जाव पडिरूवाओ ।

तेसिं णं तोरणाणं पुरओ दो दो तेल्लसमुग्गा कोडुसमुग्गा पत्तसमुग्गा चोयगसमुग्गा तगरसमुग्गा एलास-मुग्गा हरियालसमुग्गा हिंगुलयसमुग्गा मणोसिलायसमुग्गा अंजणसमुग्गा सव्वरयणा-मया अच्छा जाव पडिरूवा ।

[३०] सूरियाभे णं विमाणे एगमेगे दारे अट्ठसयं चक्कज्झयाणं एवं मिगज्झयाणं गरुडज्झयाणं छत्तज्झयाणं पिच्छज्झयाणं सउणिज्झयाणं सिंहज्झयाणं उसभज्झयाणं अट्ठसयं सेयाणं चउ-विसाणाणं नागवरकेऊणं एवामेव सपुव्वावरेणं सूरियाभे विमाणे एगमेगे दारे असीयं केउसहस्सं भवति इति मक्खायं, तेसिं णं दाराणं एगमेगे दारे पन्नट्ठिं-पन्नट्ठिं भोमा पन्नत्ता तेसिं णं भोमाणं भूमिभागा उल्लोया य भाणियव्वा ।

तेसिं णं भोमाणं बहुमज्झदेसभागे पत्तेय पत्तेयं सीहासणे पन्नत्ते, सीहासण-वण्णओ सपरिवारो, अवसेसेसु भोमेसु पत्तेयं-पत्तेयं सीहासणे पन्नत्ते । तेसिं णं दाराणं उत्तम्मरागारा सोलसविहेहिं रयणेहिं उवसोभिया, तं जहा- रयणेहिं जाव रिट्ठेहिं, तेसिं णं दाराणं उप्पिं अट्ठ मंगलगा [पन्नत्ता] सझया जाव छत्तातिछत्ता एवामेव सपुव्वावरेणं सूरियाभे विमाणे चत्तारि दारसहस्सा भवंतीतिमक्खायं,

सूत्तं-३०

सूरियाभस्स विमाणस्स चउद्विसिं पंच जोयणसयाइं अबाहाए चत्तारि वणसंडा पन्नत्ता, तं जहा- पुरत्थिमेणं असोगवणे दाहिणेणं सत्तवण्णवणे पच्चत्थिमेणं चंपगवणे उत्तरेणं चूयवणे, ते णं वणसंडा साइरेगाइं अद्धतेरस जोयणसयसहस्साइं आयामेणं पंच जोयणसयाइं विक्खंभेणं पत्तेयं पत्तेयं पागारपरिखित्ता किण्हा किण्होभासो जाव वणसंडवण्णओ ।

[३१] तेसिं णं वणसंडाणं अंतो बहुसमरणज्जा भूमिभागा पन्नत्ता, से जहानामए आलिङ्ग-पुक्खरेति वा जाव नानाविह पंचवण्णेहिं मणीहिं य तणेहिं य उवसोभिया, तेसिं णं गंधो फासो नायव्वो जहक्कमं, तेसिं णं भंते! तणाण य मणीण य पुव्वावरदाहिणुत्तरागतेहिं वातेहिं मंदायं-मंदायं एइयाणं वेइयाणं कंपियाणं चालियाणं फंदियाणं घट्टियाणं खोभियाणं उदीरियाणं केरिसए सद्धे भवइ?

गोयमा! से जहानामए सीयाए वा संदमाणीए वा रहस्स वा सच्छत्तस्स सज्झयस्स सघटस्स सपडागस्स सतोरणवरस्स सनंदि-घोसस्स सखिंखिणिहेमजालपरिखित्तस्स हेमवय-चित्तविचित्त-तिणिस-कणग-णिज्जुत्त-दारुयायस्स सुसंपिण-द्वारकमंडल धुरागस्स कालायससुकयणेमिजंतकम्मस्स आइण्णवर-तुरगसुसंपउत्तस्स कुसलनरच्छेयसारहि-सुसंपग्गहियस्स सरसय-बत्तीस-तोण-परिमंडियस्स सकंकडावयंसगस्स सचाव-सर-पहरण-आवरण-भरिय-जोहजुज्झ सज्जस्स रायंगणंसि वा रायंतरेंसि वा रम्मंसि वा मणिकोट्टिमतलंसि अभिक्खणं-अभिक्खणं अभिघट्टिज्जमाणस्स उराला मणुण्णा मनोहरा कण्णमण-निव्वुइकरा सद्धा सव्वओ समंता अभिनिस्संवति, भवेयारूवे सिया? नो इण्ठे समद्धे ।

से जहानामए वेयालियवीणाए उत्तरमंदा-मुच्छियाए अंके सुपइट्टियाए कुसलनर-नारिसुसंप-ग्गहियाते चंदण सार-निम्मिय-कोण-परिघट्टियाए पुव्वरत्तावरत्तकालसमयंसि मंदायं-मंदायं एइयाए वेइयाए चालियाए घट्टियाए खोभियाए उदीरियाए ओराला मणुण्णा मनोहरा कण्णमण-निव्वुइकरा सद्धा सव्वओ समंता अभिनिस्संवति, भवेयारूवे सिया? नो इण्ठे समद्धे ।

से जहानामए किन्नराण वा किंपुरिसाण वा महोरगाण वा गंधव्वाण वा भद्दसाल-वनगयाणं वा नंदनवनगयाणं वा सोमनसवनगयाणं वा पंडगवनगयाणं वा हिमवंत-मलय-मंदरगिरि-गुहासमन्नागयाणं

वा एगओ सन्निहियाणं समागयाणं सन्निसन्नाणं समुव्विद्धाणं पमुइयपक्कीलियाणं गीयरइ-
गंधव्वहरिसियमणाणं गज्जं पज्जं कत्थं गेयं पयबद्धं पायबद्धं उक्खित्तायं पयत्तायं मंदायं रोइयावसाणं
सत्तसरसमन्नागयं अट्ठरससुसंपउत्तं छद्दोसविप्प-मुक्कं एक्कारसालंकारं अट्ठगुणोववेयं गुंजंतवंककुहरोवगूढं
रत्तं तिद्धाणकरणसुद्धं सकुहर-गुंजंत-वंसतंती तल ताल लय गह सुसंपउत्तं महरुं समं सुललिय मनोहरं
मउय रिभिय पयसंचारं सुणतिं वरचारु रूवं दिव्वं नट्ठं सज्जं गेयं पगीयाणं भवेयारूवे सिया हंता सिया ।

[३२] तेसि णं वणसंडाणं तत्थ तत्थ देसे तहिं तहिं बहूओ खुड्डा-खुड्डियाओ वावीओ
पुक्खरिणीओ दीहियाओ गुंजालियाओ सरसीओ सरपंतियाओ सरसरपंतियाओ बिलपंतियाओ अच्छाओ
सण्हाओ रययामयकूलाओ समतीराओ वयरामयपासाणाओ तवणिज्जतलाओ सुवण्ण-सुज्झ-रयय-वालुयाओ
वेरुलिय-मणि-फालिय-पडल-पच्चोयडाओ सुओयार-सुउत्ताराओ नाना-मणि-तित्थ-सुबद्धाओ चाउक्कोणाओ
आणुपुव्वसुजायवप्पगंभीरसीयलजलाओ संछन्नपत्तभिसमुणालाओ बहुउप्पल-कुमुय-नलिन-सुभग-सोगंधिय-
पोंडरीय-सयवत्त-सहस्सपत्त-केसरफुल्लोव-चियाओ छप्पयपरिभुज्जमाणकमलाओ अच्छविमलसलिलपुन्नाओ
अप्पेगइयाओ आसवोयगाओ अप्पेगइयाओ खोरोयगाओ अप्पेगइयाओ घओयगाओ अप्पेगइयाओ खीरोगया-
ओ अप्पेगइयाओ खोदोयगाओ अप्पेगइयाओ पगईए उयगरसेणं पन्नत्ताओ पासादीयाओ दरिसणिज्जाओ
सूत्तं-३२

अभिरूवाओ पडिरूवाओ ।

तासि णं खुड्डा-खुड्डियाणं वावीणं जाव बिल-पंतियाणं पत्तेयं-पत्तेयं चउद्धिसिं चत्तारि
तिसोपाणपडिरूवगा पन्नत्ता, तेसि णं तिसोपाणपडिरूवगाणं वण्णओ, तोरणाणं झया छत्ताइछत्ता य
नेयव्वा, तासि णं खुड्डाखुड्डियाणं वावीणं जाव बिलपंतियाणं तत्थ तत्थ देसे तहिं तहिं बहवे
उप्पायपव्वयगा नियइपव्वयगा जगईपव्वगा दारुइज्जपव्वयगा दगमंडवा दगमंचगा दगमालगा दगपासायगा
उसड्डा खुड्डखुड्डगा अंदोलगा पक्खंदोलगा सव्वरयणामया अच्छा जाव पडिरूवा ।

तेसु णं उप्पायपव्वएसु जाव पक्खंदोलएसु बहूइं हंसासणाइं कौंचासणाइं गरुलासणाइं
उण्णयासणाइं पणायासणाइं दीहासणाइं भद्दासणाइं पक्खासणाइं उसभासणाइं मगरासणाइं सीहासणाइं
पउमासणाइं दिसासोवत्थियासणाइं सव्वरयणामयाइं अच्छाइं जाव पडिरूवाइं ।

तेसु णं वणसंडेसु तत्थ तत्थ देसे तहिं तहिं बहवे आलिघरगा मालिघरगा कयलिघरगा
लयाघरगा अच्छणघरगा पिच्छणघरगा मज्जणघरगा मंडणघरगा पसाहणघरगा गब्भघरगा मोहणघरगा
सालघरगा जालघरगा चित्तघरगा कुसुमघरगा चित्तघरगा गंधव्वघरगा आयंसघरगा सव्वरयणामया चछा
जाव पडिरूवा ।

तेसु णं आलिघरगेसु जाव आयंसघरगेसु तहिं तहिं घरएसु बहूइं हंसासणाइं जाव दिसासोव-
त्थियासणाइं सव्वरयणामयाइं अच्छाइं जाव पडिरूवाइं ।

तेसु णं वणसंडेसु तत्थ तत्थ देसे तहिं तहिं बहवे जाइमंडवगा जूहियामंडवगा मल्लिया-
मंडवगा नवमालियमंडवगा वासं-तिमंडवगा दहिवासुयमंडवगा सूरिल्लिमंडवगा तंबोलियमंडवगा मुद्धिया-
मंडवगा नागलयामंडवगा अति-मुत्तलयामंडवगा आप्फोयामंडवगा मालुयमंडवगा सव्वरयणामय अच्छा जाव
पडिरूवा ।

तेसु णं जाइमंडवएसु जाव मालुयामंडवएसु बहवे पुढविसिलापट्टगा अप्पेगतिया हंसासण-
संठिया जाव अप्पेगतिया दिसासो-वत्थियासणसंठिया अण्णे य बहवे वरसयणासणविसिद्धसंठाण-संठिया

पुढविसिलापट्टगा पन्नत्ता समणा-उसो! आईणग-रूय-बूर-नवणीय-तूल-फासा सव्वरयणामया अच्छा जाव पडिरूवा ।

तत्थ णं बहवे वेमाणिया देवा य देवीओ य आसयंति सयंति चिद्धंति निसीयंति तुयद्धंति हसंति रमंति ललंति कीलंति किद्धंति मोहंति पुरा पोराणाणं सुचिण्णाणं सुपडिक्कंताणं सुभाणं कडाणं कम्माणं कल्लाणाणं कल्लाणं फलविवागं पच्चणुब्भवमाणा विहरंति ।

[३३] तेसि णं वणसंडाणं बहुमज्झदेसभाए पत्तेयं-पत्तेयं पासायवडेंसगा पन्नत्ता, ते णं पासायवडेंसगा पंच जोयणसयाइं उड्ढं उच्चत्तेणं अड्ढाइज्जाइं जोयणसयाइं विक्खंभेण अब्भुग्गयमूसिय-पहसिया इव तहेव बहुसमरमणिज्जभूमिभागो उल्लोओ सीहासणं सपरिवारं, तत्थं णं चत्तारि देवा महिड्ढिया जाव पलिओवमद्वितीया परिवसंति, तं जहा- असोए सत्तपन्ने चंपए चूए ।

सूरियाभस्स णं देवविमाणस्स अंतो बहुसमरमणिज्जे भूमिभागे पन्नत्ते तं जहा- वणसंडविहूणे जाव बहवे वेमाणिया देवा य देवीओ य आसयंति जाव विहरंति ।

तस्स णं बहुसमरमणिज्जस्स भूमिभागस्स बहुमज्झदेसे एत्थ णं महेगे उवागरियालयणे पन्नत्ते, एगं जोयणसयसहस्सं आयाम-विक्खंभेणं तिण्णि जोयणसयसहस्साइं सोलस सहस्साइं दोण्णि य सूत्तं-३३

सत्तावीसे जोयणसए तिन्नि य कोसे अट्ठावीसं च धणुसयं तेरस य अंगुलाइं अद्धंगुलं च किंचिविसेसूणं परिकखेवेणं जोयणं बाहल्लेणं सव्व जंबूणयामए अच्छे जाव पडिरूवे ।

[३४] से णं एगाए पउमवरवेइयाए एगेणं य वनसंडेणं सव्वओ समंता संपरिखित्ते, सा णं पउमवरवेइया अद्धजोयणं उड्ढं उच्चत्तेणं पंच धणुसयाइं विक्खंभेणं उवकारियलेणसमा परिकखेवेणं, तीसे णं पउमवरवेइयाए इमेयारूवे वण्णावासे पन्नत्ते तं जहा- वइरामया नेमा रिद्धामया पइट्ठाणा वेरुलियामया खंभा सुवण्णरूपमया फलगा लोहितक्खमईयो सूईओ वइरामया संधी नानामणिमया कलेवरा नानामणिमया कलेवरसंघाडगा नानामणिमया रूवा नानामणिमया रूवसंधाडगा अंकामया पक्खा पक्ख-बाहाओ जोईरसमया वंसा वंसकवेल्लुयाओ रययामईओ पट्टियाओ जायरूमईओ ओहाडणीओ वइरामईओ उवरिपुंछणीओ सव्वेसेयरययामए छायेणे ।

सा णं पउमवरवेइया एगमेगेणं हेमजालेणं एगमेगेणं गवक्खजा-लेणं एगमेगेणं खंखिणी-जालेणं एगमेगेणं घंटाजालेणं एगमेगेणं मुत्ताजालेणं एगमेगेणं मणिजालेणं एगमेगेणं कणगजालेणं एगमेगेणं रयणजालेणं एगमेगेणं पउमजालेणं सव्वतो समंता संपरिखित्ता ते णं जाला तवणि-ज्जलंबूसगा जाव उवसोभेमाणा उवसोभेमाणा चिद्धंति ।

तीसे णं पउमवरवेइयाए तत्थ तत्थ देसे तहिं तहिं बहवे हयसंघाडा जाव उसभसंघाडा सव्वरयणामया अच्छा जाव पडिरूवा पासादीया-४-जाव वीहीतो पंतीतो मिहुणाणि लयाओ ।

से केणट्ठेणं भंते! एवं वुच्चइ-पउमवरवेइया पउमवरवेइया? गोयमा! पउमवरवेइयाए णं तत्थ तत्थ देसे तहिं तहिं वेइयासु वेइयाबाहासु य वेइयफलएसु य वेइयपुडंतरेसु य खंभेएसु खंभबाहासु खंभसीसेसु खंभपुडंतरेसु सूईसु सूईमुखेसु सूईफलएसु सूईपुडंतरेसु पक्खेसु पक्खबाहासु पक्खपेरंतरेसु पक्खपुडंतरेसु बहुयाइं उप्पलाइं पउमाइं कुमुयाइं नलिणाइं सुभगाइं सोगंधियाइं पौंडरीयाइं महापौंडरीयाइं सयवत्ताइं सहस्सवत्ताइं सव्वरयणामयाइं अच्छाइं पडिरूवाइं महया वासिक्कच्छत्तसमाणाइं पन्नत्ताइं समणाउसो! से एएणं अट्ठेणं गोयमा! एवं वुच्चइ-पउमवरवेइया पउमवरवेइया,

पउमवरवेइया णं भंते किं सासया असासया? गोयमा! सिय सासया सिय असासया ।

से केणट्ठेणं भंते! एवं वुच्चइ-सिय सासया सिय असासया? गोयमा! दव्वट्ठयाए सासया वण्णपज्जेवेहिं गंधपज्जवेहिं रसपज्जवेहिं फासपज्जवेहिं असासया, से एएणट्ठेणं गोयमा! एवं वुच्चइ-सिय सासया सिया असासया ।

पउमवरवेइया णं भंते! कालओ केवचिरं होइ? गोयमा! न कयाति नासि न कयाति नत्थि न कयाति न भविस्सइ, भुविं च भवइ य भविस्सइ य, धुवा नियया सासया अक्खया अव्वया अवट्ठिया निच्चा पउमवरवेइया ।

सा णं पउमवरवेइया एगेणं वनसंडेणं सव्वओ समंता संपरिक्खित्ता, से णं वनसंडे देसूणाइं दो जोयणाइं चक्कवालविक्खंभेणं उवयारिया-लेणसमे परिक्खेवेणं, वणसंडवण्णओ भाणियव्वो जाव विहरंति।

तस्स णं उवयारिया-लेणस्स चउट्ठिसिं चत्तारि तिसोवाणपडिरूवगा पन्नत्ता वण्णओ तोरणा झया छत्ताइच्छत्ता, तस्स णं उवयारिया-लेणस्स उवरिं बहुसमरमणिज्जे भूमिभागे पन्नत्ते जाव मणीणं फासो ।

सूत्तं-३५

[३५] तस्स णं बहुसमरमस्स भूमिभागस्स बहुमज्झदेसभाए एत्थ णं महेगे मूलपासाय-वडेंसए पन्नत्ते, से णं मूलपासायवडेंसते पंच जोयणसयाइं उड्ढं उच्चत्तेणं अड्ढाइज्जाइं जोयणसयाइं विक्खंभेणं अब्भुग्गयमूसिय वण्णो भूमिभागो उल्लोओ सीहासणं सपरिवारं भाणियव्वं, अट्ठ मंगलगा झया छत्ताइच्छत्ता, से णं मूलपासायवडेंसगे अण्णेहिं चउहिं पासायवडेंसएहिं तयद्धुच्चत्तप्पमाणमेत्तेहिं सव्वतो समंता संपरिक्खित्ते, ते णं पासायवडेंसगा अड्ढाइज्जाइं जोयणसयाइं उड्ढं उच्चत्तेणं पणवीसं जोयणसयं विक्खंभेणं अब्भुग्गयमूसिय जाव वण्णओ भूमिभागो उल्लोओ सीहासणं सपरिवारं भाणियव्वं, अट्ठ मंगलगा झया छत्ताइच्छत्ता ।

ते पासायवडेंसया अण्णेहिं चउहिं पासायवडेंसएहिं तयद्धुच्चत्तप्पमाणमेत्तेहिं सव्वओ समंता संपरिक्खित्ता, ते णं पासावडेंसया पणवीसं जोयणसयं उड्ढं उच्चत्तेणं बावट्ठिं जोयणाइं अट्ठ-जोयणं च विक्खंभेणं अब्भुग्गयमूसिया वण्णओ भूमिभागो उल्लोओ सीहासणं सपरिवारं भाणियव्वं, अट्ठ मंगलगा झया छत्ताइच्छत्ता ।

[३६] तस्स णं मूलपासयवडेंसयस्स उत्तरपुरत्थिमेणं एत्थ णं सभा सुहम्मा पन्नत्ता, एगं जोयणसयं आयामेणं पन्नासं जोयणाइं विक्खंभेणं बाबत्तरिं जोयणाइं उड्ढं उच्चत्तेणं अणेगखंभसयसन्नि-विट्ठा जाव अच्छरगणसंघसंविक्किण्णा दिव्वतुडियसद्धसंपणाइया अच्छा जाव पडिरूवा,

सभाए णं सुहम्माए तिदिसिं तओ दारा पन्नत्ता तं जहा- पुरत्थिमेणं दाहिणेणं उत्तरेणं, ते णं दारा सोलस जोयणाइं उड्ढं उच्चत्तेणं अट्ठ जोयणाइं विक्खंभेणं तावतियं चेव पवेसेणं सेया वरकणगथूभियागा जाव वणमालाओ, तेसि णं दाराणं उवरिं अट्ठ मंगलगा झया छत्ताइच्छत्ता, तेसि णं दाराणं पुरओ पत्तेयं-पत्तेयं मुहमंडवे पन्नत्ते, ते णं मुहमंडवा एगं जोयणसयं आयामेणं पन्नासं जोयणाइं विक्खंभेणं साइरेगाइं सोलस जोयणाइं उड्ढं उच्चत्तेणं वण्णओ सभाए सरिसो,

तेसि णं मुहमंडवाणं तिदिसिं ततो दारा प० तं जहा- पुरत्थिमेणं दाहिणेणं उत्तरेणं, ते णं दारा सोलस जोयणिं उड्ढं उच्चत्तेणं अट्ठ जोयणाइं विक्खंभेणं तावइयं चेव पवेसेणं सेया वरकणग थूभियागा जाव वणमालाओ ।

तेसि णं मुहमंडवाणं भूमिभागा उल्लोया, तेसि णं मुहमंडवाणं उवरिं अट्ठ मंगलगा झया छत्ताइछत्ता ।

तेसि णं मुहमंडवाणं पुरतो पत्तेयं-पत्तेयं पेच्छाघरमंडवे पन्नत्ते मुहमंडवत्तव्वया जाव दारा भूमिभागा उल्लोया ।

तेसि णं बहुसमरमणिज्जाणं भूमिभागाणं बहुमज्झदेसभाए पत्तेयं-पत्तेय वइरामए अक्खाडए पन्नत्ते, तेसि णं वइरामयाणं अक्खाडगाणं बहुमज्झदेसभागे पत्तेयं-पत्तेयं मणिपेढिया पन्नत्ता, ताओ णं मणिपेढियाओ अट्ठ जोयणाइं आयाम-विक्खंभेणं चत्तारि जोयणाइं बाहल्लेणं सव्वमणिमईओ अच्छाओ जाव पडिरूवाओ ।

तासि णं मणिपेढियाणं उवरिं पत्तेयं-पत्तेयं सीहासणे पन्नत्ते, सीहासणवण्णओ सपरिवारो, तेसि णं पेच्छाघरमंडवाणं उवरिं अट्ठ मंगलगा झया छत्तातिछत्ता ।

तेसि णं पेच्छाघरमंडवाणं पुरओ पत्तेयं पत्तेयं मणिपेढियाओ पन्नत्ताओ ताओ णं मणिपेढियाओ सोलस जोयणाइं आयामविक्खंभेणं अट्ठ जोयणाइं बाहल्लेणं सव्वमणिमईओ अच्छाओ
सूत्तं-३६

जाव पडिरूवाओ ।

तासि णं मणिपेढियाणं उवरिं-पत्तेयं-पत्तेयं चेइयथूभे पन्नत्ते, ते णं चेइयथूभा सोलस जोयणाइं आयामविक्खंभेणं साइरेगाइं लोसल जोयणाइं उड्ढं उच्चत्तेणं सेया संखं-कुंद-दगरय-अमय-महिय-फेमपुंजसन्निगासा सव्वरयणामया अच्छा जाव पडिरूवा । तेसि णं चेइयथूभाणं उवरिं अट्ठ मंगलगा झया छत्तातिछत्ता जाव सहस्सपत्तहत्थया

तेसिं णं चेइयथूभाणं पत्तेयं-पत्तेयं चउदिसिं मणिपेढियाओ पन्नत्ताओ, ताओ णं मणिपेढि-याओ अट्ठ जोयणाइं आयामविक्खंभेणं चत्तारि जोयणाइं बाहल्लेणं सव्वमणिमईओ अच्छाओ जाव पडिरूवाओ ।

तासि णं मणिपेढियाणं उवरिं चत्तारि जिणपडिमातो जिणुस्सेहपमाणमेत्ताओ पलियंकनि-सन्नाओ थूभाभिमुहीओ सन्निखित्ताओ चिद्वंति तं जहा- उसभा वद्धमाणा चंदाणणा वारिसेणा ।

तेसि णं चेइयथूभाणं पुरओ पत्तेयं-पत्तेयं मणिपेढियाओ पन्नत्ताओ, ताओ णं मणिपेढित्ताओ सोलस जोयणाइं आयामविक्खंभेणं अट्ठ जोयणाइं बाहल्लेणं सव्वमणिमईओ अच्छाओ जाव पडिरूवाओ ।

तासि णं मणिपेढियाणं उवरिं पत्तेयं-पत्तेयं चेइयरुक्खे पन्नत्ते, ते णं चेइयरुक्खा अट्ठ जोयणाइं उड्ढं उच्चत्तेणं अट्ठजोयणं उव्वेहेणं दो जोयणाइं खंधा अट्ठजोयणं विक्खंभेणं छ जोयणाइं विडिमा बहुमज्झदेसभाए अट्ठ जोयणाइं आयामविक्खंभेणं साइरेगाइं अट्ठ जोयणाइं सव्वग्गेणं पन्नत्ता,

तेसि णं चेइरुक्खाणं इमेयारूवे वण्णावासे पन्नत्ते तं जहा- वइरामयमूल-रययसुपइडिय-विडिमा रिट्ठामय-विउलकंद-वेरुलिय-रुइल खंधा सुजायवरजायरूपढमग विसालसाला नाणा-मणिमयरण-विविह-साहप्पसाह-वेरुलियपत्त-तवणिज्जपत्तबिंटा जंबूणय-रत्त-मउय-सुकुमाल-पवाल-पल्लव-वरंकुर-धारा

विचित्तमणिरयणसुरभि-कुसुम-फल-भर-नमियसाला सच्छया सप्पभा सस्सिरीया सउज्जोया अहियं नयणमननिव्वुडकरा अमयरससमरासफला पासादीया दरिसणिज्जा अभिरूवा पडिरूवा तेसि णं चेइय-रुक्खाणं उवरिं अट्ठमंगलगा झया छत्ताइछत्ता ।

तेसि णं चेइयरुक्खाणं पुरओ पत्तेयं-पत्तेयं मणिपेढिया पन्नत्ता, ताओ णं मणिपेढिया अट्ठ जोयणाइं आयाम-विकखंभेणं चत्तारि जोयणाइं बाहल्लेणं सव्वमणिमईओ अच्छाओ जाव पडिरूवाओ,

तासि णं मणिपेढियाणं उवरिं पत्तेयं-पत्तेयं महिंदज्झए पन्नत्ते, ते णं महिंदज्झया सट्ठिं जोयणाइं उड्ढं उच्चत्तेणं जोयणं उव्वेहेणं जोयणं विकखंभेणं वइरामय वट्ठ-लट्ठ-संठिय-सुसिलिट्ठ-परिघट्ठ-मट्ठ-सुपतिट्ठिया विसिट्ठा अणेगवरपंचवणमकुडभीसहस्स-परिमंडियाभिरामा वाउद्धुय विजय-वेजयंती-पडाग-छत्तातिच्छत्त-कलिया तुंगा गगणतलमणुलिहंतसिहरा पासादीया दरिसणिज्जा अभिरूवा पडिरूवा तेसि णं महिंदज्झयाणं उवरिं अट्ठमंगलगा झया छत्तातिछत्ता ।

तेसि णं महिंदज्झयाणं पुरतो पत्तेयं-पत्तेयं नंदा पुक्खरिणी पन्नत्ता, ताओ णं पुक्खरिणीओ एगं जोयणसयं आयामेणं पन्नासं जोयणाइं विकखंभेणं दस जोयणाइं उव्वेहेणं अच्छाओ जाव वण्णओ एगइयाओ उदगरसेणं पन्नत्ताओ, पत्तेयं-पत्तेयं पउमवरवेइयापरिक्खित्ताओ पत्तेयं-पत्तेयं वणसंडपरिक्खित्ताओ ।

तासि णं नंदाणं पुक्खरिणीणं तिदिसिं तिसोवाणपडिरूवगा पन्नत्ता, तिसोवाणपडिरूवगाणं वण्णओ, तोरणा झया छत्तातिछत्ता । सभाए णं सुहम्माए अडयालीसं मणोगुलियासाहस्सीओ पन्नत्ताओ तं जहा- पुरत्थिमेणं सोलससाहस्सीओ पच्चत्थिमेणं सोलससाहस्सीओ दाहिणेणं अट्ठसाहस्सीओ उत्तरेणं सूत्तं-३६

अट्ठासाहस्सीओ ।

तासु णं मणोगुलियासु बहवे सुवण्णरुप्पमया फलगा पन्नत्ता, तेसु णं सुवण्णरुप्पमएसु फलगेसु बहवे वइरामया नागदंतया पन्नत्ता, तेसु णं वइरामएसु नागदंतएसु किण्हसुत्तबद्ध वग्घारियमल्ल-दामकलावा चिट्ठंति, सभाए णं सुहम्माए अडयालीसं गोमाणसियासाहस्सीओ पन्नत्ताओ तं जहा- मणो-गुलिया जाव नागदंतया,

तेसु णं रययामएसु सिक्कगेसु बहवे वेरुलियामइओ धूवघडियाओ पन्नत्ताओ, ताओ णं धूवघडियाओ कालगरु-पवर जाव चिट्ठंति, सभाए णं सुहम्माए अंतो बहुसमरमणिज्जे भूमिभागे पन्नत्ते जाव मणीहिं उवसोभिए मणिफासो य उल्लोयओ ।

तस्स णं बहुसमरमणिज्जस्स भूमिभागस्स बहुमज्झ-देसभाए एत्थ णं महेगा मणिपेढीया पन्नत्ता सोलस जोयणाइं आयामविकखंभेणं अट्ठ जोयणाइं बाहल्लेणं सव्वमणिमई अच्छा जाव पडिरूवा ।

तीसे णं मणिपेढियाए उवरि एत्थ णं माणवए चेइयखंभे पन्नत्ते, सट्ठिं जोयणाइं उड्ढं उच्चत्तेणं जोयणं उव्वेहेणं जोयणं विकखंभेणं अडयालीसं अंसिए अडयाली संइकोडीए अडयालीसं सइ-विग्गहिए सेसं जहा- महिंदज्झयस्स, माणवगस्स णं चेइयखंभस्स उवरिं बारस जोयणाइं ओगाहेत्ता हेट्ठावि बारस जोयणाइं वज्जेत्ता मज्झे बत्तीसाए जोयणेसु एत्थ णं बहवे सुवण्णरुप्पमया फलगा पन्नत्ता, तेसु णं सुवण्णरुप्पमएसु फलएसु बहवे वइरामया नागदंता पन्नत्ता, तेसु णं वइरामएसु नागदंतेसु बहवे रययामया सिक्कगा पन्नत्ता, तेसु णं रययामएसु सिक्कएसु बहवे वइरामया गोलवट्ठसमुग्गया पन्नत्ता, तेसु णं वयरामेसु गोलवट्ठसमुग्गएसु बहयाओ जिण-सकहाओ संनिखित्ताओ चिट्ठंति,

ताओ णं सूरियाभस्स देवस्स अन्नेसिं च बहूणं देवाण य देवीण य अच्चणिज्जाओ जाव पज्जुवासणिज्जाओ माणवगस्स चेइयखंभस्स उवरिं अट्ठमं मंगलगा झया छत्ताइच्छत्ता ।

[३७] तस्स माणवगस्स चेइयखंभस्स पुरत्थिमेणं एत्थ णं महेगा मणिपेढिया पन्नत्ता, अट्ठ जोयणाइं आयामविक्खंभेणं चत्तारि जोयणाइं बाहल्लेणं सव्वमणिइं अच्छा जाव पडिरूवा, तीसे णं मणिपेढियाए उवरिं एत्थ णं महेगे सीहासणे पन्नत्ते, सीहासणं वण्णत्तो सपरिवारो,

तस्स णं माणवगस्स चेइयखंभस्स पच्चत्थिमेणं एत्थ णं महेगा मणिपेढिया पन्नत्ता- अट्ठजोयणाइं आयामविक्खंभेणं चत्तारि जोयणाइं बाहल्लेणं सव्वमणिमई अच्छा जाव पडिरूवा ।

तीसे णं मणिपेढियाए उवरिं एत्थ णं महेगे देवसयणिज्जे पन्नत्ते, तस्स णं देवसयणिज्ज-स्स इमेयारूवे वण्णावासे पन्नत्ते, तं जहा- नाणामणिमया पडिपाया सोवणिण्या पाया नाणामणिमयाइं पायसीसगाइं जंबूणयामयाइं गत्तगाइं नाणामणिमए विच्चे रययामई तूली तवणिज्जमया गंडोवहाणया लोहियक्खमया बिब्बोयणा, से णं देवसयणिज्जे सालिंगणवट्टिए उभओ बिब्बोयणे दुहओ उन्नत्ते मज्झे नयगंभीरे गंगापुलिणवाल्या उद्दालसालिसए सुविरइयरयत्ताणे ओवचिखोमदुगुल्लपट्ट-पडिच्छायणे रत्तंसुय-संवुए सुरम्मे आइणग-रूय-बूर-नवणीय-तूलफासे मउत्ते ।

[३८] तस्स णं देवसयणिज्जस्स उत्तरपुरत्थिमेणं महेगा मणिपेढिया पन्नत्ता, अट्ठ जोयणाइं आयाम विक्खंभेणं चत्तारि जोयणाइं बाहल्लेणं सव्वमणिमई अच्छा जाव पडिरूवा, तीसे णं मणिपेढियाए उवरिं एत्थ णं महेगे खुड्डए महिंदज्झए पन्नत्ते, सट्ठिं जोयणाइं उड्डं उच्चत्तेणं जोयणं उव्वेहेणं जोयणं विक्खंभेणं वड्डरामयवट्टलड्डसंठियसुसिलिड्ड-पडिरूवे, तस्स णं खुड्डामहिंदज्झयस्स सूत्तं-३८

उवरिं अट्ठमं मंगलगा झया छत्तातिच्छत्ता ।

तस्स णं खुड्डामहिंदज्झयस्स पच्चत्थिमेणं एत्थ णं सूरियाभस्स देवस्स महं एगे चोप्पाले नाम पहरणकोसे पन्नत्ते, सव्ववड्डरामए अच्छे जाव पडीरूवे, तत्थ णं सूरियाभस्स देवस्स फलिहरयण-खग्ग-गया-धणुप्पमुहा बहवे पहरणरयणा संनिखित्ता चिट्ठंति, उज्जला निसिया सुत्तिकखधारा पासादीया दरिसणिज्जा अभिरूवा पडिरूवा । सभाए णं सुहम्माए उवरिं अट्ठमं मंगलगा झया छत्तातिच्छत्ता ।

[३९] सभाए णं सुहम्माए उत्तरपुरत्थिमेणं एत्थ णं महेगे सिद्धायतणे पन्नत्ते, एगं जोयणसयं आयामेणं पन्नासं जोयणाइं विक्खंभेणं बावत्तरिं जोयणाइं उड्डं उच्चत्तेणं सभागमेणं जाव गोमाणसियाओ भूमिभागो उल्लोया तहेव,

तस्स णं सिद्धायतणस्स बहुमज्झदेसभाए एत्थ णं महेगा मणिपेढिया पन्नत्ता, सोलस जोयणाइं आयामविक्खंभेणं अट्ठ जोयणाइं बाहल्लेणं, तीसे णं मणिपेढियाए उवरिं एत्थ णं महेगे देवच्छंदए पन्नत्ते, सोलस जोयणाइं आयामविक्खंभेणं साइरेगाइं सोलस जोयणाइं उड्डं उच्चत्तेणं सव्वरयणामए अच्छे जाव पडिरूवे ।

तत्थ णं अट्ठसयं जिणपडिमाणं जिणुस्सेहप्पमाणमित्ताणं संनिखित्तं संचिट्ठति, तासि णं जिणपडिमाणं इमेयारूवे वण्णावासे पन्नत्ते तं जहा- तवणिज्जमया हत्थतलपायतला अंकामयाइं नक्खाइं अंतोलोहियक्खपडिसेगाइं कणगामईओ जंघाओ कणगामया जाणू कणगामया ऊरु कणगामईओ गायलट्ठीओ तवणिज्जमईओ नाभीओ रिट्ठामईओ रोमराईओ तवणिज्जमया चुचूया तवणिज्जमया सिरिवच्छा सिलप्पवालमया ओट्टा फालियामया दंता तवणिज्ज-मईओ जीहाओ तवणिज्जमया तालुया कणगामईओ

नासिगाओ अंतोलोहियक्खपडिसेगाओ अंकामयाणि अच्छीणि अंतोलोहियक्खपडिसेगाणि रिद्धामईओ ताराओ रिद्धामयाणि अच्छिपत्ताणि रिद्धामईओ भमुहाओ कणगामया कवोला कणगामया सवणा कणगाईओ निडालपट्टियाओ वडरामईओ सीसघडीओ तवणिज्जमईओ केसंतकेसभूमीओ रिद्धामया उवरि मुद्धया ।

तासि णं जिणपडिमाणं पिद्धतो पत्तेयं-पत्तेयं छत्तधारगपडिमाओ पन्नत्ताओ ताओ णं छत्तधारगपडिमाओ हिमरययकुंदेदुप्पगासाइं सकोरेटमल्लदामाइं-धवलाइं आयवत्ताइं सलीलं धारेमाणीओ-धारेमाणीओ चिद्धंति ।

तासि णं जिणपडिमाणं उभओ पासे पत्तेयं पत्तेयं दो दो चामरधारपडिमाओ पन्नत्ताओ, ताओ णं चामरधारपडिमाओ नानामणिकनगरयणविमलमहरिह जाव सलीलं धारेमाणीओ धारेमाणीओ चिद्धंता ।

तासि णं जिण-पडिमाणं पुरतो दो दो नागपडिमाओ जक्खपडिमाओ भूयपडिमाओ कुंडधारपडिमाओ संनिखित्ताओ चिद्धंति-सव्वरयणामईओ अच्छाओ जाव पडिरूवाओ,

तत्थ देवच्छंदए जिणपडिमाणं पुरतो अट्ठसयं घंटाणं अट्ठसयं चंदणकलसाणं अट्ठसयं भिंगाराणं एवं-आयंसाणं थालाणं पाईणं सुपड्ढाणं मणोगुलियाणं वायकरगाणं चित्ताणं रयणकरंडगाणं हयकंठाणं जाव उसभकंठाणं पुप्फचंगेरीणं जाव लोमहत्थचंगेरीणं पुप्फपडलगाणं जाव तेल्लसमुग्गाणं जाव अंजणसमुग्गाणं जाव अट्ठसयं धूवकडुच्छुयाणं संनिखित्तं चिद्धंति, तस्स णं सिद्धायतणस्स उवरिं अट्ठ-मंगलगा झया छत्तातिच्छत्ता ।

[४०] तस्स णं सिद्धायतणस्स उत्तरपुरत्थिमेणं एत्थ णं महेगा उववायसभा पन्नत्ता, जहा-
सूत्तं-४०

सभाए सुहम्माए तहेव जाव मणिपेढिया पन्नत्ता-अट्ठजोयणाइं देवसयणिज्जं तहेव सयणिज्जवण्णओ अट्ठ मंगलगा झया छत्तातिच्छत्ता ।

तीसे णं उववायसभाए उत्तरपुरत्थिमेणं एत्थ णं महेगे हरए पन्नत्ते-एगं जोयणसयं आयामेणं पन्नासं जोयणाइं विक्खंभेणं दस जोयणाइं उव्वेहेणं तहेव, से णं हरए एगाए पउमवरवेइयाए एगेणं वणसंडेणं सव्वओ समंता संपरिक्खित्ते पउमवरवेइयाए वणसंडवण्णओ तस्स णं हरयस्स तिदिसं तिसोवाणपडिरूवगा पन्नत्ता ।

तस्स णं हरयस्स उत्तरपुरत्थिमेणं एत्थ णं महेगा अभिसेगसभा पन्नत्ता, सुहम्मागमएणं जाव गोमाणसियाओ मणिपेढिया सीहासणं सपरिवारं जाव दामा चिद्धंति, तत्थ णं सूरियाभस्स देवस्स सुबहु अभिसेयभंडे संनिखित्ते चिद्धइ, अट्ठ मंगलगा तहेव तीसे णं अभिसेगसभाए उत्तरपुरत्थिमेणं एत्थ णं महेगा अलंकारियसभा पन्नत्ता, जहा- सभा सुधम्मा मणिपेढिया अट्ठ जोयणाइं सीहासणं सपरिवारं ।

तत्थ णं सूरियाभस्स देवस्स सुबहु अलंकारियभंडे संनिखित्ते चिद्धति, सेसं तहेव, तीसे णं अलंकारियसभाए उत्तरपुरच्छिमे णं एत्थ णं महेगा ववसायसभा पन्नत्ता, जहा उववायसभा जाव सीहासणं सपरिवार मणिपेढिया अट्ठ मंगलगा, तत्थ णं सूरियाभस्स देवस्स एत्थ णं महेगे पोत्थयरयणे सन्निखित्ते चिद्धइ, तस्स णं पोत्थयरयणस्स इमेयारूवे वण्णावासे पन्नत्ते तं जहा- रिद्धामईओ कंबिआओ तवणिज्जमए दोरे नानामणिमए गंठी अंकमयाइं पत्तइं वेरुलियमए लिप्पासणे तवणिज्जमई संकला रिद्धामए छादणे रिद्धमई मसी वडरामई लेहणी रिद्धामयाइं अक्खराइं धम्मिए सत्थे,

ववसायसभाए णं उवरिं अद्दु मंगलगा, तीसे णं ववसायसभाए उत्तरपुरत्थिमेणं महगे बलिपीढे पन्नत्ते-अद्दु जोयणाइं आयामविक्खंभेणं चत्तारि जोयणाइं बाहल्लेणं सव्वरयणामए अच्छे जाव पडिरूवे तस्स णं बलिपीढस्स उत्तरपुरत्थिमेण एत्थ णं महगा नंदा पुक्खरिणी पन्नत्ता हरयसरिसा तीसेणं नंदाणं पुक्खरिणीए उत्तरपुरच्छिमेणं महगे बलिपीढे पन्नत्ता सव्वरयणामए अच्छे जाव पडिरूवे ।

[४१] तेणं कालेणं तेणं समएणं से सूरियाभे देवे अहुणोववण्णमित्तए चेव समाणे पंच-विहाए पज्जत्तीए पज्जत्तिभावं गच्छइ तं जहा- आहारपज्जत्तीए सरीरपज्जत्तीए इंदियपज्जत्तीए आणपाण-पज्जत्तीए भासमणपज्जत्तीए,

तए णं तस्स सूरियाभस्स देवस्स पंचविहाए पज्जत्तीए पज्जत्तिभावं गयस्स समाणस्स इमेयारूवे अज्झत्थिए चिंतिए पत्थिए मणोगए संकप्पे समुपज्जित्था-किं मे पुत्विं करणिज्जं? किं मे पच्छा करणिज्जं? किं मे पुत्विं सेयं? किं मे पच्छा सेयं? किं मे पुत्विं पि पच्छा वि हियाए सुहाए खमाए निस्सेयसाए आनुगामियत्ताए भविस्सइ?

तए णं तस्स सूरियाभस्स देवस्स सामाणियपरिसोववण्णगा देवा सूरियाभस्स देवस्स इमेयारूवं अज्झत्थियं जाव समुप्पणं समभिजाणित्ता जेणेव सूरियाभे देवे तेणेव उवागच्छंति, सूरियाभं देवं करयलपरिग्गहियं जाव वद्धावेत्ति वद्धावेत्ता एवं वयासी-एवं खलु देवाणुप्पियाणं सूरियाभे विमाणे सिद्धायतणंसि जिणपडिमाणं जिणुस्सेहपमाणमेत्ताणं अद्दुसयं संनिखित्तं चिट्ठति, सभाए णं सुहम्माए माणवए चेइए खंभे वइरामएसु गोलवट्टसमुग्गएसु बहूओ जिण-सकहाओ संनिखित्ताओ चिट्ठंति ।

ताओ णं देवाणुप्पियाणं अण्णेसिं च बहूणं वेमाणियाणं देवाणं य देवीणं य अच्छणिज्जाओ सूत्तं-४१

जाव पज्जुवासणिज्जाओ, तं एयण्णं देवाणुप्पियाणं पुत्विं करणिज्जं, तं एयण्णं देवाणुप्पियाणं पच्छा करणिज्जं तं एयण्णं देवाणुप्पियाणं पुत्विं सेयं तं एयण्णं देवाणुप्पियाणं पच्छा सेयं तं एयण्णं देवाणुप्पियाणं पुत्विं पि पच्छा वि हियाए सुहाए खमाए निस्सेयसाए आनुगामियत्ताए भविस्सति ।

[४२] तए णं से सूरियाभे देवे तेसिं सामाणियपरिसोववण्णगाणं देवाणं अंतिए एयमद्दं सोच्चा निसम्म हट्ठतुद्द जाव हियाए सयणिज्जाओ अब्भुट्ठेति अब्भुट्ठेत्ता उवायसभाओ पुरत्थि-मिल्लेणं दारेणं निग्गच्छइ, जेणेव हरए तेणेव उवागच्छति उवागच्छित्ता हरयं अनुपयाहिणी करेमाणे-अनुपयाहिणी करेमाणे पुरत्थिमिल्लेणं तोरणेणं अनुपविसइ अनुपविसित्ता पुरत्थिमिल्लेणं तिसोवाणपडिरूएणं पच्चोरूहइ पच्चोरूहित्ता जलावगाहं करेइ करेत्ता जलमज्जणं करेइ करेत्ता जलकिड्डं करेइ करेत्ता जलाभिसेयं करेइ करेत्ता आयंते चोक्खे परमसूईभए हरयाओ पच्चोत्तरइ ।

पच्चोत्तरित्ता जेणेव अभिसेयसभा तेणेव उवागच्छति उवागच्छित्ता अभिसेयसभं अनुपयाहिणी करेमाणे-अनुपयाहिणी करेमाणे पुरत्थिमिल्लेणं दारेणं अनुपविसइ अनुपविसित्ता जेणेव सीहासणे तेणेव उवागच्छइ उवागच्छित्ता सीहासणवरगए पुरत्थाभिमुहे सणिसण्णे ।

तए णं सूरियाभस्स देवस्स सामाणिय परिसोववण्णगा देवा आभिओगिए देवे सद्दावेत्ति सद्दावेत्ता एवं वयासी-खिप्पामेव भो देवाणुप्पिया! सूरियाभस्स देवस्स महत्थं महग्घं महरिहं विउलं इंदाभिसेयं उवट्ठवेह ।

तए णं ते आभिओगिआ देवा सामाणिय परिसोववण्णेहिं देवेहिं एवं वुत्ता समाणा हट्ठा जाव हियया करयलपरिग्गहियं सिरसावत्तं मत्थए अंजलिं कट्ठु एवं देवो! तहत्ति आणाए विणएणं वयणं

पडिसुणेंति, पडिसुणित्ता उत्तरपुरत्थिमं दिसीभागं अवक्कमंति, अवक्क-मित्ता वेउव्वियसमुग्घाएणं समोहणंति समोहणित्ता संखेज्जाइं जोयणाइं दोच्चं पि वेउव्वियसमुग्घाएणं समोहणंति समोहणित्ता अट्ठसहस्सं सोवण्णियाणं कलसाणं अट्ठसहस्सं रुप्पमयाणं कलसाणं अट्ठसहस्सं-मणिमयाणं कलसाणं अट्ठसहस्सं सुवण्णरुप्पमयाणं कलसाणं अट्ठसहस्सं सुवण्णरुप्पमणिमयाणं कलसाणं अट्ठसहस्सं भोमिज्जाणं कलसाणं एवं भिंगाराणं आयंसाणं थालाणं पाईणं सुपतिट्ठाणं मणोगुलियाणं वायकरगाणं चित्ताणं रयणकरंडगाणं पुप्फचंगेरीणं जाव लोमहत्थचंगेरीणं पुप्फपडलगाणं जाव लोमहत्थपड-लगाणं सीहासणाणं छत्ताणं चामराणं तेल्लसमुग्गाणं जाव अंजणसमुग्गाणं अट्ठसहस्सं झयाणं अट्ठस-हस्सं धूवकडुच्छुयाणं विउव्वंति ।

विउव्वित्ता ते साभाविए य वेउव्विए य कलसे य जाव कडुच्छुए य गिण्हंति गिण्हित्ता सूरियाभाओ विमाणाओ पडिनिक्खमंति पडिनिक्खमित्ता ताए उक्किट्ठाए तुरियाए चवलाए जाव तिरियमसंखेज्जाणं वीतिवयमाणा-वीतिवयमाणा जेणेव खीरोदयसमुद्धे तेणेव उवागच्छंति उवागच्छित्ता खीरोयगं गिण्हंति गिण्हित्ता जाइं तत्थुप्पलाइं जाव सहस्सपत्ताइं ताइं गिण्हंति गिण्हित्ता जेणेव पुक्खरोदए समुद्धे तेणेव उवागच्छंति उवागच्छित्ता पुक्खरोदयं गेण्हंति गेण्हित्ता जाइं तत्थुप्पलाइं जाव सहस्सपत्ताइं ताइं गिण्हंति गिण्हित्ता जेणेव समयखेत्ते जेणेव भरहेरवयाइं वासाइं जेणेव मागहवरदामपभासाइं तित्थाइं तेणेव उवागच्छंति ।

उवागच्छित्ता तित्थोदगं गेण्हंति गेण्हित्ता तित्थमट्ठियं गेण्हंति गेण्हित्ता जेणेव गंगा सिंधू रत्ता रत्तवईओ महानईओ तेणेव उवागच्छित्ता सलिलोदगं गेण्हंति गेण्हित्ता उभओकूलमट्ठियं गेण्हंति सूत्तं-४२

गेण्हित्ता जेणेव चुल्लहिमवंतसिहरिवासहरपव्वया तेणेव उवागच्छंति उवागच्छित्ता सव्वतूयरे सव्वपुप्फे सव्वगंधे सव्वमल्ले सव्वोसहिसिद्धत्थए गेण्हंति गेण्हित्ता जेणेव पउम-पुंडरीयदहा तेणेव उवागच्छंति उवागच्छित्ता दहोदगं गेण्हंति गेण्हित्ता जाइं तत्थ उप्पलाइं जाव सहस्सपत्ताइं ताइं गेण्हंति गेण्हित्ता ।

जेणेव हेमवय-एरण्णवयाइं वासाइं जेणेव रोहियं-रोहियंस-सुवण्णकूल-रुप्पकूलाओ महानईओ तेणेव उवागच्छंति, उवागच्छित्ता सलिलोदगं गेण्हंति गेण्हित्ता उभओकूलमट्ठियं गेण्हंति गेण्हित्ता जेणेव सद्धावाति-वियडावाति-वट्ठवेयड्ढपव्वया तेणेव उवागच्छंति उवागच्छित्ता सव्वतूयरे तहेव जेणेव महाहिमवंत-रुप्पिवासहरपव्वया तेणेव उवागच्छंति तहेव जेणेव महापउम-महापुंरीयदहा तेणेव उवागच्छंति उवागच्छित्ता दहोदगं गेण्हंति गेण्हित्ता-

तहेव जेणेव हरिसवासरम्मगवासाइं जेणेव हरि-हरिकंत-नरनारिकंताओ महानईओ तेणेव उवागच्छंति जेणेव गंधावाति-मालवंतपरियागा वट्ठवेयड्ढपव्वया तेणेव उवागच्छंति तहेव जेणेव निसट्ठ नीलवंत वासधरपव्वया तहेव जेणेव तिगिच्छ-केसरीदहाओ तेणेव उवागच्छंति तहेव जेणेव पुव्वविदेहावर-विदेहवासिं जेणेव सीता-सीतोदाओ महानदीओ तेणेव उवागच्छंति जेणेव सव्वचक्कवट्ठिविजया जेणेव सव्वमागहवरदामपभासाइं तित्थाइं तेणेव उवागच्छंति उवागच्छित्ता तित्थोदगं गेण्हंति गेण्हित्ता तित्थमट्ठियं गेण्हंति गेण्हित्ता ।

जेणेव सव्वंतरनईओ जेणेव सव्ववक्खारपव्वया तेणेव उवागच्छंति उवागच्छित्ता सव्वतूयरे तहेव जेणेव मंदरे पव्वते जेणेव भट्ठसालवने तेणेव उवागच्छंति उवागच्छित्ता सव्वतूयरे सव्वगंधे सव्वमल्ले सव्वोसहिसिद्धत्थए य गेण्हंति गेण्हित्ता ।

जेणेव नंदनवने तेणेव उवागच्छंति उवागच्छित्ता सव्वतूयरे जाव सव्वोसहिसिद्धत्थए य सरसं च गोसीसचंदणं गिण्हंति गिण्हित्ता जेणेव सोमनसवने तेणेव उवागच्छंति उवागच्छित्ता सव्वतूयरे जाव सव्वोसहिसिद्धत्थए य सरसं च गोसीसचंदणं च दिव्वं च सुमनदामं गिण्हंति गिण्हित्ता जेणेव पंडगवणे तेणेव उवागच्छंति उवागच्छित्ता सव्वतूयरे जाव सव्वोसहिसिद्धत्थए च सरसं च गोसीसचंदणं च दिव्वं च सुमनदामं ददरमलयसुगंधियगंधे गिण्हंति गिण्हित्ता गतो मिलायंति मिलाइत्ता ताए उक्किट्ठाए जाव ।

जेणेव सोहम्मे कप्पे जेणेव सूरियाभविमाणे जेणेव अभिसेयसभा जेणेव सूरियामे देवे तेणेव उवागच्छंति उवागच्छित्ता सूरियाभं देवं करयलपरिग्गहियं सिरसावत्तं मत्थए अंजलिं कट्ठु जएणं विजएणं वद्धावेंति वद्धावेत्ता तं महत्थं महग्घं महरिहं विउलं इंदाभिसेयं उवट्ठवेंति ।

तए णं तं सूरियाभं देवं चत्तारि सामाणियसाहस्सीओ चत्तारि अग्गमहिसीओ सपरिवारातो तिण्णि परिसाओ सत्त अणियाओ सत्त अणियाहिवइणो जाव अण्णेवि बहवे सूरियाभविमाणवासिणो देवा य देवो य तेहिं साभाविएहिं य वेउव्विएहि य वरकमलपड्डाणेहिं सुरभिवर-वारिपडिपुन्नेहिं चंदणकयचच्चा-एहिं आविद्धकंठेगुणेहिं पउमुप्पलपिहाणेहिं सुकुमालकोमलकरयलपरिग्गहिएहिं अट्ठसहस्सेणं सोवण्णियाणं कलसाणं जाव अट्ठसहस्सेणं सुवण्णरुप्पमणिमयाणं कलसाणं अट्ठसहस्सेणं भोमिज्जाणं कलसाणं सव्वोदएहिं सव्वमट्ठियाहिं सव्वतूयरेहिं जाव सव्वोसहिसिद्धत्थएहिं य सव्विड्ढीए जाव नाइयरवेणं महया-महया इंदाभिसेएणं अभिसिंचंति ।

तए णं तस्स सूरियाभस्स देवस्स महया-महया इंदाभिसेए वट्ठमाणे-अप्पेगतिया देवा सूत्तं-४२

सूरियाभं विमाणं नच्चोयगं नातिमट्ठियं पविरल-फुसिय-रयरेणु-विणा-सणं दिव्वं सुरभिगंधोदग वासं वासंति, अप्पेगतिया देवा सूरियाभं विमाणं हयरयं नट्ठरयं भट्ठरयं उवसंत-रयं पसंतरयं करेंति ।

अप्पेगतिया देवा सूरियाभं विमाणं आसियसंमज्जिओवलित्तं सुइ-संमट्ठरत्थतराणवीहियं करेंति, अप्पेगतिया देवा सूरियाभं विमाणं मंचाइमंचकलियं करेंति, अप्पेगइया देवा सूरियाभं विमाणं नाणाविहरागोसिय झयपडागाइपडागमंडियं करेंति अप्पेगतिया देवा सूरियाभं विमाणं लाउल्लोइयमहियं गोसीससरसरत्त-चंदणददर-दिण्णपंचंगुलितलं करेंति, अप्पेगतिया देवा सूरियाभं विमाणं उवचियचंदणकलसं चंदण-घडसुकयतोरणपडिदुवारदेसभागं करेंति, अप्पेगतिया देवा सूरियाभं विमाणं आसत्तोसत्त-विउलवट्ठवग्घारियमल्लदामकलावं करेंति, अप्पेगतिया देवा सूरियाभं विमाणं पंचवण्णसुरभि-मुक्क-पुप्फपुंजोवयारकलियं करेंति, अप्पेगतिया देवा सूरियाभं विमाणं कालगरु-पवरकुंदुरुक्क-तरु-क्क-धूव-मघमघेंतगंधुदधुयाभिरामं करेंति ।

अप्पेगइया देवा सूरियाभं विमाणं सुगंधगंधियं गंधवट्ठिभूतं करेंति अप्पेगतिया देवा हिरण्णवासं वासंति सुवण्णवासं वासंति रयणवासं वासंति वइरवासं वासंति पुप्फवासं वासंति फलवासं वासंति मल्लवासं वासंति गंधवासं वासंति चुण्णवासं वासंति आभरणवासं वासंति अप्पेगइया देवा हिरण्णविहिं भाएतिं, एवं-सुवण्णविहिं रयणविहिं पुप्फविहिं फलविहिं मल्लविहिं गंधविहिं चुण्णविहिं वत्थविहिं आभरणविहिं भाएतिं, अप्पेगतिया देवा चउव्विहं वाइत्तं वाएति-ततं विततं घणं झुसिरं, अप्पेगइया देवा चउव्विहं गेयं गायंति तं जहा- उक्खित्तायं पायंत्तायं मंदायं रोइयावसाणं,

अप्पेगतिआ देवा दुयं नट्टविहिं उवदंसेति अप्पेगतिआ देवा विलंबियं नट्टविहिं उवदंसेति अप्पेगतिआ देवा दुतविलंबियं नट्टविहिं उवदंसेति, एवं अप्पेगतिआ अंचियं नट्टविहिं उवदंसेति । अप्पेगतिआ देवा रिभियं नट्टविहिं उवदंसेति अप्पेगइया देवा अंचिय-रिभियं नट्टविहिं उवदंसेति, अप्पेगइया देवा आरभडं नट्टविहिं उवदंसेति अप्पेगइया देवा भसोलं नट्टविहिं उवदंसेति अप्पेगइया देवा आरभड-भसोलं नट्टविहिं उवदंसेति, अप्पेगइया देवा उप्पायनिवायपसत्तं संकुचिय-पसारियं रियारियं भंत-संभंतं नामं दिव्वं नट्टविहिं उवदंसेति, अप्पेगतिआ देवा चउव्विहं अभिनयं अभिनयंति तं जहा- दिट्ठितियं पाडितियं सामन्नओविणिवाइयं लोगमज्झावसाणियं, अप्पेगतिआ देवा बुक्कारेति अप्पेगतिआ देवा पीणेति अप्पेगतिआ लासेति अप्पेगतिआ हक्कारेति, अप्पेगतिआ विणेति अप्पेगतिआ तंडवेति अप्पेगतिआ बुक्कारेति पीणेति लासेति तंडवेति,

अप्पेगतिआ अप्फोडेति अप्पेगतिआ वग्गंति अप्पेगतिआ तिवइं छिंदंति अप्पेगतिआ अप्फोडेति वग्गंति तिवइं छिंदंति, अप्पेगतिआ हयहेसियं करेति अप्पेगतिआ हत्थिगुलगुलाइयं करेति अप्पेगतिआ रहधणधणाइयं करेति अप्पेगतिआ हयहेसियं करेति हत्थिगुलगुलाइयं करेति अप्पेगतिआ हरधणगणाइं करेति अप्पेगतिआ उच्छोलेंति पच्छोलेंति अप्पेगतिआ उक्किट्ठियं करेति अप्पेगतिआ तिन्निवि करेति अप्पेगतिआ ओवयंति अप्पेगतिआ उप्पयंति अप्पेगतिआ परिवयंति अप्पेगइया तिण्णि वि, अप्पेगइया सीहनायं नयंति अप्पेगतिआ पददद्धयं करेति अप्पेगतिआ भूमिचवेडं दलयंति । अप्पेगतिआ तिण्णि वि ।

अप्पेगतिआ गज्जंति अप्पेगतिआ विज्जुयायंति अप्पेगइया वासं वासंति अप्पेगतिआ तिण्णि वि करेति, अप्पेगतिआ जलंति अप्पेगतिआ तवंति अप्पेगतिआ पतवेंति अप्पेगतिआ तिण्णि वि, सूत्तं-४२

अप्पेगतिआ हक्कारेति अप्पेगतिआ थुक्कारेति अप्पेगतिआ धक्कारेति अप्पेगतिआ साइं साइं नामाइं साहेति अप्पेगतिआ चत्तारि वि, अप्पेगतिआ देवसण्णिवायं करेति अप्पेगतिआ देवुज्जोयं करेति अप्पेगइया देवुक्कलियं करेति अप्पेगइया देवकहकहगं करेति अप्पेगतिआ देवदुहदुहगं करेति अप्पेगतिआ चेलुक्खेवं करेति अप्पेगइयादेवसण्णिवायं देवुज्जोयं देवुक्कलियं देवकहकहगं देवदुहदुहगं चेलुक्खेवं करेति, अप्पेगतिआ उप्पलहत्थगया जाव सहस्सपत्तहत्थगया अप्पेगतिआ चंदणकलसहत्थगया जाव धूवकडुच्छुय-हत्थगया हट्ठ तुट्ठ जाव हियया सव्वओ समंता आहावंति परिधावंति ।

तए णं तं सूरियाभं देवं चत्तारि सामाणियसाहस्सीओ जाव सोलस आयरक्खदेवसाहस्सीओ अण्णे य बहवे सूरियाभरायहाणिवत्थव्वा देवा य देवीओ य महया-महया इंदभिसेगेणं अभिसिंचंति अभि-सिंचित्ता पत्तेयं-पत्तेयं करयलपरिग्गहियं सिरसावत्तं मत्थए अंजलिं कट्ठु एवं वयासी-जय-जय नंदा जय-जय भद्दा जय-जय नंदा भद्दं ते अजियं जिणाहि जियं च पालेहिं जियमज्झे वसाहि-इंदो इव देवाणं जाव भरहो इव मणुयाणं-बहूइं पलिओवमाइं बहूइं सागरोवमाइं बहूइं पलिओवम-सागरोवमाइं चउण्हं सामाणियसाहस्सीणं जाव आयरक्खदेवसाहस्सीणं सूरियाभस्स विमाणस्स अन्नेसिं च बहूणं सूरियाभ-विमाणवासीणं देवाण य देवीण य आहेवच्चं जाव महया महया कारेमाणे पालेमाणे विहराहि त्ति कट्ठु जयजय सद्धं पउंजंति ।

तए णं से सूरियाभे देवे महया-महया इंदभिसेगेणं अभिसित्ते समाणे अभिसेयसभाओ पुरत्थिमिल्लेणं दारेणं निग्गच्छति निग्गच्छित्ता जेणेव अलंकारियसभा तेणेव उवागच्छति उवागच्छित्ता

अलंकारियसभं अनुपयाहिणी करेमाणे-अनुपयाहिणी करेमाणे अलंकारियसभं पुरत्थिमिल्लेणं दारेणं अनुपविसति अनुपविसित्ता जेणेव सीहासणे तेणेव उवागच्छति उवागच्छित्ता सीहासणवरगते पुरत्थाभिमुहे सण्णिसण्णे

तए णं तस्स सूरियाभस्स देवस्स सामाणियपरिसोववण्णगा देवा अलंकारियभंडं उवड्वेति, तए णं से सूरियाभे देवे तप्पढमयाए पम्हलसूमालाए सुरभीए गंधसकासाईए गायाइं लूहेति लूहेत्ता सरसेणं गोसीस-चंदणेणं गायाइं अनुलिंपति अनुलिंपित्ता नासानीसास-वाय-वोज्झं चक्खुहरं वण्णफरिसजुत्तं हयलाला-पेलवा-तिरेगं धवलं कणग-खचियंतकम्मं आगासफालिय-समप्पभं दिव्वं देवदूसजुयलं नियंसेति नियंसेत्ता हारं पिणिद्धेति पिणिद्धेत्ता अद्धहारं पिणिद्धेति पिणिद्धेत्ता एगावलिं पिणिद्धेति पिणिद्धेत्ता मुत्तावलिं पिणिद्धेति पिणिद्धेत्ता रयणावलिं पिणिद्धेति पिणिद्धेत्ता एवं-अंगयाइं केयूराइं कडगाइं तुडियाइं कडिसुत्तगं दसमु-द्वाणंतगं विकच्छसुत्तगं मुरविं कंठमुरविं पालंबं कुंडलाइं चूडामणिं चित्तरयणसंकडं मउडं-पिणिद्धेति पिणिद्धेत्ता गंधिम-वेढिम-पूरिम-संघाडमेण चउव्विहेणं मल्लेणं कप्परुक्खगं पिव अप्पाणं अलंकिय-विभूसियं करेइ करेत्ता दद्धरमलयसुगंधगंधिएहिं गायाइं भुखंडेति दिव्वं च सुमणदामं पिणिद्धेइ ।

[४३] तए णं से सूरियाभे देवे केसालंकारेणं मल्लालंकारेणं आभरणालंकारेणं वत्थालंकारेण-चउव्विहेणं अलंकारेणं अलंकियविभूसिए समाणे पडिपुन्नाणलंकारे सीहासणाओ अब्भुट्ठेति अब्भुट्ठेत्ता अलंकारियसभाओ पुरत्थिमिल्लेणं दारेणं पडिनिक्खमइ पडिनिक्खमित्ता जेणेव ववसायसभा तेणेव उवागच्छति ववसायसभं अनुपयाहिणीकरेमाणे-अनुपयाहिणीकरेमाणे पुरत्थिमिल्लेमं दारेणं अनुपविसति अनुपविसित्ता जेणेव सीहासणे तेणेव उवागच्छति उवागच्छित्ता सीहासणवरगत्ते पुरत्थाभिमुहे सण्णिसण्णे ।

तए णं तस्स सूरियाभस्स देवस्स सामाणियपरिसोववण्णगा देवा पोत्थयरयणं उवणंति, तए सूत्तं-४३

णं से सूरियाभे देवे पोत्थयरयणं गिण्हति गिण्हित्ता पोत्थयरयणं मुयइ मुइत्ता पोत्थयरयणं विहाडेइ विहाडित्ता पोत्थयरयणं वाएति वाएत्ता धम्मियं ववसायं ववसइ ववसइत्ता पोत्थयरयणं पडिनिक्खवइ पडिनिक्खवित्ता सीहासणातो अब्भुट्ठेति अब्भुट्ठेत्ता ववसायसभातो पुरत्थिमिल्लेणं दारेणं पडिनिक्खमइ पडिनिक्खमित्ता ।

जेणेव नंदा पुक्खरिणी तेणेव उवागच्छति उवागच्छित्ता नंदं पुक्खरिणिं पुरत्थिमिल्लेणं तोरणेणं तिसोवाणपडिरूवणं पच्चोरुहइ पच्चोरुहित्ता हत्थपादं पक्खालेति पक्खेलेत्ता आयंते चोक्खे परमसुईभूए एगं महं सेयं रययामयं विमलं सलिलपुन्नं मत्तगयमहामुहागितिसमाणं भिंगारं पगेण्हति पगेण्हित्ता जाइं तत्थ उप्पलाइं जाव सतसहस्सपत्ताइं ताइं गेण्हति गेण्हित्ता नंदातो पुक्खरिणीतो पच्चोत्तरति पच्चोत्तरित्ता जेणेव सिद्धायतणे तेणेव पहारेत्थ गमणाए ।

[४४] तए णं तं सूरियाभं देवं चत्तारि सामाणियसाहस्सीओ जाव सोलस आयरक्खदेव-साहस्सीओ अण्णे य बहवे सूरियाभविमाणवासिणो [वेमाणिया देवा] य देवीओ य अप्पेगतिया उप्पल-हत्थगया जाव सहस्सपत्तहत्थगया सूरियाभं देवं पिडुतो-पिडुतो समणुगच्छंति ।

तए णं तस्स सूरियाभस्स देवस्स आभिओगिया देवा य देवीओ य अप्पेगतिया चंदणकल-सहत्थगया जाव अप्पेगतिया धूवकडुच्छुय-हत्थगया हड्डुतुड-जाव सूरियाभं देवं चिडुत्तो-पिडुत्तो समणु-गच्छंति ।

तए णं से सूरियाभे देवे चउहिं सामाणिय-साहस्सीहिं जाव आयरक्खदेवसाहस्सीहिं अण्णेहिं बहूहिं य [सूरियाभविमाणवासीहिं] वेमाणिएहिं देवेहिं य देवीहि य सद्धिं संपरिवुडे सच्चिइदीए जाव नातियरवेणं जेणेव सिद्धायतणे तेणेव उवागच्छति उवागच्छित्ता सिद्धायतणं पुरत्थमिल्लेणं दारेणं अनुपविसति अनुपविसित्ता ।

जेणेव देवच्छंदए जेणेव जिनपडिमाओ तेणेव उवागच्छति उवागच्छित्ता जिनपडिमाणं आलोए पणामं करेति करेत्ता लोमहत्थगं गिण्हति गिण्हित्ता जिनपडिमाणं लोमहत्थएणं पमज्जइ पमज्जित्ता जिनपडिमाओ सुरभिणा गंधोदएणं ण्हाएइ ण्हाइत्ता सरसेणं गोसीसचंदणेणं गायाइं अनुलिंपइ अनुलिंपइत्ता सुरभिगंधकासाइएणं गायाइं लूहेइ लुहेत्ता जिनपडिमाणं अहयाइं देवदूसजुयलाइं नियंसेइं नियंसेत्ता अग्गेहिं वरेहिं गंधेहिं मल्लेहि य अच्छेइ अच्छेत्ता पुप्फारुहणं जाव आभरणारुहणं करेइ करेत्ता आसत्तोसत्तविउलट्टवग्घारियमल्लदामकलावं करेइ करेत्ता कयग्गहगहियकरयल-पब्भट्टविप्पमुक्केणं दसद्ववण्णेणं कुसुमेणं पुप्फपुंजोयवयारकलियं करेइ करेत्ता जिनपडिमाणं पुरतो अच्छेहिं सण्हेहिं रययामएहिं अच्छरसा-तंदुलेहिं अट्टट्ट मंगले आलिहइ तं जहा-

सोत्थियं जाव दप्पणं तयाणंतरं च णं चंदप्पभ-वइरवेरुलिय-विमलदंडं कंचमणिरयण-भत्तिचित्तं कालागरु-पवरकुंदुरुक्क-तुरुक्क-धूव-मघमघेंत-गंधुत्तमाणुविद्धं च धूववट्ठिं विणिम्मयुंतं वेरुलिय-मयं कडुच्छुयं पग्गहियं पयत्तेणं धूवं दाऊणं जिनवराणं अट्टसय विसुद्ध-गन्थजुत्तेहिं अत्थ-जुत्तेहिं अपुनरुत्तेहिं महावित्तेहिं संथुणइ संथुणित्ता सत्तट्ट पदाणि पच्चोसक्केइ पच्चोसक्कित्ता वामं जाणुं अंचेइ अंचित्ता दाहिणं जाणु धरणितलंसि निहट्टु तिक्खुत्तो मुद्धाणं धरणितलंसि निवाडेइ निवाडित्ता ईसिं पच्चुण्णमइ पच्चुण्णमित्ता करयलपरिग्गहियं सिरसावत्तं मत्थए अंजलिं कट्टु एवं वयासी-

नमोत्थुणं अरहंताणं जाव संपत्ताणं वंदइ-नमंसइ वंदित्ता नमंसित्ता-जेणेव सिद्धायतणस्स सूत्तं-४४

बहुमज्झदेसभाए तेणेव उवागच्छइ उवागच्छित्ता लोमहत्थगं परामुसइ परामुसित्ता सिद्धायतणस्स बहुमज्झ-देसभागं लोमहत्थेणं पमज्जति, दिव्वाए दग्गधारए अब्भुक्खेइ, अब्भुक्खेत्ता सरसेणं गोसीसचंदणेणं पंचं-गुलितलं दलयइ दलयित्ता कयग्गहगहियं जाव पुंजोवयारकलियं करेइ करेत्ता धूवे दलयइ दलयित्ता-

जेणेव सिद्धायतणस्स दाहिणिल्ले दारे तेणेव उवागच्छति उवागच्छित्ता लोमहत्थगं परामुसइ परामुसित्ता दारचेडीओ य सालभंजियाओ य वालरूवए य लोमहत्थएणं पमज्जइ पमज्जित्ता दिव्वाए दग्गधारए अब्भुक्खेइ अब्भुक्खेत्ता सरसेणं गोसीसचंदणेणं चच्चए दलयइ दलयित्ता पुप्फारुहणं मल्ला जाव आभरणारुहणं करेइ करेत्ता आसत्तोसत्तं जाव धूवं दलयइ दलयित्ता-जेणेव दाहिणिल्ले दारे मुहमंडवे जेणेव दाहिणिल्लस्स मुहमंडवस्स बहुमज्झदेसभाए तेणेव उवागच्छइ उवागच्छित्ता लोमहत्थगं परामुसइ परामुसित्ता बहुमज्झदेसभागं लोमहत्थेणं पमज्जइ पमज्जित्ता दिव्वाए दग्गधाराए अब्भुक्खेइ अब्भुक्खेत्ता सरसेणं गोसीसचंदणेणं पंचगुलितलं मंडलगं आलिहइ आलिहित्ता कयग्गहगहिय जाव धूवं दलयइ दलयित्ता-

जेणेव दाहिणिल्लस्स मुहमंडवस्स पच्चत्थिमिल्ले दारे तेणेव उवागच्छइ उवागच्छित्ता लोमहत्थगं परामुसइ परामुसित्ता दारचेडीओ य सालभंजियाओ य वालरूवए य लोमहत्थेणं पमज्जइ पमज्जित्ता दिव्वाए दग्गधाराए अब्भुक्खेइ अब्भुक्खेत्ता सरसेणं गोसीसचंदणेणं चच्चए दलयइ दलयित्ता

पुष्कारुहणं जाव आभरणारुहणं करेइ करेत्ता आसत्तोसत्तं जाव धूवं दलयइ दलयित्ता-जेणेव दाहणिल्लस्स मुहमंडवस्स उत्तरिल्ला खंभपंती तेणेव उवागच्छइ उवागच्छित्ता लोमहत्थं परामुसइ परामुसित्ता खंभे य सालभंजियाओ य वालरूवए य लोमहत्थएणं पमज्जइ पमज्जित्ता जहा चेव पच्चत्थिमिल्लस्स दारस्स जाव धूवं दलयइ दलयित्ता-

जेणेव दाहणिल्लस्स मुहमंडवस्स पुरत्थिमिल्ले दारे तेणेव उवागच्छइ उवागच्छित्ता लोमहत्थं परामुसित्ता दारचेडाओ य सालभंजियाओ य वालरूवए य लोमहत्थेमं पमज्जइ पमज्जित्ता तं चेव सव्वं ।

जेणेव दाहणिल्लस्स मुहमंडवस्स दाहणिल्ले दारे तेणेव उवागच्छइ उवागच्छित्ता दारचेडीओ य तं चेव सव्वं जेणेव दाहणिल्ले पेच्छाघरमंडवे जेणेव दाहणिल्लस्स पेच्छाघरमंडवस्स बहुमज्झदेसभागे जेणेव वइरामए अक्खाडए जेणेव मणिपेढिया जेणेव सीहासणे तेणेव उवागच्छइ उवागच्छित्ता लोमहत्थं परामुसइ परामुसित्ता अक्खाडगं च मणिपेढियं च सीहासणं च लोमहत्थएणं पमज्जइ पमज्जित्ता दिव्वे दगधाराए अब्भुक्खेइ अब्भुक्खेत्ता सरसेणं गोसीसचंदणेमं चच्चए दलयइ दलयित्ता पुष्कारुहणं आसत्तोसत्त जाव धूवं दलयइ दलयित्ता-

जेणेव दाहणिल्लस्स पेच्छाघरमंडवस्स पच्चत्थिमिल्ले दारे० उत्तरिल्ले दारे तं चेव जं चेव पुरत्थिमिल्ले दारे, तं चेव, जेणेव दाहणिल्ले चेइयथूभे तेणेव उवागच्छइ उवागच्छित्ता जाव थूभं च मणिपेढियं य दिव्वाए दगधाराए अब्भुक्खेइ अब्भुक्खेत्ता सरसेणं गोसीसचंदणेमं चच्चए दलयइ दलयित्ता पुष्कारुहणं आसत्तोसत्त जाव धूवं धलयइ दलयित्ता-

जेणेव पच्चत्थिमिल्ला मणिपेढिया जेणेव पच्चत्थिमिल्ला जिनपडिमा तेणेव उवागच्छइ उवागच्छित्ता जिनपडि-माए आलोए पणामं करेइ करेत्ता तं चेव, जेणेव उत्तरिल्ला जिनपडिमा तं चेव सव्वं जेणेव पुरत्थिमिल्ला मणिपेढिया जेणेव पुरत्थिमिल्ला जिनपडिमा तेणेव उवागच्छइ उवागच्छित्ता तं चेव जेणेव दाहणिल्ला मणिपेढिया जेणेव दाहणिल्ला जिनपडिमा तं चेव सव्वं जेणेव दाहणिल्ले चेइयरुक्खे

सूत्तं-४४

तेणेव उवागच्छइ उवागच्छित्ता तं चेव, जेणेव दाहणिल्ले महिंदज्झए तं चेव सव्वं ।

जेणेव दाहणिल्ला नंदापुक्खरिणी तेणेव उवागच्छइ उवागच्छित्ता लोमहत्थं परामुसति परामुसित्ता तोरणे य तिसोवाणपडिरूवए य सालभंजियाओ य वालरूवए य लोमहत्थएणं पमज्जइ पमज्जितता दिव्वाए दगधाराए अब्भुक्खेइ अब्भुक्खेत्ता सरसेणं गोसीसचंदणेणं० पुष्कारुहणं० आसत्तोसत्त० धूवं दलयति दलयित्ता सिद्धायतणं अनुपयाहिणीकरेमाणे जेणेव उत्तरिल्ला नंदापुक्खरिणी तेणेव उवागच्छति उवागच्छित्ता तं चेव ।

जेणेव उत्तरिल्ले चेइयरुक्खे तेणेव उवागच्छइ उवागच्छित्ता जेणेव उत्तरिल्ले चेइयथूभे तेणेव उवागच्छइ उवागच्छित्ता जेणेव पच्चत्थि-मिल्ला मणिपेढिया जेणेव पच्चत्थिमिल्ला जिनपडिमा तं चेव, जेणेव उत्तरिल्ले पेच्छाघरमंडवे तेणेव उवागच्छइ उवागच्छित्ता जा चेव दाहणिल्ले वत्तव्वया सा चेव सव्वा पुरत्थिमिल्ले दारे, दाहणिल्ला खंभपंति तं चेव सव्वं,

जेणेव उत्तरिल्लस्स दारे मुहमंडवे जेणेव उत्तरिल्लस्स मुहमंडवस्स बहुमज्झदेसभाए तं चेव सव्वं, पच्चत्थिमिल्ले दारे तेणेव उवागच्छइ उवागच्छित्ता जेणेव उत्तरिल्लस्स मुहमंडवस्स

उत्तरिल्ले दारे० दाहिलिल्लस्स खंभपंती तेणेव उवागच्छइ उवागच्छित्ता जेणेव सिद्धायतणस्स उत्तरिल्ले दारे तेणेव उवागच्छइ उवागच्छित्ता तं चेव

जेणेव सिद्धायतणस्स पुरित्थिमिल्ले दारे तेणेव उवागच्छइ उवागच्छित्ता जेणेव पुरित्थिमिल्ले दारे मुहमंडवे जेणेव पुरित्थिमिल्लस्स मुहमंडवस्स बहुमज्झ-देसभागे तेणेव उवागच्छइ उवागच्छित्ता जेणेव पुरित्थिमिल्ले मुहमंडवस्स दाहिलिल्ले पच्चत्थिमल्ला खंभपंती उत्तरिल्ले दारे तं चेव पुरित्थिमिल्ले दारे तं चेव ।

जेणेव पुरित्थिमिल्लस्स पेच्छाघरमंडवे एवं थूभे जिनपडिमाओ चेइयरूक्खा महिंदज्झया नंदापुक्खरिणी तं चेव जाव धूवं दलयइ दलयित्ता जेणेव सभा सुहम्म तेणेव उवागच्छत्ति उवागच्छित्ता सभं सुहम्म पुरित्थिमिलेणं दारेणं अनुपविसइ अनुपविसित्ता जेणेव माणवए चेइयखंभे जेणेव वइरामए गोलवट्ट समुग्गए तेणेव उवागच्छइ उवागच्छित्ता लोमहत्थगं परामुसइपरामुसित्ता वइरामए गोलवट्टसमुग्गए लोमहत्थेणं पमज्जइ पमज्जित्ता वइरामए गोलवट्ट समुग्गए विहाडेइ विहाडेत्ता जिणसगहाओ लोमहत्थेणं पमज्जइ पमज्जित्ता सुरभिणा गंधोदएणं पक्खालेइ पक्खालित्ता

अग्गेहिं वरेहिं गंधेहि य सल्लेहि य अच्छेइ धूवं दलयइ दलयित्ता जिनसकहाओ वइरामएसु गोलवट्टसमुग्गएसु पडिनिक्खिवइ माणवगं चेइयखंभं हलोमहत्थएणं पमज्जइ दिव्वाए दगधाराए सरसेणं गोसीसचंदणेणं चच्चए दलयइ, पुप्फाराहणं जाव धूवं दलयइ, जेणेव सीहासणे तं चेव, जेणेव खुड्डागमहिंदज्जए तं चेव, जेणेव पहरणकोसे चोप्पालए तेणेव उवागच्छइ उवागच्छित्ता लोमहत्थगं परामुसइ परामुसित्ता पहरणकोसं चोप्पालं लोमहत्थएणं पमज्जइ पमज्जित्ता दिव्वाए दगधाराए सरसेणं गोसीसचंदणेणं चच्चए दलयइ दलयित्ता पुप्फारुहणं आसत्तोसत्त जाव धूवं दलयइ दलयित्ता-

जेणेव सभाए सुहम्माए बहुमज्झदेसभाए जेणेव मणिपेढिया जेणेव देवसयणिज्जं तेणेव उवागच्छइ उवागच्छित्ता लोमहत्थगं परामुसइ देवसयणिज्जं च मणिपेढियं च लोमहत्थएणं पमज्जइ जाव धूवं दलयइ दलयित्ता-जेणेव उववायसभाए दाहिलिल्ले दारे तहेव अभिसेयसभासरिसं जाव पुरित्थिमिल्ला नंदा पुक्खरिणी जेणेव हरए तेणेव उवागच्छइ उवागच्छित्ता तोरणे य तिसोवाणे य सालभंजियाओ य वाल-

सूत्तं-४४

रूवए य तहेव,

जेणेव अभिसेयसभा तेणेव उवागच्छइ उवागच्छित्ता तहेव सीहासणं च मणिपेढियं च सेसं तहेव आययणसरिसं जाव पुरित्थिमिल्ला नंदा पुक्खरिणी, जेणेव अलंकारियसभा तेणेव उवागच्छइ उवागच्छित्ता जहा अभिसेय सभा तहेव सव्वं ।

जेणेव ववसायसभा तेणेव उवागच्छइ उवागच्छित्ता तहेव लोमहत्थयं परामुसति पोत्थयरयणं लोमहत्थएणं पमज्जइ पमज्जित्ता दिव्वाए दगधाराए अग्गेहिं वरेहि य गंधेहि मल्लेहि य अच्छेति अच्छेत्ता मणिपेढियं सीहासणं च सेसं तं चेव, पुरित्थिमिल्लानंदा पुक्खरिणी जेणेव हरए तेणेव उवागच्छइ उवागच्छित्ता तोरणे य तिसोवाणे य सालिभंजियाओ य वालरूवए य तहेव ।

जेणेव बलिपीढे तेणेव उवागच्छइ उवागच्छित्ता बलिविसज्जणं करेइ करेत्ता आभिओगिए देवे सद्दावेइ सद्दावेत्ता एवं वयासी-खिप्पामेव भो देवाणुप्पिया सूरियाभे विमाणे सिंघाडएसु तिएसु चउक्केसु

चच्चरेसु चउम्मुहेसु महापहपहेसु पागारेसु अट्टालएसु चरियासु दारेसु गोपुरेसु तोरणेसु आरामेसु उज्जाणेसु काननेसु वनेसु वनसंडेसु वणराईसु अच्चणियं करेह करेत्ता ।

एयमाणत्तियं खिप्पामेव पच्चप्पिणह ।

तए णं ते आभिओगिया देवा सूरियाभेणं देवेणं एवं वुत्ता समाणा जाव पडिसुणेत्ता सूरियाभे विमाणे सिंघाडएसु तिएसु चउक्कएसु चच्चरेसु चउम्मुहेसु महापहपहेसु पागारेसु अट्टालएसु चरियासु दारेसु गोपुरेसु तोरणेसु आरामेसु उज्जाणेसु काननेसु वनेसु वनसंडेसु वणराईसु अच्चणियं करेत्ति करेत्ता जेणेव सूरियाभे देवे जाव पच्चप्पिणंति ।

तए णं से सूरियाभे देवे जेणेव नंदा पुक्खरिणी तेणेव उवागच्छइ उवागच्छित्ता नंदं पुक्खरिणिं पुरत्थिमिल्लेणं तिसोमाणपडिरूवणं पच्चोरुहति पच्चोरुहित्ता हत्थपाए पक्खालेइ पक्खालेत्ता नंदाओ पुक्खरिणीओ पच्चुत्तरइ पच्चुत्तरेत्ता जेणेव सभा सुधम्मा तेणेव पहारेत्थ गमणाए ।

तए णं से सूरियाभे देवे चउहिं सामाणियसाहस्सीहिं जाव सोलसहिं आयरक्खदेवसाहस्सीहिं अण्णेहिं य बहूहिं सूरियाभविमाणवासीहिं वेमाणिएहिं देवेहिं य देवीहि य सद्धिं संपरिवुडे सव्विड्डीए जाव नाइयरवेणं जेणेव सभा सुधम्मा तेणेव उवागच्छइ उवागच्छित्ता सभं सुधम्मं पुरत्थिमिल्लेणं दारेणं अनुपविसति अनुपविसित्ता जेणेव सीहासणे तेणेव उवागच्छइ उवागच्छित्ता सीहासणवरगए पुरत्थाभिमुहे सण्णिसण्णे ।

[४५] तए णं तस्स सूरियाभस्स देवस्स अवरुत्तरेणं उत्तरेणं उत्तरपुरत्थिमिल्लेणं चत्तारि सामाणियसाहस्सीओ चउसु भद्दासणसाहस्सीसु निसीयंति, तए णं तस्स सूरियाभस्स देवस्स पुरत्थिमेणं चत्तारि अग्गमहिसीओ चउसु भद्दासणेसु निसीयंति, तए णं तस्स सूरियाभस्स देवस्स दाहिणपुरत्थिमेणं अब्भिंतारियाए परिसाए अट्ट देवसाहस्सीओ अट्टसु भद्दासणसाहस्सीसु निसीयंति, तए णं तस्स सूरियाभस्स देवस्स दाहिणेणं मज्झिमाए परिसाए दस देवसाहस्सीओ दसहिं भद्दासणसाहस्सीहिं निसीयंति, तए णं तस्स सूरियाभस्स देवस्स दाहिणपच्चत्थिमेणं बाहिरियाए परिसाए बारस देवसाहस्सीतो बारसाहिं भद्दासणसाहस्सीहिं निसीयंति, तए णं तस्स सूरियाभस्स देवस्स पच्चत्थिमेणं सत्त अणियाहिवइणो सत्तहिं भद्दासणेहिं निसीयंति, तए णं तस्स सूरियाभस्स देवस्स पच्चत्थिमेणं सत्त अणियाहिवइणो सत्तहिं भद्दासणेहिं निसीयंति ।

सूत्तं-४५

तए णं तस्स सूरियाभस्स देवस्स चउद्धिसिं सोलस आयरक्खदेवसाहस्सीओ सोलसहिं भद्दासणसाहस्सीहिं निसीयंति, तं जहा- पुरत्थिमिल्लेणं चत्तारि साहस्सीओ दाहिणेणं चत्तारि साहस्सीओ पच्चत्थिमेणं चत्तारि साहस्सीओ उत्तरेणं चत्तारि साहस्सीओ ।

ते णं आयरक्खा सण्णद्ध-बद्ध-वम्मियकवया उप्पीलियसरासणपट्टिया पिणद्धगेविज्जा आविद्ध-विमल-वरचिंधपट्टा गहियाउहपहरणा तिनयाणि ति-संधीणि वयरामय-कोडीणि धणूइं पगिज्झ परियाइय-कंडकलावा नीलपाणिणो पीतपाणिणो रत्तपाणिणो चावपाणिणो चारुपाणिणो चम्मपाणिणो दंडपाणिणो खग्गपाणिणो पासपाणिणो नील-पीय-रत्त-चाव-चारु-चम्म-दंड-खग्ग-पासधरा आयरक्खा रक्खोवगा गुत्ता गुत्तपालिया जुत्ता जुत्त-पालिया पत्तेयं-पत्तेयं समयओ विनयओ किंकरभूया इव चिट्ठंति ।

[४६] सूरियाभस्स णं भंते! देवस्स केवइयं कालं ठिई पन्नत्ता? गोयमा! चत्तारि पलिओवमाइं ठिई पन्नत्ता, सूरियाभस्स णं भंते! देवस्स सामाणियपरिसोववण्णगाणं देवाणं केवइयं कालं

ठिई पन्नत्ता? गोयमा! चत्तारि पलिओवमाइं ठिई पन्नत्ता, एमहिङ्गीए एमहज्जुईए एमहब्बले एमहायसे एमासोक्खे एमहाणुभागे सूरियाभे देवे, अहो णं भंते! सूरियाभे देवे महिङ्गीए जाव महाणुभागे ।

[४७] सूरियाभे णं भंते! देवे णं सा दिव्वा देविङ्गी सा दिव्वा देवज्जुई से दिव्वे देवाणुभागे-किण्णा लद्धे किण्णा पत्ते किण्णा अभिसमण्णागए? पुव्वभवे के आसी? किं णामए वा को वा गोत्तेणं? कयरंसि वा गामंसि वा जाव सण्णिवेसंसि वा? किं वा दच्चा किं वा भोच्चा किं वा किच्चा किं वा समायरित्ता कस्स वा तहारूवस्स समणस्स वा माहणस्स वा अंतिए एगमवि आरियं धम्मियं सुवयणं सोच्चा निसम्म? जण्णं सूरियाभेणं देवेणं सा दिव्वा देविङ्गी जाव देवाणुभागे लद्धे पत्ते अभिसमण्णागए ।

मुनि दीपरत्नसागरेण संशोधितः सम्पादितश्च “सूरियाभदेव पयरण” समत्तं

[४८] गोयमाति! समणे भगवं महावीरे भगवं गोयमं आमंतेत्ता एवं वयासी-एवं खलु गोयमा! तेणं कालेणं तेणं समएणं इहेव जंबुद्वीवे दीवे भारहे वासे केयइ-अद्धे नामं जणवए होत्था-रिद्धत्थिमियसमिद्धे० तत्थ णं केइय-अद्धे जणवए सेयविया नामं नगरी होत्था-रिद्ध-त्थिमिय-समिद्धा जाव पडिरूवा ।

तीसे णं सेयवियाए नगरी बहिया उत्तरपुरत्थिमे दिसीभागे एत्थ णं मिगवणे नामं उज्जाणे होत्था, रम्ममे नंदनवनप्पगासे सव्वोउय-पुप्फ-फलसमिद्धे सुभसुरभिसीयलाए छायाए सव्वओ चेव समणुबद्धे पासादीए जाव पडिरूवे ।

तत्थ णं सेयवियाए नगरीए पएसी नामं राया होत्था-महयाहिमवंत-जाव विहरइ अधम्मिए अधम्मिद्धे अधम्म-क्खाई अधम्माणुए अधम्मपलोई अधम्मपलज्जणे अधम्मसीलसमुयाचारे अधम्मणेणं चेव वित्तिं कप्पेमाणे हण-छिंद-भिंद-पवत्तए लोहियपाणी पावे चंडे रुद्धे खुद्धे साहस्सीए उक्कंचण-वंचण-माया-नियडि-कूड-कूवड-दुप्पय-चउप्पय-मिय-पसु-पक्खि-सरिसिवाणं घायए वहाए उच्छेयणयाए अधम्मकेऊ समुट्टिए, गुरुणं नो अब्भुद्धेइ नो विणयं पउंजइ समण-माहणाणं० सयस्स वि य णं जणवयस्स नो सम्मं करभरवित्तिं पवत्तेइ ।

[४९] तस्स णं पएसिस्स रण्णो सूरियकंता नामं देवी होत्था, सुकुमालपाणिपाया, धारिणी वण्णओ, पएसिणा रण्णा सद्धिं अनुरत्ता अविरत्ता इट्ठे सद्धे रूवे जाव विहरइ ।

सूत्तं-५०

[५०] तस्स णं पएसिस्स रण्णो जेट्ठे पुत्ते सूरियकंताए देवीए अत्तए सूरियकंते नामं कुमारे होत्था-सुकुमालपाणिपाए जाव पडिरूवे । से णं सूरियकंते कुमारे जुवराया वि होत्था पएसिस्स रण्णो रज्जं च रट्ठं च बलं च वाहणं च कोसं च कोट्टागारं च अंतेउरं च जणवयं च सयमेव पच्चुवेक्खमाणे पच्चुवेक्खमाणे विहरइ ।

[५१] तस्स णं पएसिस्स रण्णो जेट्ठे भाउय-वयंसए चित्ते नामं सारही होत्था-अडढे जाव बहुजणस्स अपरिभूए साम-दंड-भेय-उवप्पयाण-अत्थसत्थ-ईहामइ-विसारए उप्पत्तियाए वेणतियाए कम्मयाए पारिणामियाए-चउव्विहाए बुद्धीए उववेए, पएसिस्स रण्णो बहुसु कज्जेसु य कारणेसु य कुडुंबेसु य मंतेसु य रहस्सेसु य गुज्झेसु य निच्छएसु य ववहारेसु य आपुच्छणिज्जे पडिपुच्छणिज्जे मेढी पमाणं आहारे आलंबणं चक्खू मेढिभूए पमाणभूए आहारभूए आलंबणभूए चक्खुभूए सव्वट्ठाण-सव्वभूमियासु लद्धपच्चए विदिन्नविचारे रज्जधुराचिंतए आवि होत्था ।

[५२] तेणं कालेणं तेणं समएणं कुणाला नामं जणवए होत्था, रिद्धत्थिमियसमिद्धे, तत्थ णं कुणालाए जणवए सावत्थी नामं नयरी होत्था रिद्ध-त्थिमियसमिद्धा जाव पडिरूवा । तीसे णं सावत्थीए नयरीए बहिया उत्तरपुरत्थिमे दिसीभाए कोट्टए नामं चेइए होत्था, पोराणे जाव पासादीए० तत्थ णं सावत्थीए नयरीए पएसिस्स रण्णो अंतेवासी जियसत्तू नामं राया होत्था, महयाहिमवंत- जाव विहरइ ।

तए णं से पएसी राया अन्नया कयाइ महत्थं महग्घं महरिहं विउलं रायारिहं पाहुडं सज्जावेइ सज्जावेत्ता चित्तं सारहिं सद्दावेइ सद्दावेत्ता एवं वयासी- गच्छ णं चित्ता! तुमं सावत्थिं नगरिं जियसत्तुस्स रण्णो इमं महत्थं जाव पाहुडं उवणेहिं, जाइं तत्थ रायकज्जाणि य राय-किच्चाणि य रायणीईओ य रायववहारा य ताइं जियसत्तुणा सद्धिं सयमेव पच्चुवेक्खमाणे विहराहि त्ति कट्ठु विसज्जिए

तए णं से चित्ते सारही पएसिणा रण्णा एवं वुत्ते समाणे हट्ठ जाव पडिसुणेत्ता तं महत्थं जाव पाहुडं गेण्हइ गेण्हित्ता पएसिस्स रण्णो जाव पडिनिक्खमइ पडिनिक्खमित्ता सेयवियं नगरिं मज्झिमज्झेणं जेणेव सए गिहे तेणेव उवागच्छति उवागच्छित्ता तं महत्थं जाव पाहुडं ठवेइ ठवेत्ता कोडुंबियपुरिसे सद्दावेइ सद्दावेत्ता एवं वयासी- खिप्पामेव भो! देवाणुप्पिया! सच्छत्तं जाव चाउग्घंटं आसरहं जुत्तामेव उवट्ठवेह जाव पच्चप्पिणह ।

तए णं ते कोडुंबियपुरिसा तहेव पडिसुणित्ता खिप्पामेव सच्छत्तं जाव जुद्धसज्जं चाउग्घंटं आसरहं जुत्तामेव उवट्ठवेति उवट्ठवेत्ता तमाणत्तियं पच्चप्पिणंति ।

तए णं से चित्ते सारही कोडुंबियपुरिसाणं अंतिए एयमट्ठं जाव हियए ण्हाए कयबलिकम्मे कयकोउय-मंगलपायच्छित्ते सण्णद्ध-बद्ध-वम्मियकवए उप्पीलिय-सरासण-पट्टिए पिणद्धगेविज्जविमल-वरचिंधपट्टे गहियाउहपहरणे तं महत्थं जाव पाहुडं गेण्हइ गेण्हित्ता जेणेव चाउग्घंटं आसरहे तेणेव उवागच्छइ उवागच्छित्ता चाउग्घंटं आसरहं दुरुहेति दुरुहेत्ता बहुहुं पुरिसेहिं सण्णद्ध-जाव गहियुहपहरणेहिं सद्धिं संपरिवुडे सकोरेंटमल्लदामेणं छत्तेणं धरेज्जमाणेणं-धरेज्जमाणेणं महया भड-चडगर-रहपहकर-विंदपरिक्खित्ते साओ गिहाओ निग्गच्छइ सेयवियं नगरिं मज्झिमज्झेणं निग्गच्छइ सुहेहिं वासेहिं पायरासेहिं नाइविकिट्ठेहिं अंतरा वासेहिं वसमाणे-वसमाणे केयइ-अद्धस्स जणवयस्स मज्झिमज्झेणं जेणेव कुणालाजणवए जेणेव सावत्थी नयरी तेणेव उवागच्छइ-उवागच्छित्ता सावत्थीए नयरीए मज्झिमज्झेणं अनुपविसइ ।

सूत्तं-५२

जेणेव जियसत्तुस्स रण्णो गिहे जेणेव बाहिरिया उवट्ठाणसाला तेणेव उवागच्छइ, तुरए निगिण्हइ, रहं ठवेति, रहाओ पच्चोरुहइ, तं महत्थं जाव पाहुडं गिण्हइ, जेणेव अब्भित्तारिया उवट्ठाणसाला जेणेव जियसत्तू राया तेणेव उवागच्छइ, जियसत्तुं रायं करयलपरिग्गहियं जाव कट्ठु जएणं विजएणं वद्धावेइ, तं महत्थं जाव पाहुडं उवणेइ ।

तए णं से जियसत्तू राया चित्तस्स सारहिस्स तं महत्थं जाव पाहुडं पडिच्छइ चित्तं सारहिं सक्कारेइ सम्माणेइ पडिविसज्जेइ रायमग्गमोगाढं च से आवासं दलयइ ।

तए णं से चित्ते सारही विसज्जित्ते समाणे जियसत्तुस्स रण्णो अंतियाओ पडिनिक्खमइ, जेणेव बाहिरिया उवट्ठाणसाला जेणेव चाउग्घंटं आसरहे तेणेव उवागच्छइ चाउग्घंटं आसरहं दुरुहइ, सावत्थिं नगरिं मज्झिमज्झेणं जेणेव रायमग्गमोगाढे आवासे तेणेव उवागच्छइ तुरए निगिण्हइ, रहं ठवेइ, रहाओ पच्चोरुहइ, ण्हाए कयबलिकम्मे कयकोउय-मंगल-पायच्छित्ते सुद्धापपावेसाइं मंगल्लाइं वत्थाइं पवरपरिहिते

अप्पमहग्घारभणालंकि ए जिमियभुत्तुत्तरागएऽवि य णं समाणे पुच्चावरणहकालसमयंसि गंधवेहिं य नाडगेहि य उवनच्चिज्जमाणे उवगाइज्जमाणे उवलालिज्जमाणे इहे सद्द-फरिस-रस-रूव-गंधे पंचविहे माणुस्सए कामभोए पच्चणुभवमाणे विहरइ ।

[५३] तेणं कालेणं तेणं समएणं पासावच्चिज्जे केसी नाम कुमार-समणे जातिसंपन्ने कुलसंपन्ने बलसंपन्ने रूवसंपन्ने विनयसंपन्ने नाणसंपन्ने दंसणसंपन्ने चरित्तसंपन्ने लज्जासंपन्ने लाघव-संपन्ने ओयंसी तेयंसी वच्चंसी जसंसी जियकोहे जियमाणे जियमाए जियलोहे जियनिद्धे जित्तिदि ए जियप-रीसहे जिवियासमरणभयविप्पमुक्के तवप्पहाणे गुणप्पहाणे करणप्पहाणे चरणप्पहाणे निग्गहप्पहाणे निच्छयप्पहाणे अज्जवप्पहाणे मद्दवपहाणे लाघवप्पहाणे खंतिप्पहाणे गुत्तिप्पहाणे मुत्तिप्पहाणे विज्जप्पहाणे मंतप्पहाणे बंभप्पहाणे वेयप्पहाणे नयप्पहाणे नियमप्पहाणे सच्चप्पहाणे सोयप्पहाणे नाणप्पहाणे दंसणप्पहाणे चरित्तप्पहाणे० चउदसपुव्वी चउनाणोवगए पंचहिं अणगारसएहिं सद्धिं संपरिवुडे पुच्चाणुपुव्विं चरमाणे गामा-णुगामं दूइज्जमाणे सुहंसुहेणं विहरमाणे जेणेव सावत्थी नयरी जेणेव कोट्टए चेइए तेणेव उवागच्छइ सावत्थीनयरीए बहिया कोट्टए चेइए अहापडिरूवं ओग्गहं ओगिण्हइ ओगिण्हित्ता संजमेणं तवसा अप्पाणं भावेमाणे विहरइ ।

[५४] तए णं सावत्थीए नयरीए सिंघाडग-तिय-चउक्क-चच्चर-चउम्मुह-महापहपहेसु महया जणसद्धे इ वा जणवूहे इ वा जणबोले इ वा जणकलकले इ वा जणउम्मी इ वा जणसण्णिवाए इ वा जाव तए णं तस्स सारहहिस्स तं महाजणसद्धं च जणकलकलं च सुणेत्ता य पासेत्ता य इमेयारूवे अज्झत्थिए जाव समुप्पज्जित्था-

किं णं अज्ज जाव सावत्थीए नयरीए इंदमहे इ वा खंदमहे इ वा रुद्धमहे इ वा मउंदमहे इ वा सिवमहे इ वा वेसमणमहे इ वा नागमहे इ वा जक्खमहे इ वा भूयमहे इ वा थूभमहे इ वा चेइयमहे इ वा रुक्खमहे इ वा गिरिमहे इ वा दरिमहे इ वा अगडमहे इ वा नईमहे इ वा सरमहे इ वा सागरमहे इ वा जं णं इमे बहवे उग्गा उग्गपुत्ता भोगा राइण्णा इक्खागा नाया कोरव्वा जाव इब्भा इब्भ-पुत्ता० णहाया कयबलिकम्मा जहोववाइए जाव अप्पेगतिया हयगया, अप्पेगतिया गयगया जाव पायविहारचारेणं महया-महया वंदावंदएहिं निग्गच्छंति, एवं संपेहेइ संपेहेत्ता कंचुइज्जपुरिसं सद्धावेइं सद्धावेत्ता एवं वयासी-किं णं देवाणुप्पिया अज्ज सावत्थीए नयरीए इंदमहेइ वा जाव सागरमहेइ वा जं णं इमे बहवे सूत्तं-५४

उग्गा उग्गपुत्ता भोगा जाव निग्गच्छंति? ।

तए णं से कंचुइ-पुरिसे केसिस्स कुमारसमणस्स आगमण-गहिय-विणिच्छए चित्तं सारहिं करयलपरिग्गहियं जाव वद्धावेत्ता एवं वयासी-नो खलु देवाणुप्पिया! अज्ज सावत्थीए नयरीए इंदमहे इ वा जाव सागरमहे इ वा जं णं इमे बहवे जाव । विंदावंदएहिं निग्गच्छंति, एवं खलु भो देवाणुप्पिया! पासावच्चिज्जे केसी नामं कुमार-समणे जातिसंपन्ने जाव गामाणुगामं दूइज्जमाणे इहमागए जाव विहरइ, तेणं अज्ज सावत्थीए नयरीए बहवे उग्गा जाव इब्भा इब्भपुत्ता अप्पेगतिया वंदणवत्तियाए महया-महया वंदावंदएहिं निग्गच्छंति,

तए णं से चित्ते सारही कंचुइपुरिसस्स अंतिए एयमद्धं सोच्चा निसम्मं हद्धतुइ-जाव-हियए कोडुंबियपुरिसे सद्धावेइं सद्धावेत्ता एवं वयासी-खिप्पामेव भो देवाणुप्पिया! चाउग्घटं आसरहं जुत्तामेव उवडुवेह जाव सच्छत्तं उवडुवैति ।

तए णं से चित्ते सारही ण्हाए कयबलिकम्मे कयकोउय-मंगल-पायच्छित्ते सुद्धप्पावेसाइं मंगल्लाइं वत्थाइं पवरपरिहिते अप्पमहग्घाभरणा-लंकियसरीरे जेणेव चाउग्घटं आसरहे तेणेव उवागच्छइ उवागच्छित्ता चाउग्घटं आसरहं दुरुहइ दुरुहित्ता सकोरेंटमल्लदामेणं छत्तेणं धरिज्जमाणेणं महया भड-चडगर-वंदपरिखित्ते सावत्थीनगरीए मज्झिमज्झेणं निग्गच्छइ निग्गच्छित्ता जेणेव कोट्टए चेइए जेणेव केसी कुमार-समणे तेणेव उवागच्छइ उवागच्छित्ता केसि-कुमार-समणस्स अदूरसामंते तुरए निगिण्हइ रहं ठवेइ ठवेत्ता रहाओ पच्चोरुहति पच्चोरुहित्ता जेणेव केसी कुमार-समणे तेणेव उवागच्छइ उवागच्छित्ता केसिं कुमारसमणं तिक्खुत्तो आयाहिण-पयाहिणं करेइ करेत्ता वंदइ नमंसइ वंदित्ता नमंसित्ता नच्चासण्णे नातिदूरे सुस्सूसमाणे नमंसमाणे अभिमुहे पंजलिउडे विणएणं पज्जुवासइ ।

तए णं से केसी कुमारसमणे चित्तस्स सारहिस्स तीसे महतिमहालियाए महच्चपरिसाए चाउज्जामं धम्मं परिकहेइ तं जहा- सव्वाओ पाणाइवायाओ वेरमणं सव्वाओ मुसावायाओ वेरमणं सव्वाओ अदिन्नादाणाओ वेरमणं सव्वाओ बहिद्वादाणाओ वेरमणं ।

तए णं सा महतिमहालिया महच्चपरिसा केसिस्स कुमार-समणस्स अंतिए धम्मं सोच्चा निसम्म जामेव दिसिं पाउब्भूया तामेव दिसिं पडिगया, तए णं से चित्ते सारही केसिस्स कुमारसमणस्स अंतिए धम्मं सोच्चा निसम्म हट्ट जाव हियए उट्ठाए उट्ठेइ उट्ठेत्ता केसिं कुमार-समणं तिक्खुत्तो आयाहिण-पयाहिणं करेइ करेत्ता वंदइ नमंसइ वंदित्ता नमंसित्ता एवं वयासी-

सद्धहामि णं भंते! निग्गंथं पावयणं पत्तियामि णं भंते! निग्गंथं पावयणं रोएमि णं भंते! निग्गंथं पावयणं अब्भुट्टेमि णं भंते! निग्गंथं पावयणं एवमेयं भंते! तहमेयं भंते! अवितहमेयं भंते! असंदिद्धमेयं भंते! इच्छियमेयं भंते! पडिच्छियमेयं भंते! इच्छि-पडिच्छियमेयं भंते! जं णं तुब्भे वदह त्ति कट्टु वंदइ नमंसइ वंदित्ता नमंसित्ता एवं वयासी-

जहा णं देवाणुप्पियाणं अंतिए बहवे उग्गा उग्गपुत्ता भोगा जाव इब्भा इब्भपुत्ता चिच्चा हिरण्णं चिच्चा सुवण्णं एवं-धणं धन्नं बलं वाहणं कोसं कोट्ठागारं पुरं अंतेउरं चिच्चा विउलं धण-कणग-रयण-मणि-मोत्तिय-संख-सिल-प्पवाल-संतसारसावएज्जं विच्छइडित्ता विगोवइत्ता दाणं दाइयाणं परिभाइत्ता मुंडा भवित्ता णं अगाराओ अणगारियं पव्वयंति, नो खलु अहं तहा संचाएमि चिच्चा हिरण्णं तं चेव जाव अणगारियं पव्वइत्तए, अहं णं देवाणुप्पियाणं अंतिए पंचणुवाइयं सत्त सिक्खावइयं दुवालसविहं

गिहिधम्मं

सूत्तं-५४

पडिवज्जिस्सामि ।

अहासुहं देवाणुप्पियाणं! मा पडिबंधं करेहि,

तए णं से चित्ते सारही केसिस्स कुमार-समणस्स अंतिए पंचाणुव्वतियं जाव गिहिधम्मं उवसंपज्जित्ताणं विहरति, तए णं से चित्ते सारही केसिं कुमार-समणं वंदइ नमंसइ वंदित्ता नमंसित्ता जेणेव चाउग्घटं आसरहे तेणेव पहारेत्थ गमणाए चाउग्घटं आसरहं दुरुहइ दुरुहित्ता जामेव दिसिं पाउब्भूए तामेव दिसिं पडिगए ।

[५५] तए णं से चित्ते सारही समणोवासए जाए अहिगयजीवाजीवे उवलद्धपुन्नपावे आसव-संवर-निज्जर-किरियाहिगरणबंधप्पमोक्खकुसले असहिज्जे देवासुर-नाग-सुवन्न-जक्ख-रक्खस-किन्नर-किंपुरिस-गरुल-गंधव्व-महोरगाइएहिं देवगणेहिं निग्गंथाओ पावयणो अणइक्कमणिज्जे निग्गंथे

पावयणे निस्संकिण निक्कंखिए निव्वित्तिगिच्छे लद्धे गहिये अभिगय्हे पुच्छिय्हे विणिच्छिय्हे अट्ठिमिं-
जपेम्माणुरागरत्ते अयमाउसो! निग्गंथे पावयणे अट्ठे अयं परमट्ठे सेसे अणट्ठे, ऊसियफलिहे अवंगुयदुवारे
चियत्तं-तेउरधरप्पवेसे चाउद्धसद्धमुद्धिपुन्नमासिणीसु पडिपुन्नं पोसहं सम्मं अनुपालेमाणे समणे निग्गंथे
फासुए-सणिज्जेणं असनपानखाइमसाइमेणं पीढ-फलग-सेज्जा-संथारेणं वत्थपडिग्गह-कंबल-पायपुंछणेणं
ओसह-भेसज्जेणं य पडिलाभेमाणे-पडिलाभेमाणे बहूहिं सीलव्वय-गुण-वेरमण-पच्चक्खाणं-पोसहोववासेहिं
अप्पाणं भावेमाणे जाइं तत्थ रायकज्जाणि य जाव रायववहाराणि य ताइं जियसत्तुणा रण्णा सद्धिं
सयमेव पच्चुवेक्खमाणे-पच्चुवेक्खमाणे विहरइ ।

[५६] तए णं से जियसत्तुराया अण्णया कयाइ महत्थं जाव पाहुडं सज्जेइ सज्जेत्ता
चित्तं सारहिं सद्धावेइ सद्धावेत्ता एवं वयासी-गच्छाहि णं तुमं चित्ता! सेयवियं नगरिं पएसिस्स रण्णो इमं
महत्थं जाव पाहुडं उवणेहि, मम पाउग्गं च णं जहाभणियं अवितहमसंदिद्धं वयणं विण्णवेहि त्ति कट्ठु
विसज्जिए।

तए णं से चित्ते सारही जियसत्तुणा रण्णा विसज्जिए समाणे तं महत्थं जाव पाहुडं
गिण्हइ जाव जियसत्तुस्स रण्णो अंतियाओ पडिनिक्खमइ पडिनिक्खमित्ता सावत्थीनयरीए मज्झंमज्झेणं
निग्गच्छइ जेणेव रायमग्गमोगाढे आवासे तेणेव उवागच्छइ तं महत्थं जाव ठवेइ, ण्हाए जाव सकोरेटं
महया० पायविहारचारेणं महया पुरिसवग्गुरापरिक्खित्ते, रायमग्गमोगाढाओ आवासाओ निग्गच्छइ
निग्गच्छित्ता सावत्थीणगरीए मज्झंमज्झेणं निग्गच्छति निग्गच्छित्ता जेणेव कोट्टए चेइए जेणेव केसी
कुमार-समणे तेणेव उवागच्छति उवागच्छित्ता केसिस्स कुमारसमणस्स अंतिए धम्मं सोच्या जाव हट्ठुडु०
उट्ठाए जाव एवं वयासी

एवं खलु अहं भंते! जियसत्तुणा रण्णा पएसिस्स रण्णो इमं महत्थं जाव पाहुडं उवणेहिं
त्ति कट्ठु विसज्जिए, तं गच्छामि णं अहं भंते! सेयवियं नगरिं, पासादीया णं भंते! सेयविया नगरी, एवं
दरिसणिज्जा णं भंते! सेयविया नगरी, अभिरूवा णं भंते! सेयविया नगरी, पडिरूवा णं भंते! सेयविया
नगरी, समोसरह णं भंते! तुब्भे सेयवियं नगरिं ।

तए णं से केसी कुमार-समणे चित्तेणं सारहिणा एवं वुत्ते समाणे चित्तस्स सारहिस्स
एयमट्ठं नो आढाइ नो परिजाणइ तुसिणीए संचिद्धइ, तए णं चित्ते सारही केसिं कुमार-समणं दोच्चं पि
तच्चं पि एवं वयासी- एवं खलु अहं भंते! जियसत्तुणा रण्णा पएसिस्स रण्णो इमं महत्थं जाव विसज्जिए
तं चेव जाव समोसरह णं भंते! तुब्भे सेयवियं नगरिं,

सूत्तं-५६

तए णं केसी कुमार-समणे चित्तेणं सारहिणं दोच्चं पि तच्चं पि एवं वुत्ते समाणे चित्तं
सारहिं एवं वयासी-चित्ता! से जहानामए वनसंडे सिया-किण्हे किण्होभासे जाव जाव पडिरूवे, से नूणं
चित्ता! से वनसंडे बहूणं दुपयचउप्पय-मिय-पसु-पक्खी-सिरीसिवाणं अभिगमणिज्जे? हंता अबिगणिज्जे,
तंसि च णं चित्ता! वनसंडंसे बहवे भिलुंगा नाम पावसउणा परिवसंति, जे णं तेसिं बहूणं दुपय-चउप्पय-
मिय-पसु-पक्खी-सिरीसिवाणं ठियाणं चेव मंसासोणियं आहारंति, से नूणं चित्ता! से वनसंडे तेसिं णं बहूणं
दुपय जाव सिरीसिवाणं अभिगमणिज्जे? नो ति०, कम्हा णं? भंते! सोवसग्गे एवमेव चित्ता! तुब्भं पि
सेयवियाए नयरीए पएसी नामं राया परिवसइ-अहम्मिए जाव नो सम्मं करभरवित्तिं पवत्तेइ, तं कहं णं
अहं चित्ता! सेयवियाए नगरीए समोसरिस्सामि? ।

[५७] तए णं से चित्ते सारही केसिं कुमार-समणं एवं वयासी-किं णं भंते! तुब्भं एसिणा रण्णा कायव्वं? अत्थि णं भंते! सेयवियाए नगरीए अण्णे बहवे ईसर-तलवर-जाव सत्थवाहपभित्तयो जे णं देवाणुप्पियं वंदिस्संति नमंसिस्संति जाव पज्जुवासिस्संति विउलं असणपाणखाइमसाइमेणं पडिलाभिस्संति, पाडिहारिणं पीढ-फलग-सेज्जा-संधारेणं उवनिमंतिस्संति,

तए णं से केसि कुमारसमणे चित्तं सारहिं एवं वयासी-अवियाइं चित्ता! समोसरिस्सामो ।

तए णं से चित्ते सारही केसिं कुमारसमणं वंदइ नमंसइ वंदित्ता नमंसित्ता केसिस्स कुमारसमणस्स अंतियाओ कोट्टयाओ चेइयाओ पडिनिक्खमइ पडिनिक्खमित्ता जेणेव सावत्थी नगरी जेणेव रायमग्गमोगाढे आवासे तेणेव उवागच्छइ उवागच्छित्ता कोट्टुंबियपुरिसे सद्दावेइ सद्दावेत्ता एवं वयासी-

खिप्पामेव भो देवाणुप्पिया! चाउग्घंटं आसरहं जुत्तामेव उवद्वेह जहा- सेयवियाए नगरीए निग्गच्छइ तहेव जाव वसमाणे-वसमाणे कुणाला-जणवयस्स मज्झिमज्झेणं जेणेव केकयअद्धे जणवए जेणेव सेयविया नगरी जेणेव मियवणे उज्जाणे तेणेव उवागच्छइ उवागच्छित्ता उज्जाणपालए सद्दावेइ सद्दावेत्ता एवं वयासी-

जया णं देवाणुप्पिया! पासावच्चिज्जे केसी नाम कुमार-समणे पुव्वाणुपुत्विं चरमाणे गामाणुगामं दूइज्जमाणे इहमागच्छिज्जा तया णं तुब्भे देवाणुप्पिया! केसिं कुमार-समणं वंदिज्जाह नमंसिज्जाह वंदित्ता नमंसित्ता अहापडिरूवं ओग्गहं अनुजाणेज्जाह पाडिहारिणं पीढ-फलग जाव उवनिमं-तिज्जाए एयमाणत्तियं खिप्पामेव पच्चप्पिणेज्जाह

तए णं ते उज्जाणपालगा चित्तेणं सारहिणा एवं वुत्ता समाणा हट्टतुइ जाव हियया करयल-परिग्गहियं जाव एवं वयासी- तहत्ति, आणाए विणएणं वयणं पडिसुणेंति ।

[५८] तए णं चित्ते सारही जेणेव सेयविया नगरी तेणेव उवागच्छइ उवागच्छित्ता सेयवियं नगरिं मज्झिमज्झेणं अनुपविसइ अनुपविसित्ता जेणेव एसिस्स रण्णो गिहे जेणेव बाहिरिया उवद्वाणसाला तेणेव उवागच्छइ उवागच्छित्ता तुरए निगिण्हइ निगिण्हित्ता रहं ठवेइ, रहाओ पच्चोरुहइ पच्चोरुहित्ता तं महत्थं जाव पाहुडं गेण्हइ जेणेव एसि राया तेणेव उवागच्छइ एसिं रायं करयल जाव वद्धावेत्ता तं महत्थं जाव उवणेइ ।

तए णं से एसि राया चित्तस्स सारहिस्स तं महत्थं जाव पाहुडं पडिच्छइ, चित्तं सारहिं सक्कारेइ सम्माणेइ, पडिविसज्जेइ ।

तए णं से चित्ते सारही एसिणा रण्णा विसज्जिए समाणे हट्ट जाव हियए एसिस्स सूत्तं-५८

रण्णो अंतियाओ पडिनिक्खमइ, जेणेव चाउग्घंटे आसरहे तेणेव उवागच्छइ, चाउग्घंटं आसरहं दुरुहइ, सेयवियं नगरिं मज्झिमज्झेणं जेणेव सए गिहे तेणेव उवागच्छइ, तुरए निगिण्हइ, रहं ठवेइ रहओ पच्चोरुहइ, ण्हाए जाव उप्पिं पासायवरगए फुट्टमाणेहिं मुइंगमत्थएहिं बत्तीसइबद्धएहिं नाडएहिं वरतरुणी-संपउत्तेहिं उवणच्चिज्जमाणे, उवगाइज्जमाणे, उवलालिज्जमाणे, इट्ठे सद्धफरिस-पच्चणुभवमाणे विहरइ ।

[५९] तए णं से केसी कुमार-समणे अन्नया कयाइ पाडिहारियं पीढ-फलग-सेज्जा-संधारणं पच्चप्पिणइ, सावत्थीओ नगरीओ कोट्टगाओ चेइयाओ पडिनिक्खमणइ, पंचहिं अणगारसएहिं जाव विहरमाणे जेणेव केयइ-अद्धे जणवए जेणेव सेयविया नगरी जेणेव मियवणे उज्जाणे तेणेव उवागच्छइ उवागच्छित्ता अहापडिरूवं ओग्गहं ओगिण्हित्ता संजमेणं तवसा अप्पाणं भावेमाणे विहरति ।

तए णं सेयवियाए नगरीए सिंघडग-जाव महया जणसद्धे इ वा जाव परिसा निग्गच्छइ, तए णं ते उज्जाणपालगा इमीसे कहाए लद्धा समाणा हट्ठुड- जाव हियया जेणेव केसी कुमार-समणे तेणेव उवागच्छंति उवागच्छित्ता केसिं कुमारसमणं वंदंति नमंसंति, अहापडिरूवं ओग्गहं अनुजाणंति पाडिहारिणं जाव संधारणं उवनिमंतंति नामं गोयं पुच्छंति, ओधारंति, एगंतं अवक्कमंति अवक्कमित्ता अन्नमन्नं एवं वयासी-

जस्स णं देवाणुप्पिया! चित्ते सारही दंसणं कंखइ दंसणं पत्थेइ दंसणं पीहेइ दंसणं अभिलसइ जस्स णं नामगोयस्स वि सवणयाए हट्ठुड जाव हियए भवति, से णं एस केसी कुमार-समणे पुव्वाणुपुव्विं चरमाणे गामाणुगामं दूइज्जमाणे इहमागए इह संपत्ते इह समोसडे इहेव सेयवियाए नगरीए बहिया मियवणे उज्जाणे अहापडिरूवं जाव विहरइ, तं गच्छामो णं देवाणुप्पिया! चित्तस्स सारहिस्स एयमद्वं पियं निवेणो पियं से भवउ, अन्नमन्नस्स अंतिए एयमद्वं पडिसुणंति, जेणेव सेयविया नगरी जेणेव चित्तस्स सारहिस गिहे जेणेव चित्ते सारही तेणेव उवागच्छंति, चित्तं सारहिं करयल जाव वद्धावेत्ता एवं वयासी-

जस्स णं देवाणुप्पिया! दंसणं कंखंति जाव अभिलसंति जस्स णं नामगोयस्स वि सवणयाए हट्ठ जाव भवह से णं अयं पासावच्चिज्जे केसी नामं कुमार-समणे पुव्वाणुपुव्विं चरमाणे जाव विहरइ ।

तए णं से चित्ते सारही तेसिं उज्जाणपालगाणं अंतिए एयमद्वं सोच्चा निसम्म हट्ठुड-जाव आसणाओ अब्भुट्ठेति पायपीढाओ पच्चोरुहइ पच्चोरुहित्ता पाउयाओ ओमुयइ ओमुइत्ता एगसाडियं उत्तरासंगं करेइ, अंजलि-मउलियग्गहत्थे केसिकुमार-समणाभिमुहे सत्तइ पयाइं अनुगच्छइ अनुगच्छित्ता करयलपरिग्गहियं दसनहं सिरसावत्तं मत्थए अंजलिं कट्ठु एवं वयासी-

नमोत्थु णं अरहंताणं जाव संपत्ताणं, नमोत्थु णं केसिस्स कुमार-समणस्स मम धम्मायरियस्स धम्मोवदेसगस्स वंदामि णं भगवंतं तत्थगयं इहगए पासइ मे ति कट्ठु वंदइ नमंसइ, ते उज्जाणपालए विउलेणं वत्थगंधमल्लालंकारेणं सक्कारेइ सम्माणेइ विउलं जीवियारिहं पीइदाणं दलयइ दलइत्ता पडिविसज्जेइ पडिविसज्जेत्ता कोडुंबियपुरिसे सद्धावेइ सद्धावेत्ता एवं वयासी-खिप्पामेव भो देवाणुप्पिया! चाउग्घंटं आसरहं जुत्तामेव उवट्ठवेह जाव पच्चप्पिणह ।

तए णं ते कोडुंबियपुरिसा जाव खिप्पामेव सच्छत्तं सज्झयं जाव उवट्ठवेत्ता तमाणत्तिं पच्चप्पिणंति,

तए णं से चित्ते सारही कोडुंबियपुरिसाणं अंतिए एयमद्वं सोच्चा निसम्म हट्ठुड जाव सूत्तं-५९

हियए ण्हाए कयबलि-कम्मे जाव सरीरे जेणेव चाउग्घंटे जाव दुरुहित्ता सकोरेंटमल्लदामेणं० महया भडचडगर-तं चेव जाव पज्जुवासइ तए णं से केसी कुमार-समणे चित्तस्स सारहिस्स तीसे महतिमहालियाए महच्चपरिसाए धम्मं कहेइ० ।

[६०] तए णं से चित्ते सारही केसिस्स कुमार-समस्स अंतिए धम्मं सोच्चा निसम्म हट्ठुड-जाव तहेव एवं वयासी- एवं खलु भंते! अम्हं पएसी राया अधम्मिए जाव सयस्स वि जणवयस्स नो सम्मं करभरवित्तिं पवत्तेइ, तं जइ णं देवाणुप्पिया! पएसिस्स रण्णो धम्ममाइक्खेज्जा बहुगुणतरं खलु होज्जा पएसिस्स रण्णो तेसिं च बहूणं दुपय-चउप्पय-मिय-पसु-पक्खी-सिरीसवाणं तेसिं च बहूणं

समण-माहण-भिक्षुयाणं, तं जइ णं देवाणुप्पिया! पएसिस्स बहुगुणतरं होज्जा सयस्स वि य णं जणवयस्स ।

[६१] तए णं केसी कुमार-समणे चित्तं सारहिं एवं वयासी-एवं खलु चउहिं ठाणेहिं चित्ता जीवे केवलिपन्नत्तं धम्मं नो लभेज्जा सवणयाए तं जहा-

आरामगयं वा उज्जाणगयं वा समणं वा माहणं वा नो अभिगच्छइ नो वंदइ नो नमंसइ नो सक्कारेइ नो सम्माणेइ नो कल्लाणं मंगलं देवयं चेइयं पज्जुवासेइ नो अट्ठाइं हेऊइं पसिणाइं कारणाइं वागरणाइं पुच्छइ, एएणं वि ठाणेणं चित्ता! जीवे केवलि पन्नत्तं धम्मं नो लभइ सवणयाए ।

उवस्सयगयं समणं वा तं चेव जाव एएण वि ठाणेणं चित्ता! जीवे केवलिपन्नत्तं धम्मं नो लभइ सवणयाए

गोयरग्गगयं समणं वा माहणं वा जाव नो पज्जुवासेइ, नो विउलेणं असण-पाणखाइमसाइमेणं पडिलाभेइ नो अट्ठाइं जाव पुच्छइ, एएणं वि ठाणेणं चित्ता! जीवे केवलिपन्नत्तं धम्मं नो लभइ सवणयाए ।

जत्थ वि य णं समणेणं वा माहणेणं वा सद्धिं अभिसमागच्छइ तत्थ वि य णं हत्थेण वा वत्थेण वा छत्तेण वा अप्पाणं आवरित्ता चिद्धइ, नो अट्ठाइं जाव पुच्छइ, एएण वि ठाणेणं चित्ता! जीवे केवलिपन्नत्तं धम्मं नो लभइ सवणयाए ।

एएहिं च णं चित्ता चउहिं ठाणेहिं जीवे केवलिपन्नत्तं धम्मं लभइ सवणयाए तं जहा-

आरामगयं वा उज्जाणगयं वा समणं वा माहणं वा अभिगच्छइ वंदइ नमंसइ जाव पज्जुवासेइ अट्ठाइं जाव पुच्छइ, एएणं वि जाव लभइ सवणयाए, एवं उवस्सयगयं गोयरग्गगयं समणं वा जाव पज्जुवासेइ विउलेणं जाव पडिलाभेइ अट्ठाइं जाव पुच्छइ, एएण वि०

जत्थ वि य णं समणेणं वा माहणेण वा सद्धिं अभिसमागच्छइ तत्थ वि य णं नो हत्थेण वा जाव आवरेत्ताणं चिद्धइ ।

एएण वि ठाणेणं चित्ता! जीवे केवलिपन्नत्तं धम्मं लभइ सवणयाए, तुज्झं च णं चित्ता! पएसि राया-आरामगयं वा तं चेव सव्वं भाणियव्वं आइल्लएणं गमएणं जाव अप्पाणं आवरेत्ता चिद्धइ, तं कहं णं चित्ता! पएसिस्स रण्णो धम्ममाइक्खिस्सामो?

तए णं से चित्ते सारही केसिं कुमार-समणं एवं वयासी- एवं खलु भंते! अण्णया कयाइं कंबोएहिं चत्तारि आसा उवणयं उवणीया ते मए पएसिस्स रण्णो अण्णया चेव उवणेया, तं एएणं खलु भंते! कारणेणं अहं पएसिं रायं देवाणुप्पियाणं अंतिए हव्वमाणेस्सामि, तं मा णं देवाणुप्पिया! तुब्भे पएसिस्स रण्णो धम्ममाइक्खमाणा गिलाएज्जाह, अगिलाए णं भंते! तुब्भे पएसिस्स रण्णो धम्ममाइक्खेज्जाह,

सूत्तं-६१

छंदेणं भंते! तुब्भे पएसिस्स रण्णो धम्ममाइक्खेज्जाह ।

तए णं से केसी कुमार-समणे चित्तं सारहिं एवं वयासी-अवि याइं चित्ता जाणि-स्सामो ।

तए णं से चित्ते सारही केसिं कुमार-समणं वंदइ नमंसइ जेणेव चाउग्घंटे आसरहे तेणेव उवागच्छइ उवागच्छित्ता चाउग्घंटे आसरहं दुरुहइ जामेव दिसिं पाउब्भूए तामेव दिसिं पडिगए ।

[६२] तस्स णं से चित्ते सारही कल्लं पाउप्पभाए रयणीए फुल्लुप्पल-कमल-कोमलुम्मिलि-यम्मि अहापंडुरे पभाए कयनियमावस्सए सहस्सरस्सिम्मि दिणयरे तेयसा जलंते साओ गिहाओ निग्गच्छइ निग्गच्छित्ता जेणेव पएसिस्स रण्णो गिहे जेणेव पएसी राया तेणेव उवागच्छइ उवागच्छित्ता पएसिं रायं करयल जाव तिकट्टु जएणं विजएणं वद्धावेइ वद्धावेत्ता एवं वयासी-

एवं खलु देवाणुप्पियाणं कंबोएहिं चत्तारि आसा उवायणं उवणीया ते य मए देवाणुप्पियाणं अण्णया चेव विणइया तं एह णं सामी! ते आसे चिट्ठं पासह ।

तए णं से पएसी राया चित्तं सारहिं एवं वयासी-गच्छाहि णं तुमं चित्ता! तेहिं चेव चउहिं आसेहिं चाउग्घटं आसरहं जुत्तामेव उवट्ठवेह उवट्ठवेत्ता जाव पच्चप्पिणाहि ।

तए णं से चित्ते सारही पएसिणा रण्णा एवं वुत्ते समाणे हट्ठतुट्ठ-जाव हियए उवट्ठवेइ उवट्ठवेत्ता एयमाणत्तियं पच्चप्पिणइ ।

तए णं से पएसी राया चित्तस्स सारहिस्स अंतिए एयमट्ठं सोच्चा निसम्म हट्ठतुट्ठ-जाव अप्पमहग्घाभरणालंकियसरीरे साओ गिहाओ निग्गच्छइ, जेणामेव चाउग्घटे आसरहे तेणेव उवागच्छइ, चाउग्घटं आसरहं दुरुहइ, सेयवियाए नगरीए मज्झमज्झेणं निग्गच्छइ ।

तए णं से चित्ते सारही तं रहं नेगाइं जोयणाइं उब्भामेइ ।

तए णं से पएसी राया उण्हेण व तण्हाए य रहवाएणं य परिकिलंते समाणे चित्तं सारहिं एवं वयासी-चित्ता! परिकिलंते मे सरीरे परावत्तेहिं रहं ।

तए णं से चित्ते सारही रहं परावत्तेइ, जेणेव मियवणे उज्जाणे तेणेव उवागच्छइ, पएसिं रायं एवं वयासी-एस णं सामी! मियवणे उज्जाणे एत्थ णं आसाणं समं किलामं सम्मं अवणेमो,

तए णं से पएसी राया चित्तं सारहिं एवं वयासी-एवं होउ चित्ता!

तए णं से चित्ते सारही जेणेव केसिस्स कुमार-समणस्स अदूरसामंते तेणेव उवागच्छइ तुरए निगिण्हेइ, रहं ठवेइ, रहओ पच्चोरुहइ, तुरए मोएति, पएसिं रायं एवं वयासी- एह णं सामी! आसाणं समं किलामं सम्मं अवणेमो ।

तए णं से पएसी राया रहाओ पच्चोरुहइ, चित्तेणं सारहिणा सद्धिं आसाणं समं किलामं सम्मं अवणेमाणे पासइ जत्थ केसिं कुमार-समणं महइमहालियाए महच्चपरिसाए मज्झगए महया-महया सद्धेणं धम्ममाइक्खमाणं पासइ, पासित्ता इमेयारूवे अज्झत्थिए जाव समुप्पज्जित्था-जइडा खलु भो जइडं पज्जुवासंति मुंडा खलु भो मुंडं पज्जुवासंति मूढा खलु भो मूढं पज्जुवासंति अपंडिया खलु भो! अपंडियं पज्जुवासंति निव्विण्णाणा खलु भो! निव्विण्णाणं पज्जुवासंति, से केस णं एस पुरिसे जइडे मुंडे मूढे अपंडिए निव्विण्णाणे सिरीए हिरीए उवगए उत्तप्पसरीरे, एस णं पुरिसे किमाहारमाहारेइ? किं परिणामेइ? किं खाइ किं पियइ किं दलयइ किं पयच्छइ जेणं एमहालियाए मणुस्सपरिसाए मज्झगए महया-महया सद्धेणं बूयाए? एवं संपेहेइ संपेहित्ता चित्तं सारहिं एवं वयासी-चित्ता! जइडा खलु भो! जइडं पज्जुवासंति जाव

सूत्तं-६२

बूयाइ, साए वि य णं उज्जाणभूमीए नो संचाएमि सम्मं पकामं पवियरित्तए?

तए णं से चित्ते सारही पएसिं रायं एवं वयासी-एस णं सामी! पासवच्चिज्जे केसी नामं कुमार-समणे जातिसंपन्ने जाव चउनाणोवगए अहोऽवहिए अण्णजीविए ।

तए णं से पएसी राया चित्तं सारहिं एवं वयासी- अहोऽवहियं णं वयासी चित्ता! अण्णजीवियत्तं णं वयासी चित्ता? हंता! सामी! अहोऽवहियं णं वयामि०, अण्णजिवियं णं वयामि अभिगमणिज्जे णं चित्ता! एस पुरिसे? हंता! सामी! अभिगमणिज्जे अभिगच्छामो णं चित्ता अम्हे एयं पुरिसं? हंता सामी! अभिगच्छामो ।

[६३] तए णं से पएसी राया चित्तेणं सारहिणा सद्धिं जेणेव केसी कुमार-समणे तेणेव उवागच्छइ उवागच्छित्ता केसिस्स कुमार-समणस्स अदूरसामंते ठिच्चा एवं वयासी-तुब्भे णं भंते! अहोऽवहिया अण्णजीविया?

तए णं केसी कुमार-समणे पएसिं रायं एवं वयासी-पएसी! से जहानामए अंकवाणिया इ वा संखवाणिया इ वा सुकं भंसेउकामा नो सम्मं पंथं पुच्छंति, एवामेव पएसी तुमं वि विणयं भंसेउकामो नो सम्मं पुच्छसि, से नूणं तव पएसी ममं पासित्ता अयमेयारूवे अज्झत्थिए जाव समुप्पज्जित्था-जइडा खलु भो जइडं पज्जुवासंति जाव पवियरित्तए, से नूणं पएसी अत्थे समत्थे हंता अत्थि ।

[६४] तए णं से पएसी राया केसिं कुमार-समणं एवं वयासी-से केणट्ठेणं भंते! तुज्झं नाणे वा दंसणे वा जेणं तुब्भं एयारूवं अज्झत्थियं जाव संकप्पं समुप्पण्णं जाणह पासह?

तए णं केसी कुमारसमणे पएसिं रायं एवं वयासी- एवं खलु पएसी! अम्हं समणाणं निग्गंथाणं पंचविहे नाणे पन्नत्ते तं जहा- आभिणिबोहियनाणे सुयनाणे ओहिनाणे मणपज्जवनाणे केवलनाणे ।

से किं तं आभिणिबोहियनाणे? आभिणिबोहियनाणे चउत्विहे पन्नत्ते तं जहा- उग्गहो ईहा अवाए धारणा । से किं तं उग्गहे? उग्गहे दुविहे पन्नत्ते जहा- नंदीए जाव से तं धारणा, से तं आभिणि-बोहियनाणे ।

से किं तं सुयनाणं सुयनाणं दुविहं पन्नत्तं तं जहा- अंगपविट्ठं च अंगबाहिरंगं च, सव्वं भाणियव्वं जाव दिट्ठिवाओ ।

से किं तं ओहिनाणं? ओहिनाणं दुविहं पन्नत्तं तं जहा- भवपच्चइयं च खंओवसमियं च जहा- नंदीए ।

से किं तं मणपज्जवनाणे? मणपज्जवनाणे दुविहे पन्नत्ते तं जहा- उज्जुमई य विउलमई य ।

से किं तं केवलनाणं तहेव केवलनाणं सव्वंभाणियव्वं, तत्थ णं जेसे आभिणिबोहि-यानाणे से णं ममं अत्थि, तत्थ णं जे से सुयनाणे से वि य ममं अत्थि, तत्थ णं जे से ओहिनाणे से विय ममं अत्थि, तत्थ णं जे से मणपज्जवनाणे सि वि य ममं अत्थि, तत्थ णं जे से केवलनाणे से णं ममं नत्थिं, से णं अरहंताणं भगवंताणं इच्चेएणं पएसी अहं तव चउत्विहेणं छाउमत्थिएणं नाणेणं इमेयारूवं अज्झत्थियं जाव समुप्पन्नं जाणामि पासामि ।

[६५] तए णं से पएसी राया केसिं कुमार-समणं एवं वयासी-अहं णं भंते! इहं उवविसा-
सूत्तं-६५

मि? पएसी! एसाए उज्जाणभूमीए तुमंसि चेव जाणए, तए णं से पएसी राया चित्तेणं सारहिणा सद्धिं केसिस्स कुमार-समणस्स अदूरसामंते उवविसइ, केसिं कुमार-समणं एवं वयासी-तुब्भं णं भंते! समणाणं

निगंगंथाणं एस सण्णा एस पइण्णा एस दिट्ठी एस रुई एस हेऊ एस उवएसे एस संकप्पे एस तुला एस माणे एस पमाणे एस समोसरणे जहा- अण्णो जीवो अण्णं सरीरं नो तं जीवो तं सरीरं?

तए णं केसी कुमार-समणे पएसिं रायं एवं वयासी-पएसी अम्हं समणाणं निगंगंथाणं एसा सण्णा जाव एस समोसरणे जहा- अण्णो जीवो अण्णं सरीरं, नो तं जीवो नो तं सरीरं ।

तए णं से पएसी राया केसिं कुमारसमणं एवं वयासी- जति णं भंते तुब्भं समणाणं निगंगंथाणं एसा सण्णा जाव एस समोसरणे जहा- अण्णो जीवो अण्णं सरीरं नो तं जीवो तं सरीरं, एवं खलु ममं अज्जए होत्था, इहेव जंबूदीवे दीवे सेयवियाए नगरीए अधम्मिए जाव सयस्स वि य णं जणवयस्स नो सम्मं करभरवित्तिं पवत्तेति, से णं तुब्भं वत्तव्वयाए सुबहुं पावकम्मं कलिकलुसं समज्जिणित्ता कालमासे कालं किच्चा अण्णयरेसु नरएसु नेरइयत्ताए उववण्णे ।

तस्स णं अज्जगस्स णं अहं नत्तुए होत्था इट्ठे कंते पिए मणुण्णे थेज्जे वेसासिए संमए बहुमए अणुमए रयणकरंडगसमाणे जिवउस्सविए हिययनंदिजणणे उंबरपुप्फं पिव दुल्लभे सवणयाए, किमंग पुण पासणयाए? तं जति णं से अज्जए ममं आगंतुं वएज्जा-एवं खलु नत्तुया! अहं तव अज्जए होत्था, इहेव सेयवियाए नयरीए अधम्मिए जाव नो सम्मं करभरवित्तिं पवत्तेमि, तए णं अहं सुबहुं पावकम्मं कलिकलुसं समज्जिणित्ता नरएसु उववण्णे तं मा णं नत्तुया! तुमं पि भवाहि अधम्मिए जाव नो सम्मं करभरवित्तिं पवत्तेहि, मा णं तुमं पि एवं चेव सुबहुं पावकम्मं जाव उववज्जिहिसि ।

तं जइ णं से अज्जए ममं आगंतुं वएज्जा तो णं अहं सद्धहेज्जा पत्तिएज्जा रोएज्जा जहा- अण्णो जीवो अण्णं सरीरं नो तं जीवो तं सरीरं जम्हा णं से अज्जए ममं आगंतुं नो एवं वयासी- तम्हा सुपइड्डिया मम पइण्णा समणाउसो! जहा- तज्जीवो तं सरीरं ।

तए णं से केसी कुमार-समणे पएसिं रायं एवं वयासी- अत्थि णं पएसी! तव सूरियकंता नामं देवी? हंता अत्थि, जइ णं तुमं पएसी तं सूरियकंतं देविं ण्हायं कयबलिकम्मं कयकोउय-मंगलपायच्छित्तं सव्वालंकारभूसियं केणइ पुरिसेणं ण्हाएणं जाव सव्वालंकार-भूसिएणं सद्धिं इट्ठे सद्ध-फरिस-रस-रूव-गंधे पंचविहे माणुस्सते कामभोगे पच्चणुब्भवमाणिं पासिजज्जसि तस्स णं तुमं पएसी! पुरिसस्स कं डंडं निव्वत्तेज्जासि? ।

अहं णं भंते! तं पुरिसं हत्थच्छिण्णगं वा पायच्छिण्णगं वा सूलाइगं वा सूलभिण्णगं वा एगाहच्चं कूडाहच्चं जीवियाओ ववरोवएज्जा, अहं णं पएसी से पुरिसे तुमं एवं वदेज्जा-मा ताव मे सामी! मुहुत्तागं हत्थच्छिण्णगं वा जाव जीवियाओ ववरोवेहि जाव ताव अहं मित्त-नाइ-नियग-सयण-संबंधि-परिजणं एवं वयामि-एवं खलु देवाणुप्पिया! पावाइं कम्माइं समायरेत्ता इमेयारूवं आवइं पाविज्जामि तं मा णं देवाणुप्पिया! तुब्भे वि केइ पावाइं कम्माइं समायरह मा णं से वि एवं चेव आवइं पाविज्जिहिह जहा- णं अहं ।

तस्स णं तुमं पएसी! पुरिसस्स खणमवि एयमट्ठं पडिसुणेज्जासि? नो तिणट्ठे समट्ठे, जम्हा णं भंते! अवराही णं से पुरिसे, एवामेव पएसी! तव वि अज्जए होत्था इहेव सेयावियाए नयरीए अधम्मिए जाव नो सम्मं करभरवित्तिं पवत्तेइ, से णं अम्हं वत्तव्वयाए सुबहुं जाव उववण्णे, तस्स णं
सूत्तं-६५

अज्जगस्स तुमं नत्तुए होत्था-इट्ठे कंते जाव पासणयाए, से णं इच्छइ माणुसं लोगं हव्वमागच्छित्तए, नो चेव णं संचाएइ हव्वमागच्छित्तए,

चउहिं च णं ठाणेहिं पएसी अहुणोववण्णए नरएसु नेरइए इच्छेज्ज माणुसं लोगं हव्वमागच्छित्तए नो चेव णं संचाएइ ।

अहुणोववण्णए नरएसु नेरइए, से णं तत्थ महब्भूयं वेयणं वेदेमाणे इच्छेज्जा माणुस्सं लोगं हव्वमागच्छित्तए नो चेव णं संचाएइ हव्वमागच्छित्तए ।

अहुणोववण्णए नरएसु नेरइए नरयपालेहिं भुज्जो-भुज्जो समहिद्विज्जामाणे इच्छइ माणुसं लोगं हव्वमागच्छित्तए नो चेव णं संचाएइ ।

अहुणोववण्णए नरएसु नेरइए निरयवेयणिज्जंसि कम्मंसि अक्खीणंसि अवेइयंसि अणिज्जिण्णंसि इच्छइ माणुसं लोगं हव्वमागच्छित्तए नो चेव णं संचाएइ ।

अहुणोववण्णए नरएसु नेरइए निरयाउयंसि कम्मंसि अक्खीणंसि अवेइयंसि अनिज्जिण्णंसि इच्छइ माणुसं लोगं हव्वमागच्छित्तए नो चेव णं संचाएइ हव्वमागच्छित्तए ।

इच्चेएहिं चउहिं ठाणेहिं पएसी अहुणोववण्णे नरएसु नेरइए इच्छइ माणुसं लोगं हव्वमागच्छित्तए नो चेव णं संचाएइ हव्वमागच्छित्तए ।

तं सद्धहाहि णं पएसी जहा अन्नो जीवो अन्नं सरीरं नो तं जीवो तं सरीरं ।

[६६] तए णं से पएसी राया केसिं कुमार-समणं एवं वयासी-अत्थि णं भंते! एसा पन्ना उवमा, इमेण पुण कारणेणं नो उवागच्छइ, एवं खलु भंते! मम अज्जिया होत्था इहेव सेयवियाए नगरीए धम्मिया जाव वित्तिं कप्पेमाणी समणोवासिया अभिगयजीवा० सव्वो वण्णओ जाव अप्पाणं भावेमाणी विहरइ, सा णं तुज्झं वत्तव्वयाए सुबहुं पुन्नोवचयं समज्जिणित्ता कालमासे कालं किच्चा अण्णयरेसु देवलोएसु देवत्ताए उववण्णा ।

तीसे णं अज्जियाए अहं नत्तुए होत्था इट्ठे कंते जाव पासणयाए, तं जइ णं सा अज्जिया मम आगंतुं एवं वएज्जा-एवं खलु नत्तुया! अहं तव अज्जिया होत्था, इहेव सेयवियाए नयरीए धम्मिया जाव वित्तिं कप्पेमाणी समणोवासिया जाव विहरामि ।

तए णं अहं सुबहुं पुन्नोवचयं समज्जिणित्ता जाव देवलोएसु देवत्ताए उववण्णा, तं तुमं पि नत्तुया! भवाहि धम्मिए जाव विहराहि, तए णं तुमं पि एयं चेव सुबहुं पुन्नोवचयं समज्जिणित्ता जाव उववज्जिहिसि, तं जइ णं अज्जिया मम आगंतुं एवं वएज्जा तो णं अहं सद्धहेज्जा पत्तिएज्जा रोएज्जा जहा- अण्णो जीवो अन्नं सरीरं नो तज्जीवो तं सरीरं, जम्हा सा अज्जिया मम आगंतुं नो एवं वयासी तम्हा सुपइद्विया मे पइण्णा जहा- तज्जीवो तं सरीरं नो अन्नो जीवो अन्नं सरीरं ।

तए णं केसी कुमार-समणे पएसिं रायं एवं वयासी-जति णं तुमं पएसी! ण्हायं कयबलिकम्मं कयकोउयमंगलपायच्छित्तं उल्लपडसाडगं भिंंगार-कडच्छुय-हत्थगयं देवकुलमणुपविसमाणं केइ य पुरिसे वच्चघरंसि ठिच्चाएवं वदेज्जा-एह ताव सामी! इह मुहुत्तगं आसयह वा चिट्ठह वा निसीयह वा तुयट्ठह वा, तस्स णं तुमं पएसी! पुरिसस्स खणमवि एयमट्ठं पडिसुणिज्जासि? नो तिणट्ठे समट्ठे, कम्हा णं? जम्हाणं भंते! असुई असुइ-सामंतो एवामेव पएसी तव वि अज्जिया होत्था इहेव सेयविया नयरीए धम्मिया जाव विहरति, सा णं अम्हं वत्तव्वयाए सुबहुं जाव उववण्णा,

सूत्तं-६६

तीसे णं अज्जियाए तुमं नत्तुए होत्था-इट्ठे किमंग पुण पासणयाए? सा णं इच्छइ माणुसं लोगं हव्वमागच्छित्तए, नो चेव णं संचाएइ हव्वमागच्छित्तए ।

चउहिं ठाणेहिं पएसी अहुणोववण्णे देवे देवलोएसु इच्छेज्जा माणुसं लोगं हव्वमागच्छित्तए नो चेव णं संचाएइ हव्वमागच्छित्तए-

अहुणोववण्णे देवे देवलोएसु दिव्वेहिं कामभोगेहिं मुच्छिए गिद्धे गढिए अज्झोववण्णे से णं माणुसे भोगे नो आढाति नो परिजाणाति, से णं इच्छेज्ज माणुसं लोगं हव्वमागच्छित्तए नो चेव णं संचाएति हव्वमागच्छित्तए ।

अहुणोववण्णे देवे देवलोएसु दिव्वेहिं कामभोगेहिं मुच्छिए [गिद्धे गढिए] अज्झोववण्णे तस्स णं माणुस्से पेम्मे वोच्छिण्णए भवति दिव्वे पेम्मे सकंते भवति से णं इच्छेज्जा माणुसं लोगं हव्वमागच्छित्तए नो चेव णं संचाएइ हव्वमागच्छित्तए ।

अहुणोववण्णे देवे देवलोएसु दिव्वेहिं कामभोगेहिं मुच्छिए जाव अज्झोववण्णे, तस्स णं एवं भवइ-इयाणिं गच्छं मुहुत्ते गच्छं जाव इह अप्पाउया नरा कालधम्ममुणा संजुत्ता भवन्ति, से णं इच्छेज्जा माणुस्स लोगं हव्वमागच्छित्तए नो चेव णं संचाएइ हव्व मागच्छित्तए ।

अहुणोववण्णे देवे देवलोएसु दिव्वेहिं जाव अज्झोववण्णे, तस्स माणुस्सए उराले दुग्गंधे पडिकूले पडिलोमे भवइ, उड्ढं पि य णं चत्तारि पंच जोअणसए असुभे माणुस्सए गंधे अभिसमागच्छति, से णं इच्छेज्जा माणुस्स लोगं हव्वमागच्छित्तए नो चेव णं संचाएइ हव्वमागच्छित्तए

इच्चेएहिं चउहिं ठाणेहिं पएसी अहुणोववण्णे देवे देवलोएसु इच्छेज्ज माणुसं लोगं हव्वमागच्छित्तए नो चेव णं संचाएइ हव्वमागच्छित्तए तं सद्धाहिं णं तुमं पएसी जह- अन्नो जीवो अन्नं सरीरं नो तज्जीवो तं सरीरं ।

[६७] तए णं से पएसी राया केसिं कुमार-समणं एवं वयासी- अत्थि णं भंते! एसा पन्ना उवमा, इमेणं पुण कारणेणं नो उवागच्छति, एवं खलु भंते अहं अन्नया कयाइ बाहिरियाए उवढाणसालाए अणेगगणनायक-दंडनायग राईसर-तलवर-माडंबिय-कोडुंबिय-इब्भ-सेट्ठि-सेणावइ-सत्थवाह-मंति-महामंति-गणग-दोवारिय-अमच्च-चड-पीढमद्द-नगर-निगम-दूय-संधिवालेहिं सद्धिं संपरिवुडे विहरामि ।

तए णं मम नगरगुत्तिया ससक्खं सहोढं सलोढं सगेवेज्जं अवउडगबंधणबद्धं चोरं उवणेंति, तए णं अहं तं पुरिसं जीवंतं चेव अओकुंभीए पक्खिवावेमि अउमएणं पिहाणएणं पिहावेमि अएणं य तउएणं य आयावेमि आयपच्चइएहिं पुरिसेहिं रक्खावेमि, तए णं अहं अन्नया कयाइं जेणामेव सा अओकुंभी तेणामेव उवागच्छामि उवागच्छित्ता तं अओकुंभि उग्गलच्छावेमि उग्गलच्छावित्ता तं पुरिसं सयमेव पासामि नो चेव णं तीसे अओकुंभीए केइ छिड्डे इ वा विवरे इ वा अंतरे इ वा राई वा जओ णं से जीवे अंतोहितो बहिया निग्गए ।

जइ णं भंते! तीसे अओकुंभीए होज्जा केइ छिड्डे इ वा जाव राई वा जओ णं से जीवे अंतोहितो बहिया निग्गए, तो णं अहं सद्धेज्जा पत्तिएज्जा रोएज्जा जहा- अन्नो जीवो अन्नं सरीरं नो तज्जीवो तं सरीरं, जम्हा णं भंते! तीसे अओकुंभीए नत्थि केइ छिड्डे इ वा जाव निग्गए, तम्हा सुपतिट्ठिया मे पइण्णा जहा- तज्जीवो तं सरीरं नो अण्णो जीवो अण्णं सरीरं ।

तए णं केसी कुमार-समणे पएसिं रायं एवं वयासी पएसी! से जहानामए कूडागारसाला सूत्तं-६७

सिया दुहओ लित्ता गुत्ता गुत्तदुवारा निवाया निवायगंभीरा, अह णं केइ पुरिसे भेरिं च दंडं च गहाय कूडागारसालाए अंतो-अंतो अनुप्पविसति अनुप्पविसित्ता तीसे कूडागारसालाए सव्वतो समंता घण-निचिय

निरंतर-निच्छिड्डाङ्गं दुवारवयणाङ्गं पिहेङ्गं, तीसे कूडागारसालाए बहुमज्झदेसभाए ठिच्चा तं भेरिं दंडएणं महया-महया सद्धेणं तालेज्जा, से नूणं पएसी! से सद्धे णं अंतोहिंतो बहिया निग्गच्छइ? हंता निग्गच्छइ,

अत्थि णं पएसी! तीसे कूडागारसालाए केइ छिड्डे इ वा जाव राई वा जओ णं से सद्धे अंतोहिंतो बहिया निग्गए? नो तिण्ढे समद्धे, एवामेव पएसी! जीवे वि अप्पडिहयगई पुढविं भिच्चा सिलं भिच्चा पव्वयं भिच्चा अंतोहिंतो बहिया निग्गच्छइ, तं सद्धहाहि णं तुमं पएसी! अन्नो जीवो तं चेव तए णं पएसी राया केसिं कुमार-समणं एवं वयासी-

अत्थि णं भंते! एस पण्णा उवमा इमेणं पुण कारणेणं नो उवागच्छइ, एवं खलु भंते! अहं अन्नया कयाइ बाहिरियाए उवट्ठाणसालाए जाव विहरामि, तए णं ममं नगरगुत्तिया ससक्खं जाव उवणेंति, तए णं अहं तं पुरिसं जीवियाओ ववरोवेमि ववरोवेत्ता अओकुंभीए पक्खिवावेमि पक्खिवावेत्ता अओमएणं पिहाणएणं पिहावेमि जाव पच्चइएहिं पुरिसेहिं रक्खावेमि,

तए णं अहं अन्नया कयाइ जेणेव सा कुंभी तेणेव उवागच्छामि उवागच्छित्ता तं अओकुंभि उग्गलच्छावेमि, तं अओकुंभिं किमिकुंभिं पिव पासामि नो चेव णं तीसे अओकुंभीए केइ छिड्डे इ वा जाव राई वा जता णं ते जीवा बहियाहिंतो अनुपविट्ठा जति णं तीसे अओकुंभीए होज्ज केइ छिड्डे इ वा जाव अनुपविट्ठा तेणं अहं सद्धहेज्जा जहा अन्नो जीवो तं चेव, जम्हा णं तीसे अओकुंभीए नत्थि कोइ छिड्डे इ वा जाव अनुपविट्ठा तम्हा सुपटिट्ठिआ मे पइण्णा जहा- तंजीवो तं सरीरं नो [अन्नो जीवो अन्नं सरीरं]।

तए णं केसी कुमार-समणे पएसिं रायं एवं वयासी-अत्थि तुमे पएसी! कयाइ य अए धंतपुव्वे वा धमावियपुव्वे वा? हंता अत्थि, से नूणं पएसी! अए धंते समाणे सव्वे अगणिपरिवाए भवति? हंता भवति, अत्थि णं पएसी! तस्स अयस्स केइ छिड्डे इ वा जेणं से जोई बहियाहिंतो अंतो अनुपविट्ठे? नो तिण्ढे समद्धे, एवामेव पएसी! जीवो वि अप्पडिहयगई पुढविं भिच्चा सिलं भिच्चा पव्वयं भिच्चा बहियाहिंतो अंतो अनुपविसइ, तं सद्धहाहि णं तुमं पएसी! तहेव ।

[६८] तए णं पएसी राया केसिं कुमार-समणं एवं वयासी-अत्थि णं भंते! एसा पण्णा उवमा इमेणं पुणं कारणेणं नो उवागच्छइ, अत्थि णं भंते! से जहानामए-केइ पुरिसे तरुणे जाव सिप्पोवगए पभू पंचकंडगं निसिरित्तए? हंता पभू!

जति णं भंते! सच्चेव पुरिसे बाले जाव मंदविण्णाणे पभू होज्जा पंचकंडगं निसिरित्तए, हंतो पभू जति णं भंते सच्चेव पुरिसे बाले जाव मंदविण्णाणे पभू होज्जा पंचकंडगं निसिरित्तए तो णं अहं सद्धहेज्जा पत्तिएज्जा रोएज्जा जहा- अन्नो जीवो अन्नं सरीरं नो तज्जीवो तं सरीरं ।

जम्हा णं भंते सच्चेव पुरिसे जाव मंदविण्णाणे नो पभू पंचकंडयं निसिरित्तए तम्हा सुपटिट्ठिया मे पइण्णा जहा- तज्जीवो तं सरीरं नो अन्नो जीवो जन्नं सरीरं ।

तए णं केसी कुमार-समणे पएसिं रायं एवं वयासी-से जहानामए-केइ पुरिसे तरुणे जाव निउण सिप्पोवगए नवएणं धणुणा नवियाए जीवाए नवएणं उसुणा पभू पंचकंडगं निसिरित्तए? हंता, पभू सो चेव णं पुरिसे तरुणे जाव निउणसिप्पोवगए कोरिल्लएणं धणुणा कोरिल्लयाए जीवाए कोरिल्लएणं सूत्तं-६९

उसुणा पभू पंचकंडगं निसिरित्तए? नो तिण्ढे समद्धे,

कम्हा णं? भंते! तस्स पुरिसस्स अपज्जत्ताइं उवगरणाइं हवन्ति, एवामेव पएसी! सो चेव पुरिसे बाले जाव मंदविण्णाणे अपज्जत्तोवगरणे, नो पभू पंचकंडयं निसिरित्तए, तं सद्दहाहि णं तुमं पएसी! जहा- अन्नो जीवो अन्नं सरीरं नो तज्जीवो तं सरीरं ।

[६९] तए णं पएसी राया केसिं कुमार-समणं एवं वयासी-अत्थि णं भंते! एस पण्णा उवमा इमेणं पुम कारणेणं नो उवागच्छइ, भंते! से जहानामए- केइ पुरिसे तरुणे जाव निउण सिप्पोवगते पभू एगं महं अयभारगं वा तउयभारगं वा सीसगभारगं वा परिवहित्तए? हंता पभू,

सो चेव णं भंते! पुरिसे जुण्णे जराजज्जरियदेहे सिढिलवलितयाविणद्धगत्ते दंडपरिग्गहियग्गहत्थे पविरलपरिसडियदंतसेढी आउरे किसि-ए पिवासिए दुब्बले परिकिलंते नो पभू एगं महं अयभारगं वा जाव परिवहित्तए,

जति णं भंते! सच्चेव पुरिसे जुण्णे जराजज्जरियदेहे जाव परिकिलंते पभू एगं महं अयभारगं वा जाव परिवहित्तए तो णं अहं सद्दहेज्जा पत्तिएज्जा रोएज्जा जहा- अन्नो जीवो अन्नं सरीरं नो तज्जीवो तं सरीरं ।

जम्हा णं भंते! सच्चेव पुरिसे जुण्णे जाव परिकिलंते नो पभू एगं महं अयभारगं वा जाव परिवहित्तए तम्हा सुपतिट्ठित्ता मे पइण्णा तहेव ।

तए णं केसी कुमार-समणे पएसिं रायं एवं वयासी- से जहानामए-केइ पुरिसे तरुणे जाव निउणसिप्पोवगए नवियाए विहंगियाए नवएहिं सिक्कएहिं नवएहिं पच्छियापिंडएहिं पभू एगं महं अयभारगं वा [तउयभारगं वासीसगभारगं वा] परिवहित्तए हंता पभू पएसी से चेव णं पुरिसे तरुणे जाव निउण-सिप्पोवगए जुण्णियाए दुब्बलियाए धुणक्खइयाए विहंगियाए जुण्णएहिं दुब्बलएहिं धुणक्खइएहिं सिढिल-तयापिणद्धएहिं सिक्कएहिं जुण्णएहिं दुब्बलएहिं धुणक्खइएहिं पच्छिया-पिंडएहिं पभू एगं महं अयभारगं वा परिवहित्तए? नो तिण्ढे समढे ।

कम्हा णं भंते! तस्स पुरिसस्स जुण्णाइं उवगरणाइं भवन्ति, एवामेव पएसी! से चेव पुरिसे जुण्णे जाव किलंते जुण्णोवगरणे, नो पभू एगं महं अयभारगं वा जाव परिवहित्तए, तं सद्दहाहि णं तुमं पएसी! जहा- अन्नो जीवो अन्नं सरीरं नो तज्जीवो तं सरीरं ।

[७०] तए णं से पएसी राय केसिं कुमार-समणं एवं वयासी- अत्थि णं भंते! जाव नो उवागच्छइ, एवं खलु भंते! जाव विहरामि, तए णं मम नगरगुत्तिया चोरं उवणेंति, तए णं अहं तं पुरिसं जीवंतगं चेव तुलेमि तुलेत्ता छविच्छेयं अकुव्वमाणे जीवियाओ ववरोवेमि ववरोवेत्ता मयं तुलेमि नो चेव णं तस्स पुरिसस्स जीवंतस्स वा तुलियस्स मुयस्स वा तुलियस्स केइ अण्णत्ते वा नाणत्ते वा ओमत्ते वा तुच्छत्ते वा गरुयत्ते वा लहुयत्ते वा ।

जति णं भंते! तस्स पुरिसस्स जीवंतस्स वा तुलियस्स मुयस्स वा तुलियस्स केइ अण्णत्ते वा जाव लहुयत्ते वा तो णं अहं सद्दहेज्जा तं चेव, जम्हा णं भंते! तस्स पुरिसस्स जीवंतस्स वा तुलियस्स मयुस्स वा तुलियस्स नत्थि केइ अण्णत्ते वा जाव गरुयत्ते वा लहुयत्ते वा तम्हा सुपतिट्ठिया मे पइण्णा जहा- तज्जीवो [तं सरीरं नो अण्णो जीवो अण्णं सरीरं] ।

तए णं केसी कुमार-समणे पएसिं रायं एवं वयासी-अत्थि णं पएसी! तुमे कयाइ वत्थी सूत्तं-७०

धंतपुव्वे वा धमावियपुव्वे वा? हंता अत्थी, अत्थि णं पएसी! तस्स वत्थिस्स पुण्मस्स वा तुलियस्स अपुन्नस्स वा तुलियस्स केइ अण्णत्ते वा जाव लहुयत्ते वा नो तिण्ढे सम्ढे, एवामेव पएसी! जीवस्स अगुरलघुयत्तं पडुच्च जीवंतस्स वा तुलियस्स मुयस्स वा तुलियस्स नत्थि केइ अण्णत्ते जाव लहुयत्ते वा, तं सद्दहाहि णं तुमं पएसी! तं चेव ।

[७१] तए णं पएसी राया केसिं कुमार-समणं एवं वयासी-अत्थि णं भंते! एसा जाव नो उवागच्छइ, एवं खलु भंते! अहं अण्णया जाव चोरं उवर्णेति, तए णं अहं तं पुरिसं सव्वतो समंता समभिलोएमि, नो चेव णं तत्थ जीवं पासामि, तए णं अहं तं पुरिसं दुहा फालियं करेमि करेत्ता सव्वतो समंता समभिलोएति नो चेव णं तत्थ जीवं पासामि, एवं तिहा चउहा संखेज्जहा फालियं करेमि नो चेव णं तत्थ जीवं पासामि,

जइ णं भंते! अहं तंसि पुरिसंसि दुहा वा तिहा वा चउहा वा संखेज्जहा वा फालियंमि जीवं पासंतो तो णं अहं सद्दहेज्जा नो तं चेव जम्हा णं भंते! अहं तंसि दुहा वा तिहा वा चउहा वा संखेज्जहा वा फालियंमि जीवं न पासामि तम्हा सुपतिट्ठिया मे पइण्णा जहा- तज्जवीओ तं सरीरं तं चेव ।

तए णं केसी कुमार-समणे पएसिं रायं एवं वयासी- मूढतराए णं तुमं पएसी! ताओ तुच्छतराओ के णं भंते! तुच्छतराए पएसी! से जहानामए-केइ पुरिसा वणत्थी वणोवजीवी वणगवेसणयाए जोइं च जोइंभायणं च गहाय कट्ठाणं अडविं अनुपविट्ठा, तए णं ते पुरिसा तीसे अगामियाए जाव किंचिं देसं अनुप्पत्ता समाणा एगं पुरिसं एवं वयासी ।

अम्हे णं देवाणुप्पिया! कट्ठाणं अडविं पविसामो, एत्तो णं तुमं जोइंभायणाओ जोइं गहायं अम्हं असणं साहेज्जासि, अहं तं जोइंभायणे जोइं विज्झावेज्जा एत्तो णं तुमं कट्ठाओ जोइं गहायं अम्हं असणं साहेज्जासि त्ति कट्ठु कट्ठाणं अडविं अनुपविट्ठा, तए णं से पुरिसे तओ मुहुत्तंतरस्स तेसिं पुरिसाणं असणं साहेमि त्ति कट्ठु जेणेव जोतिभायणे तेणेव उवागच्छइ जोइंभायणे जोइं विज्झायमेव पासति ।

तए णं से पुरिसे जेणेव से कट्ठे तेणेव उवागच्छइ उवागच्छित्ता तं कट्ठं सव्वओ समंता समभिलोएति नो चेव णं तत्थ जोइं पासति, तए णं से पुरिसे परियरं बंधइ फरसु गेण्हइ तं कट्ठं दुहा फालियं करेइ सव्वतो समंता समभिलोएइ नो चेव णं तत्थ जोइं पासइ, एवं जाव संखेज्जहा वा फालियं करेइ सव्वतो समंता समभिलोएइ नो चेव णं तत्थ जोइं पासइ तए णं से पुरिसे तंसि कट्ठंसि दुहाफालिए वा जाव संखेज्जहाफालिए वा जोइं अपासमाणे संते तंते परिस्संते निव्विण्णे समाणे परसुं एगंते एडेइ परियरं मुयइ मुइत्ता एवं वयासी-

अहो! मए तेसिं पुरिसाणं असणे नो साहिए त्ति कट्ठु ओहयमणसंकप्पे चिंतासोगसागर-संपविट्ठे करयलपल्लत्थमुहे अट्ठज्झाणोवगए भूमिगयदिट्ठिए झियाइ, ते णं ते पुरिसा कट्ठाइं छिंदंति, जेणेव से पुरिसे तेणेव उवागच्छंति, तं पुरिसं ओहयमणसंकप्पं जाव झियायमाणं पासंति पासित्ता एवं वयासी-

किं णं तुमं देवाणुप्पिया! ओहयमणसंकप्पे जाव झियायसि? तए णं से पुरिसे एवं वयासी- तुब्भे णं देवाणुप्पिया! कट्ठाणं अडविं अनुपविसमाणा ममं एवं वयासी ।

अम्हे णं देवाणुप्पिया! कट्ठाणं अडविं जाव-पविट्ठा, तए णं अहं तओ मुहुत्तंतरस्स तुब्भं सूत्तं-७१

असणं साहेमि त्ति कट्ठु जेणेव जोइंभायण जाव झियामि ।

तए णं तेसिं पुरिसाणं एगे पुरिसे छेए दक्खे पत्तद्वे जाव उवएसलद्धे ते पुरिसे एवं वयासी-गच्छह णं तुब्भे देवाणुप्पिया! ण्हाया कयबलिकम्मा जाव हव्वमागच्छेह जा णं अहं असणं साहेमित्ति कट्ठु परियरं बंधइ परसुं गिण्हइ, सरं करेइ सरेण अरणिं महेइ जोइं पाडेइ जोइं संधुक्खेइ तेसिं पुरिसाणं असणं साहेइ ।

तए णं ते पुरिसा ण्हाया कयब-लिकम्मा जाव पायच्छित्ता जेणेव से पुरिसे तेणेव उवागच्छंति, तए णं से पुरिसे तेसिं पुरिसाणं सुहासणवरगयाणं तं विउलं असणं पाणं खाइमं साइमं उवणेइ, तए णं ते पुरिसा तं विउलं असणं पाणं खाइमं साइमं आसाएमाणा वीसाएमाणा जाव विहरंति, जिमियभुत्तुत्तरागया वि य णं समाणा आयंता चोक्खा परमसुईभूया तं पुरिसं एवं वयासी-अहो णं तुमं देवाणुप्पिया! जइडे मूढे अपंडिए निव्विण्णाणे अनुवएसलद्धे जे णं तुमं इच्छसि कट्ठंसि दुहा फालियंसि वा जाव जोतिं पासित्तए से एण्णद्वेणं पएसी एवं वुच्चइ मूढतराए णं तुमं पएसी ताओ तुच्छतराओ ।

[७२] तए णं पएसी राया केसिं कुमार-समणं एवं वयासी-जुत्तए णं भंते! तुब्भं इय छेयाणं दक्खाणं पत्तद्वणं कुसलाणं महामईणं विणीयाणं विण्णाणपत्ताणं उवएसलद्धाणं अहं इमीसे महालियाए महच्चपरिसाए मज्झे उच्चावएहिं आओसेहिं आओसित्तए उच्चावयाहिं उद्वंसणाहिं उद्वंसित्तए उच्चावयाहिं निब्भंछणाहिं० एवं निच्छोडणाहिं? ।

तए णं केसी कुमार-समणे पएसिं रायं एवं वयासी-जाणासि णं तुमं पएसि! कति परिसाओ पन्नत्ताओ? भंते! जाणामि चत्तारि परिसाओ पन्नत्ताओ तं जहा- खत्तियपरिसा गाहावइपरिसा माहणपरिसा इसिपरिसा, जाणासि णं तुमं पएसी राया! एयासिं चउण्हं परिसाणं कस्स का दंड-नीई पन्नत्ता? हंता! जाणामि,

जे णं खत्तियं-परिसाए अवरज्झइ से णं हत्थच्छिण्णए वा पायच्छिण्णए वा सीसच्छिण्णए वा सूलाइए वा एगाहच्चे कूडाहच्चे जीवियाओ ववरोविज्जइ ।

जे णं गाहावइपरिसाए अवरज्झइ से णं तएणं वा वेढेण वा पलालेण वा वेढित्ता अगणिकाएणं झामिज्जइ ।

जे णं माहणपरिसाए अवरज्झइ से णं अणिद्वाहिं अकंताहिं जाव अमणामाहिं वग्गूहिं उवालभित्ता कुंडियालच्छणए वा सूणगलंछणए वा कीरइ निव्विसए वा आणविज्जइ ।

जे णं इसिपरिसाए अवरज्झइ से णं नाइ-अणिद्वाहिं जाव अमणामाहिं वग्गूहिं उवालब्भइ एवं च ताव पएसी! तुमं जाणासि तहावि णं तुमं ममं वामं वामेणं दंडं दंडेणं पडिकूलं पडिकूलेणं पडिलोमं पडिलोमेणं विवच्चासं विवच्चासेमं वट्ठसि ।

तए णं पएसी राया केसिं कुमार-समणं एवं वयासी-एवं खलु अहं देवाणुप्पिएहिं पढमिल्लएणं चेव वागरणेणं संलद्धे तए णं ममं इमेयारूवे अज्झत्थिए जाव संकप्पे समुपज्जित्था, जहा-जहा णं एयस्स पुरिसस्स वामं वामेणं जाव विवच्चासं विवच्चासेणं वट्ठिस्सामि तहा-तहा णं अहं नाणं च नाणोवलंभं च करणं च करकोवलंभं च दंसणं च दंसणोवलंभं च जीवं च जीवोवलंभं च उवलभिस्सामि, तं एएणं कारणेणं अहं देवाणुप्पियाणं! वामं वामेणं जाव विवच्चासं विवच्चासेणं वट्ठिए ।

तए णं केसी कुमार-समणे पएसिं रायं एवं वयासी-जाणासि णं तुमं पएसी कइ ववहारगा सूत्तं-७२

पन्नत्ता? हंता जाणामि, चत्तारि ववहारगा पन्नत्ता-“देइ नामेगे नो सण्णवेइ सण्णवेइ नामेगे नो देइ एगे देइ” वि सण्णवेइ वि एगे नो देइ नो सण्णवेइ, जाणासि णं तुमं पएसी! एसिं चउण्हं पुरिसाणं के ववहारी के अववहारी? हंता जाणामि-

तत्थ णं जे से पुरिसे देइ नो सण्णवेइ से णं पुरिसे ववहारी, तत्थ णं जे से पुरिसे नो देइ सण्णवेइ से णं पुरिसे ववहारी, तत्थ णं जे से पुरिसे देइ वि सण्णवेइ वि से पुरिसे ववहारी, तत्थ णं जे से पुरिसे नो देइ नो सण्णवेइ से णं अववहारी, एवामेव तुमं पि ववहारी, नो चेव णं तुमं पएसी अववहारी।

[७३] तए णं पएसी राया केसिं कुमार-समणं एवं वयासी-तुब्भे णं भंते! इय छेया दक्खा जाव उवएसलद्धा समत्था णं भंते! ममं करयलंसि वा आमलयं जीवं सरीराओ अभिनिवट्टित्ताणं उवदंसित्तए।

तेणं कालेणं तेणं समएणं पएसिस्स रण्णो अदूरसामंते वाउयाए संवुत्ते, तणवणस्सइकाए एयइ वेयइ चलइ फंदइ घट्टइ उदीरइ तं तं भावं परिणमइ,

तए णं केसी कुमार-समणे एसिं रायं एवं वयासी- पाससि णं तुमं पएसी राया! एयं वणस्सइं एयंतं जाव तं तं भावं परिणमंतं? हंता पासामि, तणवणस्सइकायं किं देवो चालेइ असुरो वा चालेइ नागो वा चालेइ किन्नरो वा चालेइ किंपुरिंसो वा चालेइ महोरगो वा चालेइ गंधव्वो वा चालेइ? जाणासि णं तुमं पएसी! एयं, हंता जाणामि, नो देवो चालेइ जाव नो गंधव्वो चालेइ वाउयाए चालेइ, पाससि णं तुमं पएसी! एयस्स वाउकायस्स सरुविस्स सकाम्मस्स सरागस्स समोहस्स सवेयस्स सलेसस्स ससरीरस्स रूवं? नो तिण्हे समहे ।

जइ णं तुमं पएसीराया! एयस्स वाउकायस्स सरुविस्स जाव ससरीरस्स रूवं न पाससि तं कहं णं पएसी! तव करयलंसि वा आमलगं जीवं सरीराओ अभिनिवट्टिताणं उवदंसिस्सामि? एवं खलु पएसी! दसट्ठाणाइं छउमत्थे मणुस्से सव्वभावेणं न जाणइ न पासइ तं जहा- धम्मत्थिकायं अधम्मत्थिकायं आगासत्थिकायं जीवं असरीरबद्धं परमाणुपोग्गलं सद्धं गंधं वायं अयं जिणे भविस्सइ वा नो भविस्सइ अयं सव्वदुक्खाणं अंतं करिस्सइ वा नो वा करिस्सइ,

एताणि चेव उप्पन्ननाणदंसणधरे अरहा जिणे केवली सव्वभावेणं जाणइ पासइ तं जहा- धम्मत्थिकायं जाव नो वा करिस्सइ, तं सद्धहाहि णं तुमं पएसी! जहा- अन्नो जीवो अन्नं सरीरं नो तज्जीवो तं सरीरं ।

[७४] तए णं से पएसी राया केसिं कुमार-समणं एवं वयासी- से नूणं भंते! हत्थिस्स कुंथुस्स य समे चेव जीवे? हंता पएसी! हत्थिस्स य कुंथुस्स य समे चेव जीवे, से नूणं भंते हत्थीओ कुंथू अप्पकम्मतराए चेव अप्पकिरियतराए चेव अप्पासवतराए चेव एवं आहार-नीहार-उस्सास-नीसास इड्डीए महजुइअप्पतराए चेव, एवं च कुंथुओ हत्थी महाकम्मतराए चेव महाकिरिय जाव? हंता पएसी! हत्थीओ कुंथू अप्पकम्मतराए चेव कुंथूओ वा हत्थी महाकम्मतराए चेव तं चेव ।

कम्हा णं भंते! हत्थिस्स य कुंथुस्स य समे चेव जीवे?,

पएसी! से जहानामए कूडागारसाला सिया जाव गंभीरा, अह णं केइ पुरिसे जोइं व दीवं व गहायं तं कूडागार-सालं अंतो-अंतो अनुपविसइ तीसे कूडागार-सालाए सव्वत्तो समंता घण-निचिय- निरंतर-सूत्तं-७४

निच्छिड्डां दुवार-वयणां पिहेति पिहेत्ता तीसे कूडागारसालाए बहुमज्झदेसभाए तं पईवं पलीवेज्जा, तए णं से पईवे तं कूडागारसालं अंतो-अंतो ओभासेइ उज्जोवेइ तावेति पभासेइ, नो चेव णं बाहिं, अह णं से पुरिसे तं पईवं इड्डरणं पिहेज्जा, तए णं से पईवे तं इड्डरणं अंतो-अंतो ओभासेइ उज्जोवेइ तावेति पभासेइ नो चेव णं इड्डरणस्स बाहिं नो चेव णं कूडागारसालं नो चेव णं कूडागारसालाए बाहिं एवं-गोकिलिंजेणं पच्छियापिडएणं गंडमाणियाए आढएणं अद्दाढएणं पत्थएणं अद्धपत्थएणं कुलवेणं अद्धकुलवेणं चाउब्भाइयाए अद्दुभाइयाए सोलसियाए बत्तीसियाए चउसद्वियाए अहं णं से पुरिसे तं पईवं दीवचंपएणं पिहेज्जा ।

तए णं से पदीवे दीवचंपगस्स अंतो-अंतो ओभासेति उज्जोवेइ तावेति पभासेइ, नो चेव णं दीवचंपगस्स बाहिं, नो चेल णं चउसद्विया बाहिं, नो चेव णं कूडागारसालं नो चेव णं कूडागारसालाए बाहिं, एवामेव पएसी! जीवे वि जं जारिसयं पुव्वकम्मनिबद्धं बौदिं निव्वत्तेइ तं असं-खेज्जेहिं जीवपदेसेहिं सचित्तीकरेइ-खुड्डियं वा महालियं वा तं सदहाहि णं तुमं पएसी जहा- अन्नो जीवो अन्नं सरीरं नो तज्जीवो तं सरीरं ।

[७५] तए णं पएसी राया केसिं कुमार-समणं एवं वयासी-एवं खलु भंते! मम अज्जगस्स एस सण्णा जाव समोसरणे जहा- तज्जीवो तं सरीरं नो अन्नो जीवो अन्नं सरीरं, तयाणंतरं च णं मम पिउणो वि एसा सण्णा, तयाणंतरं मम वि एसा सण्णा जाव समोसरणं, तं नो खलु अहं बहुपुरिसपरंपरागयं कुलणिस्सियं दिट्ठिं छंडेस्सामि,

तए णं केसी कुमार-समणे पएसिरायं एवं वयासी-मा णं तुमं पएसी पच्छाणुताविए भवेज्जासि जहा- व से पुरिसे अयहारए ।

के णं भंते! से अयहारए? पएसी! से जहानामए-केइ पुरिसा अत्थत्थी अत्थगवेसी अत्थलुद्धगा अत्थकंखिया अत्थपिवासिया अत्थगवेसणायए विउलं पणियभंडमायाए सुबहुं भत्तपाणं-पत्थयणं गहाय एगं महं अगामियं छिण्णावायं दीहमद्धं उडविं अनुपविट्ठा ।

तए णं ते पुरिसा तीसे अगामियाए अडवीए कंचि देसं अनुप्पत्ता समाणा एगमहं अयागरं पासंति, अएणं सव्वतो समंता आइण्णं विच्छिण्णं सच्छडं उवच्छडं फुडं अवगाढं गाढं पासंति पासित्ता हट्ठुडु जाव-हियया अण्णमण्णं सद्दावेति सद्दावेत्ता एवं वयासी- एसं णं देवाणुप्पिया! अयभंडे इट्ठे कंते जाव मणामे, तं सेयं खलु देवाणुप्पिया! अमहं अयभारयं बंधित्तए त्ति कट्ठु अन्नमन्नस्स अंतिए एयमद्धं पडिसुणेंति अयभारं बंधंति बंधित्ता अहाणुपुव्विए संपत्थिया ।

तए णं ते पुरिसा तीसे अगामियाए जाव छिण्णावायाए दीहमद्धाए अडवीए कंचि देसं अनुप्पत्ता समाणा एगं महं तउआगरं पासंति, तउएणं आइण्णं तं चेव जाव सद्दावेत्ता एवं वयासी-एसं णं देवाणुप्पिया! तउयभंडे जाव मणामे, अप्पेणं चेव तउएणं सुबहुं अए लब्भति, तं सेयं खलु देवाणुप्पिया! अयभारयंछड्डेत्ता तउयभारयं बंधित्तए त्ति कट्ठु अन्नमन्नस्स अंतिए एयमद्धं पडिसुणेंति अयभारं छड्डेंति तउयभारं बंधंति, तत्थ णं एगे पुरिसे नो संचाएइ अयभारं छड्डेत्तए तउयभारं बंधित्तए ।

तए णं ते पुरिसा तं पुरिसं एवं वयासी-एसं णं देवाणुप्पिया! तउयभंडे जाव सुबहुं अए लब्भति, तं छड्डेहि णं देवाणुप्पिया! अयभारगं, तउयभारगं बंधाहि, तए णं से पुरिसे एवं वयासी-दूराहडे मे देवाणुप्पिया! अए चिराहडे मे देवाणुप्पिया! अए अइगाढबंधणबद्धे मे देवाणुप्पिया! अए असिलिड्ड-सूत्तं-७५

बंधणबद्धे मे देवाणुप्पिया! धणियबंधणबद्धे मे देवाणुप्पिया! अए- नो संचाएमि अयभारगंछड्डेत्ता तउयभारगं बंधित्तए ।

तए णं ते पुरिसा तं पुरिसं जाहे नो संचाएन्ति बहूहिं आघवणाहिं य पन्नवणाहिं य आघवित्तए वा पन्नवित्तए वा तया अहाणुपुव्वीए संपत्थिया । एवं तंबागरं रुप्पागरं सुवन्नागरं रयणागरं वड्डरागरं,

तए णं ते पुरिसा जेणेव सया जणवया जेणेव साइं-साइं नगराइं तेणेव उवागच्छन्ति, वड्डवेयणं करेन्ति, सुबहुं दासी-दास-गो-महिस-गवेलगं गिण्हन्ति, अट्ठतलमूसिय-पासायवड्डेसगे करावैन्ति, णहाया कयहबलिकम्मा उप्पिं पासावरगया फुट्टमाणेहिं मुड्डंगमत्थएहिं बत्तीसइबद्धएहिं नाडएहिं वरतरुणीसंपउत्तेहिं उवणच्चिज्जमाणा उवगिज्जमाणा उवलालिज्जमाणा इट्ठे सद्ध-फरिस-जाव विहरन्ति ।

तए णं से पुरिसे अयभारए जेणेव सए नगरे तेणेव उवागच्छइ अयभारेणं गहाय अयविक्किणणं करेन्ति, तंसि अप्पमोल्लंसि निट्ठियसि झीणपरिव्वए ते पुरिसे उप्पिं पासायवरगए जाव विहरमाणे पासति पासित्ता एवं वयासी-अहो णं अहं अधन्ने अपुन्ने अकयत्थे अकयलकखणे हिरिसिरिवज्जिए हीनपुन्नचाउद्धसे दुरंतपंतलकखणे, जति णं अहं मित्ताण वा नाईण वा नियगाण वा सुणेतओ तो णं अहं पि एवं चेय उप्पिं पासायवरगए जाव विहरन्तो;

से तेणट्ठेणं पएसी एवं वुच्चइ-मा णं तुमं पएसी पच्छाणुताविए भवेज्जासि जहा व से पुरिसे अयभारए ।

[७६] एत्थ णं से पएसी राया संबुद्धे केसि कुमार-समणं वंदइ नमंसइ वंदित्ता नमंसित्ता एवं वयासी-नो खलु भन्ते! अहं पच्छाणुताविए भविस्सामि जहा- व से पुरिसे अयभारए, तं इच्छामि णं देवाणुप्पियाणं! अंतिए केवलिपन्नत्तं धम्मं निसामित्तए अहासुहं देवाणुप्पिया! मा पडिबंध्यं करेहि धम्मकहा जहा चित्तस्स गिहिधम्मं पडिवज्जइ, जेणेव सेयविया नगरी तेणेव पहारेत्थ गमणाए ।

[७७] तए णं केसी कुमार-समणे पएसिं रायं एवं वयासी- जाणासि णं तुमं पएसी! कए आयरिया पन्नत्ता? हंता जाणामि, तओ आयरिआ पन्नत्ता तं जहा- कलायरिए सिप्पायरिए धम्मायरिए जाणासि णं तुमं पएसी । तेसिं तिण्हं आयरियाणं कस्स का विनयपडिवत्ती पउंजियव्वा? हंता जाणामि, कलायरियस्स सिप्पायरियस्स उवलेवणं संमज्जणं वा करेज्जा पुरओ पुप्फाणि वा आणवेज्जा मज्जावेज्जा मंडावेज्जा भोयावेज्जा वा विउलं जीवियारिहं पीडदाणं दलएज्जा पुत्ताणुपुत्तियं वित्तिं कप्पेज्जा जत्थेव धम्मायरियं पासिज्जा तत्थेव वंदेज्जा नमंसेज्जा सक्कारेज्जा सम्माणेज्जा कलाणं मंगलं देवयं चेइयं पज्जुवासेज्जा फासुएसणिज्जेणं असणपाणखाइमसाइमेणं पडिलाभेज्जा पाडिहारिणं पीढ-फलग-सेज्जा संथारणं उवनिमंतेज्जा एवं च तावं तुमं पएसी एवं जाणासि तहावि णं तुमं ममं वामं वामेणं जाव वट्ठित्ता ममं एयमट्ठं अक्खामित्ता जेणेव सेयविया नगरी तेणेव पहारेत्थ गमणाए ।

तए णं से पएसी राया केसिं कुमार-समणं एवं वयासी- एवं खलु भन्ते! मम एयारूवे अज्झत्थिए जाव समुप्पज्जित्था एवं खलु अहं देवाणुप्पियाणं! वामं वामेणं जाव वट्ठिए तं सेयं खलु मे कल्लं पाउप्पभायाए रयणीए जाव तेयसा जलन्ते अंतेउरपरियालसद्धिं संपरिवुडस्स देवाणुप्पिए! वंदित्ता नमंसित्ता एयमट्ठं भुज्जो-भुज्जो सम्मं विणएणं खामित्तए त्ति कट्ठु जामेव दिसिं पाउब्भूए तामेव दिसिं पडिगए ।

सूत्तं-७७

तए णं से पएसी राया कल्लं पाउप्पभायाए रयणीए जाव तेयसा जलंते हट्टुतुडु जाव हियए जहेव कूणिए तहेव निग्गच्छइ-अंतेउर-परियालसद्धिं संपरिवुडे पंचविहेणं अभिगमेणं वंदइ नमंसइ एयमडं भुज्जो-भुज्जो सम्मं विणएणं खामेइ ।

[७८] तए णं केसी कुमार-समणे पएसिस्स रण्णो सूरियकंतप्पमुहाणं देवीणं तीसे य महति-महालियाए महच्चपरिसाए जाव धम्मं परिकहेइ ।

तए णं से पएसी राया धम्मं सोच्चा निसम्म उट्ठाए उट्ठेति केसिं कुमार-समणं वंदइ नमंसइ जेणेव सेयविया नगरी तेणेव पहारेत्थ गमणाए ।

तए णं केसी कुमार-समणे पएसिं रायं एवं वयासी-मा णं तुमं पएसी पुत्विं रमणिज्जे भवित्ता पच्छा अरमणिज्जे भविज्जासि जहा- से वनसंडेइ वा नट्टसालाइ वा इक्खुवाडेइ वा खलवाडेइ वा, कहां णं भंते! वनसंडे पुत्विं रमणिज्जे भवित्ता पच्छा अरमणिज्जे भवति? पएसी! जया णं वनसंडे पत्तिए पुप्फिए फल्लिए हरियगरेरिज्जमाणे सिरीए अईव-अईव उवसोभेमाणे चिट्ठइ, तया णं वनसंडे रमणिज्जे भवति, जया णं वनसंडे नो पत्तिए नो पुप्फिए नो फल्लिए नो हरियगरेरिज्जमाणे नो सिरीए अईव-अईव उवसोभेमाणे चिट्ठइ तया णं जुण्णे झडे परिसडिय-पंडुपत्ते सुक्करुक्खे इव मीलायमाणे चिट्ठइ, तया णं वणसंडे नो रमणिज्जे भवति ।

जया णं नट्टसाला गिज्जइ वाइज्जइ नच्चिज्जइ अभिणिज्जइ हसिज्जइ रमिज्जइ तया णं नट्टसाला रमणिज्जा भवइजयाणं नट्टसाला नोगिज्जइ जावनो रमिज्जइ तयाणं नट्टसाला अरमणिज्जा भवइ ।

जया णं इक्खुवाडे छिज्जइ भिज्जइ लुज्जइ खज्जइ पिज्जइ दिज्जइ तया णं इक्खुवाडे रमणिज्जे भवइ जया णं इक्खुवाडे नो छिज्जइ जाव तया णं इक्खुवाडे अरमणिज्जे भवइ ।

जया णं खलवाडे उच्छुब्भइ उडुइज्जइ मलइज्जइ पुणिज्जइ खज्जइ पिज्जइ दिज्जइ तया णं खलवाडे रमणिज्जे भवति जया णं खलवाडे नो उच्छुब्भइ जाव अरमणिज्जे भवति,

से तेणेठ्ठेणं पएसी एवं वुच्चइ-मा णं तुमं पएसी पुत्विं रमणिज्जे भवित्ता पच्छा अरमणिज्जे भविज्जासि जहा- से वनसंडेइ वा जाव खलवाडेइ वा ।

तए णं पएसी केसिं कुमार-समणं एवं वयासी-नो खलु भंते! अहं पुत्विं रमणिज्जे भवित्ता पच्छा अरमणिज्जे भविस्सामि जहा- से वनसंडेइ वा जाव खलवाडेइ वा, अहं णं सेयबियापामोक्खाइं सत्तगामसहस्साइं चत्तारि भागे करिस्सामि एगं भागं बलवाहणस्स दलइस्सामि, एगं भागं कोट्ठागारे छुभिस्सामि, एगं भागं अंतेउरस्स दलइस्सामि, एगेणं भागेणं महतिमहालियं कूडागारसालं करिस्सामि, तत्थ णं बहूहिं पुरिसेहिं दिण्ण-भइ-भत्त-वेयणेहिं विउलं असणं पाणं साइमं खाइमं उवक्खडावेत्ता बहूणं समण-माहण-भिक्खुयाणं पंथिय-पडियाणं परिभाएमाणे बहूहिं सीलव्वय-गुणव्वय-वेरमण-पच्चक्खाण-पोसहोववासेहिं अप्पाणं भावेमाणे विहरिस्सामि त्ति कट्ठु जामेव दिसिं पाउब्भूए तामेव दिसिं पडिगए ।

[७९] तएणं से पएसी राया कल्लं जाव तेयसा जलंते सेयवियापामोक्खाइं सत्तगाम-सहस्साइं चत्तारि-भाए करेइ, एगं भागं बलवाहणस्स दलयइ जाव कूडागारसालं करेइ, तत्थ णं बहूहिं पुरिसेहिं जाव उवक्खडावेत्ता बहूणं समण जाव परिभाएमाणे विहरइ ।

[८०] तए णं से पएसी राया समणोवासए अभिगयजीवाजीवे० जाव विहरइ, जप्पभिइं च सूत्तं-८०

णं पएसी राया समणोवासए जाए तप्पभिइं च णं रज्जं च रट्ठं च बलं च वाहणं च कोसं च कोट्टागारं च पुरं च अंतेउरं च जणवयं च अणाढायमाणे यावि विहरति ।

[८१] तए णं तीसे सूरियकंता देवीए इमेयारूवे अज्झत्थिए जाव समुप्पज्जित्था-जप्पभिइं च णं पएसी राया समणोवासए जाए तप्पभिइं च णं रज्जं च रट्ठं च जाव अंतेउरं च ममं जणवयं च अणाढायमाणे विहरइ, तं सेयं खलु मे एसिं रायं केणवि सत्थप्पओगेणं वा अग्गिप्पओगेण वा मंतप्पओगेणं वा विसप्पओगेण वा उद्धवेत्ता सूरियकंतं कुमारं रज्जे ठवित्ता सयमेव रज्जसिरिं कारेमाणीए पालेमाणीए विहरित्तए त्ति कट्ठु एवं संपेहेइ संपेहित्ता सूरियकंतं कुमारं सद्दावेइ सद्दावेत्ता एवं वयासी-

जप्पभिइं च णं पएसी राया समणोवासए जाए तप्पभिइं च णं रज्जं च जाव अंतेउरं च ममं जणवयं च माणुस्सए य कामभोगे अणाढायमाणे विहरइ, तं सेयं खलु तव पुत्ता! एसिं रायं केणइ सत्थप्पओगेण वा जाव उद्धवेत्ता सयमेव रज्जसिरिं कारेमाणस्स पालेमाणस्स विहरित्तए ।

तए णं सूरियकंते कुमारे सूरियकंताए देवीए एवं वुत्ते समाणे सूरियकंताए देवीए एयमट्ठं नो आढाइ नो परियाणाइं तुसिणीए संचिइइ,

तए णं तीसे सूरियकंताए देवीए इमेयारूवे अज्झत्थिए जाव समुप्पज्जित्था-मा णं सूरियकंते कुमारे एसिस्स रण्णो इमं रहस्सभेय करिस्सइ त्ति कट्ठु एसिस्स रण्णो छिद्वाणि य मम्मणि य रहस्साणि य विवराणि य अंतराणि य पडिजागरमाणी-पडिजागरमाणी विहरइ ।

तए णं सूरियकंता देवी अण्णया कयाइ एसिस्स रण्णो अंतरं जाणइ जाणित्ता असणं पाणं खाइमं साइमं सव्व-वत्थ-गंध-मल्लालंकारं विसप्पजोगं पउंजइ, एसिस्स रण्णो ण्हायस्स जाव पायच्छित्तस्स सुहासणवरगयस्स तं विससंजुत्तं असणं जाव वत्थं जाव अलंकारं निसिरेइ घातइ ।

तए णं तस्स एसिस्स रण्णो तं विससंजुत्तं असणं० आहारेमाणस्स ससीरगंसि वेयणा पाउब्भूया-उज्जला विपुला पगाढा कक्कसा कडुया फरुसा निदुरा चंडा तिव्वा दुक्खा दुग्गा दुरहियासा पित्त-जरपरिगयसरीरे दाहवक्कंतिए यावि विहरइ ।

तए णं से पएसी राया सूरियकंताए देवीए अप्पदुस्समाणे जेणेव पोसहसाला तेणेव उवागच्छइ पोसहसालं पविसइ उच्चारपासवणभूमिं पडिलेहेइ दब्भसंथारगं संथरइ, दब्भसंथारगं दुरुहइ, पुरत्थाभिमुहे संपलियंकनिसण्णे करयल-परिग्गहियं सिरसावत्तं मत्थए अंजलिं कट्ठु एवं वयासी-

नमोत्थु णं अरहंताणं जाव सिद्धिगइनामधेयं ठाणं संपत्ताणं । नमोत्थु णं केसिस्स कुमार-समणस्स मम धम्मोवदेसगस्स धम्मायरियस्स, वंदामि णं भगवंत तत्थगयं इह गए, पासउ मे भगवं तत्थ-गए इहगयं ति कट्ठु वंदइ नमंसइ, पुत्विं पि णं मए केसिस्स कुमार-समणस्स अंतिए थूलए पाणाइवाए पच्चक्खाए जाव परिग्गहे पच्चक्खाए ।

तं इयाणिं पि णं तस्सेव भगवतो अंतिए सव्वं पाणाइवायं पच्चक्खामि जाव परिग्गहं पच्चक्खामि सव्वं-कोहं जाव मिच्छादंसणसल्लं, अकरणिज्जं जोयं पच्चक्खामि, सव्वं असणं० चउत्विहं पि आहारं जावज्जीवाए पच्चक्खामि, जं पि य मे सरीरं इट्ठं जाव फुसंतु त्ति एयं पि य णं चरिमेहिं ऊसासनिस्ससेहिं वोसिरामि त्ति कट्ठु आलोइय-पडिक्कंते समाहिपत्ते कालमासे कालं किच्चा सोहम्मं कप्पे सूरियाभे विमाणे उववायसभाए जाव उववण्णे ।

तए णं से सूरियाभे देवे अहुणोववण्णए चेव समाणे पंचविहाए पज्जत्तीए पज्ज-त्तिभावं सूतंत-८१

गच्छति तंजहा- आहारपज्जत्तीए सरीरपज्जत्तीए इंदियपज्जत्तीए आणपाणपज्जत्तीए भास-मणपज्ज-
त्तीए, तं एवं खलु गोयमा! सूरियाभेणं देवेणं सा दिव्वादेविड्ढी दिव्वादेवजुती दिव्वेदेवाणुभावे लद्धे पत्ते
अभिसमण्णा-गए ।

[८२] सूरियाभस्स णं भंते! देवस्स केवतियं कालं ठिती पन्नत्ता? गोयमा! चत्तारि
पलिओवमाइं ठिती पन्नत्ता,

से णं सूरियाभे देवे ताओ देवलोगाओ आउक्खएणं भवक्खएणं ठिइक्खएणं अनंतरं चयं
चइत्ता कहिं गमिहिति? गोयमा! महाविदेहे वासे जाणि इमाणि कुलाणि भवंति-अड्ढाइं दित्ताइं विउलाइं
वित्थिण्ण-विपुल-भवण-सयणासण-जाण-वाहणाइं बहुधण-बहुजातरूव-रययाइं आओग-पओग-संपउत्ताइं
विच्छइडियपउरभत्तपाणाइं बहुदासी-दास-गो-महिस-गवेलगप्पभूयाइं बहुजणस्स अपरिभूयाइं तत्थ
अण्णयरेसु कुलेसु पुत्तए पच्चाइस्सइ ।

तए णं तंसि दारगंसि गब्भगयंसि चेव समाणंसि अम्मापिरुणं धम्मे दढा पइण्णा
भविस्सइ।

तए णं तस्स दारयस्स नवण्हं मासाणं बहुपडिपुन्नानं अद्धइमाण य राइंदियाणं वित्तिक्कं-
ताणं सुकुमालपाणिपायं अहीणपडिपुन्नपंचिंदियसरीरं लक्खण-वंजण-गुणोववेयं माणुम्माणपडिपुन्नसुजाय-
सव्वंगसुंदरंगं ससि-सोमकारं कंतं पियदंसणं सुरूवं दारयं पयाहिइ ।

तए णं तस्स दारगस्स अम्मापियरो पढमे दिवसे ठितिवडियं करेस्संति ततिय दिवसे
चंदसूरदंसणं करेस्संति छट्ठे दिवसे जागरियं जागरिस्संति एक्कारसमे दिवसे वीइक्कंते संपत्ते बारसमे
दिवसे निव्वित्ते असुइजायकम्मकरणे चोक्खे समंज्जिओवलित्ते विउलं असण-पाण-खाइम-साइमं
उवक्खडावेस्संति मित्त-नाइ-नियग-सयम-संबंधि-परिजणं आमंतेत्ता तओ पच्छा ण्हाया कयबलिकम्मा
जाव अलंकिया भोयणमंडवंसि सुहासणवरगया तेणं मित्त-नाइ-जाव परिजणेणं सद्धिं विउलं असणं०
आसाएमाणा वीसाएमाणा परि-भुंजेमाणा परिभाएमाणा एवं च णं विहरिस्संति ।

जिमियभुत्तुत्तरागया वि य णं समाणा आयंता चोक्खा परमसुइभूया तं मित्त नाइ जाव-
परिजणं विउलेणं वत्थ-गंध-मल्लालंकारेणं सक्कारेस्संति सम्माणिस्संति ।

तस्सेव मित्त-जाव-परिजणस्स पुरतो एवं वइ-स्संति-जम्हा णं देवाणुप्पिया! इमंसि दारगंसि
गब्भगयंसि चेव समाणंसि धम्मे दढा पइण्णा जाया तं होउ णं अम्हं एयस्स दारयस्स दढपइण्णे नामे णं
तए णं तस्स अम्मापियरो अनुपुव्वेणं ठितिवडियं च चंदसूरदरिसणं च जागरियं च नामधिज्जकरणं च
पजेवणं च पंचकमणं च कण्णवेहणं च संवच्छरपडिलेहणं च चूलोवणं च अण्णाणि य बहूणि
गब्भाहाणजम्माणाइयाइं महया इड्ढी-सक्कार-समुदएणं करिस्संति ।

[८३] तए णं दढपतिण्णे दारगे पंचधाईपरिक्खित्ते-खीरधाईए मज्जणधाईए मंडणधाईए
अंकधाईए कीलावणधाईए अण्णाहिं बहूहिं खुज्जाहिं चिलाइयाहिं वामणियाहिं वडभियाहिं बब्बरियाहिं
बउसियाहिं जोणियाहिं पल्हवियाहिं ईसिणियाहिं थारुइणियाहिं लासियाहिं लउसियाहिं दमिलाहिं सिंहलीहिं
पुलिंदीहिं आरबीहिं पक्कणीहिं वहलीहिं मुरंडीहिं सबरीहिं पारसीहिं नाणादेसीहिं विदेस-परिमंडियाहिं इंगिय-
चित्तिय-पत्थिय-वियाणयाहिं सदेस-नेवत्थ-गहिय-वेसाहिं निउणकुसलाहिं विणीयाहिं चेडियाचक्कवाल-
वरतरुणिवंद-परियाल-संपरिवुडे वरिसधर-कंचुइ-महयवंदपरिक्खित्ते हत्थाओ हत्थं साहरिज्जमाणे-साहरिज्ज-
सूत्तं-८३

माणे उवणचिज्जमामे-उवणचिज्जमाणे अंकाओ अंकं परिभुज्जमाणे-परिभुज्जमाणे उवगाइज्जमाणे-उवगाइज्जमाणे उवलालिज्जमाणे-उवलालिज्जमाणे उवगूहिज्जमाणे-उवगूहिज्जमाणे अवतासिज्जमाणे-अवतासिज्जमाणे परिवंदिज्जमाणे-परिवंदिज्जमाणे परिचुंबिज्जमाणे-परिचुंबिज्जमाणे रम्मेषु मणिकोट्टिम-तलेसु परंगमाणे परंगमाणे गिरिकंदरमल्लीणे विव चंपगरवरपायवे निव्वाघायंसि सुहंसुहेणं परिवड्ढिस्सइ ।

तए णं तं दढपइण्णं दारगं अम्मापियरो सातिरेग अट्ठवासजायगं जाणित्ता सोभणंसि तिहि-करण-नक्खत्त-मुहुत्तंसि ण्हायं कयबलिकम्मं कयकोउयमंगल-पायच्छित्तं सव्वालंकारविभूसियं करेत्ता महया इड्ढीसक्कारसमुदण्णं कलायरियस्स उवणेहिंति ।

तए णं से कलायरिए तं दढपइण्णं दारगं लेहाइयाओ गणियप्पाहाणो सउणरूपज्ज-वसाणाओ बावत्तरिं कलाओ सुत्तओ अत्थओ य गंधओ य करणओ य सिक्खावेहिइ सेहावेहिइ तं जहा-

लेहं गणियं रूवं नट्ट गीयं वाइयं सरगयं पुक्खरगयं समतालं जूयं जणवायं पासगं अट्ठावयं पोरेक्कं दगमट्टियं अन्नविहिं पाणविहिं वत्थविहिं विलेवणविहिं सयणविहिं अज्जं पहेलियं मागहियं गाहं गीइयं सिलोगं हिरण्णजुत्तिं सुवण्णजुत्तिं आभरणविहिं तरुणीपडिकम्मं इत्थिलक्खणं पुरिसलक्खणं हयलक्खणं गयलक्खणं गोणलक्खणं कुक्कुडलक्खणं छत्तलक्खणं चक्कलक्ख-णं दंडलक्खणं असिलक्खणं मणिलक्खणं कागणिलक्खणं वत्थुविज्जं नगरमाणं खंधावारमाणं चारं पडिचारं वूहं पडिवूहं चक्कवूहं गरुलवूहं सगडवूहं जुद्धं निजुद्धं जुद्धजुद्धं अट्ठिजुद्धं मुट्ठिजुद्धं वाहुजुद्धं लयाजुद्धं ईसत्थं छरूप्पवायं धणुवेयं हिरण्णपागं सुवण्णपागं सुत्तखेइडं वट्ठखेइडं नालियाखेइडं पत्तच्छेज्जं कडगच्छेज्जं सज्जीवं निज्जीवं सउणरूपं इति तए णं से कलायरिए तं दढपइण्णं दारगं लेहाइयाओ गणियप्पहाणाओ सउणरूप-पज्जवासाणाओ बावत्तरि कलाओ सुत्तओ य अत्थओ य गंधओ य करणओ य सिक्खावेत्ता सेहावेत्ता अम्मापिरुणं उवणेहिइ ।

तए णं तस्स दढपइण्णस्स दारगस्स अम्मापियरो तं कलायरियं विउलेणं असण-पाण-खाइम-साइमेणं वत्थ-गंध-मल्लालंकारेणं सक्कारिस्संति सम्माणिस्संति विउलं जीवियारिहं पीइदाणं दलइस्संति दलइत्ता पडिविसज्जेहिंति ।

[८४] तए णं से दढपइण्णे दारए उम्मुक्कबालभावे विण्णयपरिणयमित्ते जोवण्णगमणुपत्ते बावत्तरिकलापंडिए नवंगसुत्तपडिबोहिए अट्ठारसविहदेसिप्पगारभासाविसारए गीयरई गंधव्वणट्ठकुसले सिंगारागारचारूवे संगय-गय-हसिय-भणिय-चिट्ठिय-विलास-निउण-जुत्तोवयारकुसले हयजोही गयजोही रहजोही बाहुजोही बाहुप्पमदी अलं भोगसमत्थे साहसिए वियालचारी यावि भविससइ ।

तए णं तं दढपइण्णं दारगं अम्मापियरो उम्मुक्कबालभाव जाव वियालचारिं च वियाणित्ता विउलेहिं अन्नभोगेहिं य पाणभो-गेहिं य लेणभोगेहिं य वत्थभोगेहिं य सयणभोगेहिं य उवनिमंतेहिंति ।

तए णं दढपइण्णे दारए तेहिं विउलेहिं अण्णभोगेहिं जाव सयणभोगेहिं नो सज्जिहिति नो गिज्झिहिति नोमुच्छिहिति नो अज्झोववज्जिहिति, से जहानामए पउमुप्पलेइ वा पउमेइ वा जाव सहस्सपत्तेइ वा पंके जाते जले संवुड्ढे नोवलिप्पइ पंकरणं नोवलिप्पइ जलरणं एवामेव दढपइण्णे वि दारए कामेहिं जाए भोगेहिं-संवड्ढिए नोवलिप्पिहिति० मित्त-नाइ-नियग-सयण-संबंधि-परिजणेणं, से णं तहा-रूवाणं थेराइणं अंतिए केवलं बोहिं बुज्झिहिति मुंडे भवित्ता अगाराओ अणगारियं पव्वइस्सति ।

से णं अणगारे भविस्सइ-इरियासमिए जाव सुहुयहुयासणे इव तेयसा जलंते ।

सूत्तं-८४


तस्स णं भगवतो अनुत्तरेणं नाणेणं अनुतरेणं दंसणेणं अनुतरेणं चरित्तेणं अनुत्तरेणं आलएणं अनुत्तरेणं विहारेणं अनुत्तरेणं अज्जवेणं अनुत्तरेणं मद्दवेणं अनुत्तरेणं लाघवेणं अनुत्तराए खंतीए अनुत्तराए गुत्तीए अनुत्तराए मुत्तीए अनुत्तरेणं सव्वसंजम-सुचरियतवफल-निव्वाणमग्गेणं अप्पाणं भावेमाणस्स अनंते अनुत्तरे कसिणे पडिपुन्ने निरावरणे निव्वाधाए केवलवरणाणं-दसणे समुप्पज्जिहिति ।

तए णं से भगवं अरहा जिणे केवली भविस्सइ सदेवमणुयासुरस्स लोगस्स परियायं जाणि-हिति तं जहा- आगतिं गतिं ठितिं चवणं उववायं तक्कं कडं मणोमाणसियं खइयं भुत्तं पडिसेवियं आवीकम्मं रहोकम्मं अरहा अरहस्सभागी तं कालं तं मणवयकायजोगे वट्टमाणाणं सव्वलोए सव्वजीवाणं सव्वभावे जाणमाणे पासमाणे विहरिस्सइ ।

तए णं दढपइण्णे केवली एयारूवेणं विहारेणं विहरमाणे वहुइं वासाइं केवलिपरियागं पाउणिहिति पाउणित्ता अप्पणो आउसेसं आभोएत्ता बहूइं भत्ताइं पच्चक्खाइस्सइ बहूइं भत्ताइं अणसणाए छेइस्सइ जस्सट्ठाए कीरइ नग्गभावे मुंडभावे केसलोए बंभचेरवासे अण्हाणगं अदंतमणगं अच्छत्तगं अनुवाहणगं भूमिसेज्जाओ फलहसेज्जाओ परघरपवेसो लद्धावलद्धाइं माणावमाणाइं परेसिं हीलणाओ निंदणाओ खिंसणाओ तज्जणाओ ताडणाओ गरहणाओ उच्चावया विरूवरूवा बावीसं परीसहोवसग्गा गामकंटगा अहियासिज्जंति तमइं आराहेहिइ आराहित्ता चरिमेहिं उस्सास-निस्सासेहिं सिज्झिहिति बुज्झिहिति मुच्चिहिति परिनिव्वाहिति सव्वदुक्खाणमंतं करेहिति ।

[८५] सेवं भंते! सेवं भंते! त्ति भगवं गोयमे समणं भगवं महावीरं वंदइ नमंसइ वंदित्ता नमंसित्ता संजमेणं तवसा अप्पाणं भावेमाणे विहरति,

नमो जिणाणं जियभयाणं, नमो सुयदेवयाए भगवइए, नमो पन्नत्तीए भगवइए, नमो भगवओ अरहओ पासस्स, पस्से सुपस्से पस्सवणी नमो ।



रायपसेणियं बीतियं उवंगं समत्तं

मुनि दीपरत्नसागरेण संशोधितः सम्पादितश्च रायपसेणियं उवंगं समत्तं